

OLD

T

SOCI

# OLD TESTAMENT STORIES

IN

## THE HAIDA LANGUAGE.

BY

REV. C. HARRISON.



LONDON:

SOCIETY FOR PROMOTING CHRISTIAN KNOWLEDGE,  
NORTHUMBERLAND AVENUE, CHARING CROSS, W.C.

1893.

dt.

NW  
970.85  
B582

OLD TESTAMENT STORIES

THE HEBREW LANGUAGE

BY C. R. BARNES



UNIVERSITY OF CHICAGO  
LIBRARY  
1888

# CONTENTS.

LESSON	PAGE
I. THE CREATION ... ..	1
II. ADAM AND EVE ... ..	3
III. CAIN AND ABEL ... ..	5
IV. NOAH ... ..	7
V. ABRAHAM AND ISAAC ... ..	9
VI. ESAU AND JACOB ... ..	12
VII. JOSEPH. PART I. ... ..	13
VIII. JOSEPH. PART II. ... ..	17
IX. THE ISRAELITES IN EGYPT ... ..	23
X. THE TEN PLAGUES ... ..	27
XI. THE TEN COMMANDMENTS ... ..	33
XII. JOSHUA ... ..	39
XIII. ACHAN ... ..	41
XIV. THE JUDGES ... ..	44
XV. SAMUEL ... ..	50
XVI. SAUL ... ..	53
XVII. DAVID ... ..	58
XVIII. SOLOMON ... ..	68
XIX. ELIJAH ... ..	73
XX. ELISHA ... ..	80
XXI. THE PROPHETS ... ..	87
XXII. PRAYERS ... ..	91

Pacific N. W. History Dept.  
PROVINCIAL LIBRARY  
VICTORIA, B. C.

27636



NW  
970  
B582

# KEY TO THE SOUNDS OF THE LETTERS.

A as in Hat.

Ō as in Note.

Ā „ Father.

U „ Cur.

E „ Net.

Ū „ Rule.

Ē „ They.

Ai „ Aisle.

I „ Tin.

Au „ Audit.

Ī „ Machine.

Oi „ Noise.

O „ Not.

On „ House.

Ġ marked thus always begins a syllable.

H is always hard.

K or Kh is always hard, like the Greek χ (chi).

Lth is very like the Welsh ll.

Z, when initial, is equal to ds; when final, to ts.

# OLD TESTAMENT STORIES.

LETTERS.

## LESSON I.

### SHĀNUNGETLAGIDAS TLIGA WAUTLIWAN TLAOUTLAIANG.

SHANTLAN lthūunilth gud Shānungetlagidas tliga wautliwan tlaoutlaiang. Tlaglu agwi kum juiē kāng gaangāni, altsilth tliga wautliwan halga yūanan. Shantlan swaunshung gūd hatgā il tlaoutlaiang, waigen shantlan stung gūd yēni il tlaoutlaiang shā tligē ishin. Kum kin kāng gaangs stāhā kin wautliwan il tlaoutlaiang. Shantlan lth'ūnilth gūd adshi tligē il tlayhilgālāni, waigen hānlth wautliwan gwudā shālthangan il istaiang tlo, tungē hinū il kēyādaiang. Adshi shantlanē gūd kunē ishin il tlaoutlaiang, mātla ishin, waigen kinlthkai wautliwan ishin il inastladaiang.

Shantlan stanshung gūd juiē il tlaoutlaiang, kuncē ishin, waigen kaiēlthta wautliwan ishin. Shantlan klēlth gūd skātlingē wautliwan il tlaoutlaiang, waigen ettitē ishin. Skātlingē hānlthē ai il tlakwundalgangang ken ettit siēt ishin il tlaungādiēdāni. Shantlan lthūunilth gūd mūsmūs il tlaoutlaiang, lamatoē ishin, waigen kintiga wautliwan ishin. Adshi shantlanē gūd nung itlinga il tlaoutlaiang.

Hinū kingwoguns stung shāgung: kum kin kētdahā tlaoutlāngu, waigen shā kin isis da lth kum njingāngu, hētk tligē gu kin isis ishin, waigen hānlth ā kin isis ishin. Ā kin isis hangku kum lth tikwushtloāngu, waigen kum ā singelthkang lth gūshūāngu, dalung an dī Itlagidāsi althlā. Yenkien dī ū Shālānā gāgung. Kingwoguns

HAIDA.

B

stanshung ishin hin shouan: shantlan lthūunilth gūd Shālānā shā tligē tlaoutlaiang, hētk tligē ishin, tunge ishin, waigen kin wautliwan gu isis ishin.

Wēata, shantlan lthūunilth gud lthāangwilu, waigen shantlan chigwaustlo churchnigē ā lth istzoo, waigen sing Shālānā ā lth killou, adshi tligē dalung an il tlaoutlaiāni althlā. Itil wautliwan il tlaoutlaiang, kin wautliwan dalung kingsa ishin, altsilth il tagwiā yuāngung. Wēata juiē dalung kingung. Kistho juiē tlaoutlaiang? Shānungetlagidas juiē tlaoutlaiang. Kistho adshi tligē tlaoutlaiang? Tlan Shālānā swaunan adshi tligē tlaoutlaiang. Dalung kwudungstlo kistho dalung wautliwan tlaoutlaiang dalung kwudungung? Tlan Shānungetlagidas swaunan itil wautliwan tlaoutlaiang, waigen tuman itil il king gūgung.

Kitlano Shālānā nagung? Shā tligē gu il iching. Shānungetlagidas gu dalung king us? Kum Shālānā talung kingāngung, itil wautliwan tlou il kingung. Hinū Solomon shouan: Shālānā hangi tliga wautliwan gu iching, altsilth lth hāhudila las isken, ga dāungas gē ishin il king gūgung. Yenkien Shālānā lā yuāngung, waigen ga las ge ān il kwutungē lāgung.

Shantlan chigwaustlo taglu agwi agung il shanzoutaiang kin wautliwan il tlaēlthtaiang stāhā. Wēata lāgiē kingwoguns hin shouan: Sunday gastlo kum lth lthāangwilgun-gāngu, waigen kingwoguns langa talung tlahustastlo hetgwaugē ai itil il istāshang. Dī touilung las, Sunday gē wautliwan gūd kum lth kitilung nāngdāngu dalung il king gūis althlā. Churchnē ā lth istzoo waigen il kēyi ā lth killou, taglu agwi adshi tligē lā yūans dalung an il tlaoutlaiang althlā. Kum churchnigē ā dalung istzānstlo, tlistluan dalung kwōtalkāstlo hetgwaulana alth dalung stung gūishang. Wēata dalung lāgē da dī kwudungung, altsilth lā gwi kwutungē unga lth stilthto. Lā lth yeto waigen dalung il kagindāshang. Adshi an lth agung kin ūnshitgū Shālānā kum kin kāng gaangs stāhā kin wautliwan tlaoutlaiang, waigen tlan lā swaunan tagwiāgung.

## LESSON II.

### ADAM ISKEN EVE ISHIN.

SHANTLAN lthūnilt gud Shānungetlagidas Adam tlaou-  
tlaiang, waigen Adam nung itlinga is tlāgangang. Adam lā  
yūangangang ken il hātlandē Shālānā kwutungē kingānu  
edāni. Shānungetlagidas Adam kwōyadaiang waigen nung  
chada lā an il tlaoutlaiang. Eve hinū il kēyaiang. Eve  
nung chada is tlāgangang. Adam isken Eve ishin kitilung  
itil iching. Tlaglu agwi itil aungalung aungu Adan idjāni,  
altsilth il kitilung itil iching.

Kitlano Adam nāgang? Eden tougān gu il nāgang.  
Yenkien tliga wautliwan tlaglu agwi lā yūanan. Adam  
tliga wautliwan an itlagidēalang, waigen Adam isken Eve  
ishin kwutungē lā yūangangang. Shānungetlagidas giē  
kingwogungē kingān il edwaugangang, altsilth il kwutungē  
louwağangang.

Eden tougān gu kinlthkai gwudila ed wautliwan inastlai-  
ang, sēdunghangal ishin, hāna kwan yūan ishin, hāna houla  
yūan ishin, waigen kinlthkai an kaldungas swaunshung  
ishin. Adshi kinlthkai an kaldungas kin anūnshit lthkai  
hinū kēyağangang. Shālānā hin Adam shūtaiang: kinlthkai  
wautliwan adshi tougān ā isi lth tā, tlan kin anūnshit lthkai  
swaunan kum lth tāang. Anūnshit lthkai dung tāstlo houī-  
tang dung kwōtalashang. Yenkien dung tāsitlo houītang  
dung dāungedshang. Lthkai hēninga dung tāsken, dung  
isken, dung chā ishin, dalung kitilung ishin kwōtalthka  
odzūashang. Kingwoguns kingān di na dalung wausken  
dalung hēninga gīshang; waigen tliku dalung lth shūtas  
kingān kum dalung wauangsken dalung kwōtalkāshang.

Hetgwaulana lth hāda dāunga an itlagidāgung. Adam  
isken Eve ishin lā yūanan, waigen an il ūnshitālang tlo ltha  
kwutungē tlaoulth dāungiē il istakwudangang. Eve hetgwau-  
lana kinga tlagangang, waigen lā ga il lthwaugaiang. Hetg-  
waulana kutungā yūangangang. Nung chadas kum kwutungē  
kladskaans an il ūnshitāni, altsilth houshen Eve tlaoulth  
dāungiē da il kwudangang, waigen kum lā gwikāatlāngang.



Houshen an lā il istakwudangang ken hinū il shouan: tliku Shānungetlagidas dalung shūtas an dī ānshitung. Kinlthkai hēningas dalung tāstlo dalung kwōtalkāshang: kin anūnshit lthkai dalung tāsken dalung dāungedshang hinū il shouan. Il gūshou gingganganu shūdang. Kinlthkai hēningas dalung tāstlo kum dalung kwōtalkāngshang. Wēata di lth yeto: kinlthkai hēningas lth tāou waigen dalung hēninga gīshang. Kin anūnshit lthkai lth tāou, waigen Shānungetlagidas kingān dalung kutungāshang.

Tliku hetgwaulana shouan Eve yetaiang, waigen kinlthkai hēningas il tāgang. Houftang il kwutungē tlakwīdistlaiang, waigen houshen hānē il istaiang ken tlāl unga ga il istaiang. Laou ishin tāgang, waigen il stungwan dāungedouang, waigen houftang Adam isken Eve ishin lthwaug yūanan. Lthkenē kātli ā agung il saaldouang Shānungetlagidas ga il lthwaugaouang althlā.

Singyāstlo, Shānungetlagidas kil il kwudungouang. Hinū il shouan: Adam, kitlano dung iching? Eve, kitlano dung iching? Adam althkwi lth kā, waigen houftang Adam kingān idjāni. Shānungetlagidas hin Adam shūtaiang: Adam, kashintlou tliku Eve shūsi dung kwudungūdjang? Kashintlou kin anūnshit lthkai dung tāūdjang? Tliku dung lth shūtas kingān kum dung wauāngun, altsilth dalung stung kwōtalkāshang, waigen dalung kitilung ishin. Kingwoguns dī na dalung tlahustaguni althlā, wēata adshi tligē lth tlaoulthdāungashang, waigen dalung isken dalung kitilung ishin lthāangwil yūan gīshang. Wadlu Shānungetlagidas Eden tougān stāhā Adam dāngang, waigen Eve ishin. Wēata kum Eden tougān kāng gaangung.

Shānungetlagidas hin hetgwaulana shūtaiang: Adam dung tlaoulthdāunguni althlā, kintiga wautliwan telgu dung dāunga yūangung, waigen kwiē swaunan dung tāgīshang. Adshi tligē ougulthsēs silid zanoa shā ā dung hēninga gīshang, waigen ga dāungas gē wautliwan dung kwulthlu isisang. Kwai amzawan kit unga swaunshungs hētk lth istāshang, waigen dung kats il sahaskidungkashang, waigen il stēkwushi langa dung sahaskidungkashang.



Kasino Adam itil an ödung? Adam itil an aungäung Kasino Eve itil an ödung? Eve itil an ouäung. Shänungetlagidas gië kingwogungë Adam tlahustaiang althlä itil wautliwan däungang. Kasino itil kagin tlidzüashang? Jesus talung yetastlo itil il kagindäshang. Tlistluan dalung lthakaiawaiang tlo dalung däungaiang dalung aungalung däungaiäni althlä. Lth häada wautliwan kwötalkaungkasës an itil ünshitung. Kashintlou lth häada wautliwan kwötalkäshang? Tliku Shänungetlagidas Adam shütaiang kingän kum il wauängäni althlä, altsilth lth häada kwöta-lkaodzüashang. Itil tlü kwië kingänu ödung, waigen tlistluan itil kwötalkastlo houshen itil tlü kwië gwi stilthasang. Kitlangu itil hätlandë isisang? Itil hätlandë Shälänä gwi stilthasang. Laou hänts itil wautliwan ga istaiang, waigen itil kwötalkastlo fitl hänts lä gwi stilthasang. Itil hänts lasken shä tligë gu itil hëninga swaunungshang. Itil hänts däungasken hetgwaulana alth itil hëningäshang.

Kistho nung chada is tlägangang? Eve nung chada is tlägangang. Kitlano il nägang? Tougän Eden hin këyängang gu il nägang, waigen kingwoguns il tlahustaiang, altsilth stähä lä il dängang Shänungetlagidas ä. Kistho il tlaoulthdäungaiang? Hetgwaulana ü wangang, waigen wëata itil wautliwan ishin däungang. Kistho itil kwutungë tlaoulthlägelë an tagwiäung? Jesus Christ itil kwutungë tlaoulthlägelthasang il kil talung yetastlo. Lä lth kwöyado hetgwaulana telgu il tagwiäsi althlä, waigen tlistluan dalung kwötalkastlo ga angelgas gë sik dalung hätlandë istäshang, waigen tuman dalung il kingasang.

### LESSON III.

CAIN ISKEN ABEL ISHIN.

ADAM kitilung stangang; Cain isken Abel ishin hin il këyäuouang. Cain däungaiang, waigen Abel lä yüanan. Cain tligë alsilthägangang, waigen Abel lamatoë kësitangang. Shantlan swaunshung güd Abel tablegë kingän kin tlaoutlaiang, waigen inku lamatoë il tilthinägäni. Shänung-

etlagidas ga lamatoë il istaiang; waigen wadla, lamatoë il tiaiång. Cain ishin tablegë kingân kin tlaoutlaiang, waigen inku corngë isken, hâna ishin, kinlthkai gwudila ed ishin il istaiang. Abel Shânungetlagidas a singelthkang gûshûgangang, waigen Cain ishin.

Shâlânâ Abel kwutungë lâ yûans kângang altsilth tliku singelthkang il gûshûs kingân kin edâni. Yenkien Abel an il kwutungë lâgang Abel nung itlinga kutungâgâni althlâ. Cain singelthkang gûshûsken il kwutungë dâungas il kângang, waigen tliku Cain singelthkang gûshûs kingân kum il edângang. Yenkien Shâlânâ kum lâ an kwutungë lângang il kwutungë dâungaiâni althlâ. Abel il kwoyâda yûanan, waigen kum Cain il kwôyâdângang. Cain an langa unshitâni Shânungetlagidas Abel la telgu kwôyâdaiaang, waigen lâ an il kwutungë kâtliyildung kwolthtagangang.

Shâlânâ Cain kângang ken hinû il shouan: Cain, kashintlou Abel an dung kâtliyildungung? Tliku lth shûs kingân dung waustlo dung an dî lâshang: tliku lth shûs tlou kum kingân dung wauânstlo hetgwaulana dung an itlagidâshang. Cain kum kwutungë unga stlthtaângang waigen Cain tuan unga tiaiång kwulthkadis kâtli a. Wadlu Shânungetlagidas Cain an kâtliyildaiaang ken aung unga stâhâ tliga jinga a lâ il kil kaiitang il dâungaiaang althlâ.

Kasino Cain itil an ödung? Cain itil an kwaiâgung. Yenkien itil an il kwai tlâgângang, waigen tuan unga il tiaiång, altsilth Shâlânâ tligë dâunga a il kil kaiitang touilung wautliwan stâha. Abel il tiaiång silid Shânungetlagidas hin il shûtaiang: Cain, kitlano Abel iching? Cain hangtlaa hin shouan, tlitzan il isis kum an dî ûnshitângung. Shâlânâ houshen hin il shûtaiang: an dî ûnshitung, yenkien Abel dung tligun, waigen dung kwutungë hetgwaulana alth staougâgung.

Wêata Cain kingân talung kilthkadungstlo hetgwauë a talung isisang. Kum lth hâada wautliwan talung kwôyâdânstlo Cain kingân itil edasang. Kum Shâlânâ talung yetânsken hetgwaulana itil an itlagidâshang. Cain kingwoguns lthûunilth tlhustaiang ken hinû adshi kingwogungë

Itil skadadang : kum lth hāda tlitāngu ; waigen tlu unga dalung kwōyādātlidzūs kingān touilung wautliwan kwōyādātlidzūo. Kingān lth waugiū waigen shāgā kingdomgē dalung kingasang.

# LESSON IV.

## NOAH.

ABEL il tīaiang silid Eve Seth kaiang. Seth nung itlinga lā idjāni, altsiilth Seth touilung wautliwan lā yūanan. Seth Abel saoutk atglalthitaiang. Kum washt jingāngundang Seth kitilung Cain kitilung alth stangang. Houitang Cain kitilung Seth kitilung tlaoulthdāungaiang, waigen Shālānā lth hāda wautliwan dāungas kāngang tlo hinū il shouan : ga dāungas gē wautliwan hānlth ā lth hēlōdāshang.

Tlan Noah swaunan lā yūans il kāngang, waigen il kitilung ishin. Shānungetlagidas hin Noah shūtaiang ; Ark lth tlaoutla, yenkien gītlidaungkashang, waigen ga dāungas gē akītūkō odzūashang. Houitang Noah hin touilung shūtaiang : kwutungē unga lth stilthto, Shālānā lth yeto, yenkien gītlidaungkasēsi althla. Ltha wautliwan il yetastlo kagunasang, waigen ga dāungas gē hānlth ai kwōtalka odzūashang. Noah churchnē tlaoutlaiang ken hinū il shouan ; adshi churchnigē ā lth istzoo waigen dalung kagunasang. Gītlidaungkashangwau hin Noah touilung shūdağangang. Ginggangan il shūung ltha kwudungāngang. Kāhano, kumu ginggangan Noah shūāngāngang. Yenkien il shūgāngang.

Did agwi Ark il tlaoutlaiang lthdou āadā, waigen Noah touilung lā an kā yūanan. Shantlan swaunshung gūd Noah Ark tlaēlthkigāni ken hinū Shālānā shouan : Noah, mūs mūs stung lth ista nung itlinga isken nung chada ishin. Lamatoē stung lth ista nung itlinga isken nung chada ishin. Kintiga wautliwan shū stāhā kintiga stung istadal nung itlinga isken nung chada ishin. Ettitē wautliwan shū stāhā ettit stung lth istadal nung itlinga isken nung chada ishin. Tliku Shānungetlagidas shouan kingānu il waugang. Kin-

tiga wautliwan stung il istaiang shipgē gwī ā. Ettit wautliwan stung il tlū gwē istaiang ken tou kwan yūan ishin.

Wadlu kin wautliwan il tlaēlthkigāni ken hinū Shālānā shouan: Noah, wēata Arkgē ā lth unga kāiit; dung cha ishin, dung kitilung ishin dung alth stung gūgē lāgung. Noah kingān idjāni. Tlistluan Noah isken il chā ishin il kitilung lthūunilth ishin Ark kātli ā isodzouang tlo Shānungetlagidas kūwē waukikuskidāni, waigen yenkien tliku Noah shouan kingān idjan. Shantlan kwan gūd gttlidang. Tliga wautliwan stāhā adshi tungē sik idjāni ken Noah shipgē lā kīkikut idjan. Wadlu ga dāungas gē wautliwan lā ā istālang Arkgē ā; waigen Noah kwulth ltha kiāgangang ltha kwidista yūanstlo. Hin ltha shouan: Noah itil kūst talthkasskastla; waigen hinū Noah hangtlan shouan, kum dalung tlū gwē itzgē da dī kwudungāngung dalung dāungas althlā. Shānungetlagidas kīkustlouwē istangwau, waigen kum tliku dalung kūst talthkīkustla tlingē kāng gaangung althkwīk dalung isisā.

Kung ki klēlth skwauḡāgang ken lth hāada dāunga hēlōodzouāni. Kung ki chigwau ēlthstlo Ark lthdou Ararat inku chāktlināgang. Kung ki klāalth isitlo Noah lthdou yūans houshen kāngang waigen yētlth il tlayhitang. Kum silthkang il stiltthlaangang, waigen tligē klingān yhilgāsi an il ūnshitangang. Otgwau kaltsida il tlayhitang waigen yenkien tligē tilthsi althlā kum tliku ettit kouwa tlingē kāng gaangang, altsilth kaltsida silthkang stelang. Houshen hal chigwaustlo houshen kaltsida il tlayhitang, waigen yhil olthilth il kwut kātlagang. Houshen hal chigwau silid kaltsida il tlayhitang, waigen il yhitswaunangang.

Noah kwutungē lā yūanan, waigen tad houtla singai il kīlwaugang shipgē gwau stāhā, waigen houshen tligē yhilgāsi il kāngang tlo il kitilung kiak issāgang. Houftang Shālānā il killāouang lā il kagindaouāni althlā. Shālānā touul tlaoutlaiang, waigen hin Noah il shūtaiang: Noah, touul wēata dung kingung: kum houshen gttlidaungkashāns hinū adshi touulē lth hāada wautliwan skadadāshang, waigen kum houshen ga dāungas gē da lth gītīdaungkashaāngung.

Wēata tlan kin swaunshung gūgung. Adshi tligē ou unγκashang, waigen lth hāada dāunga zanoa kladska yūans ai is odzuashang. Tlisitlu shantlanē adshi tligē ōsitlo kum an itil ūnshitāngung, altsilth Shānungetlagidas ā singelthkang talung gūshū gīgē lātlingāgung, waigen hetgwaugē stāhā itil kagunasang. Noah kingān itil kwutungē lā yūans il kingstio itil il kagindāshang; waigen ga dāungas gē Noali touilung kingān hetgwaugē ai il istāshang. Shālānā an dalung ūnshitē da dī kwudungung. Hin lth shū “tlaou kātlūshang, waigen aung unga ā lth kaiitshang, waigen hin lā lth shūtāshang, Aungē, shāshi an dī dāungas waigen dung hangku ishin: waigen kum an dī lāngung houshen dī dung kaish.” Shānungetlagidas talung kwoyādasken kum itil da il kiskitāngshang. Itil dāungasken lā ā singelthkang talung gūshūadzing, waigen kin dāungas stāhā itil il kagindāshang. Kum itil kwutungē lāngskēn Shālānā ga itil lthwaug yuan-sang. Shantlan swaunshung itil kwōtalkāshang kum itil hēninga gīānsēsi althlā. Hetgwaulana itil kwutungē kwōlthtiē da kwudungung, altsilth Shānungetlagidas Kit talung yetadzing waigen itil alth il stung gīishang. Lā lth kwōyādo, kin lā wautliwan dalung ga il istas althlā. Lā tlā lth istiēdo, waigen shā tligē gu lā alth dalung is gīisang. Lāgē da itil kwudungskēn itil dāungas hansta talung shūadzing, waigen houitang itil kwutungē il tlasqwunāshang. Lā hangku Noah touilung kingān itil wautliwan dāungang, waigen tlan Jesus ai swaunan itil dāungas washtkishuasang. Hēlk kwutungē unga dalung istasken dalung an il kwutungē lāshang, waigen Noah il kagindaiang kingānu dalung il kagindāshang.

## LESSON V.

### ABRAHAM ISKEN ISAAC ISHIN.

ABRAHAM nung itlinga lā idjan, waigen Isaac il kitu idjāni. Abraham Isaac kwōyāda yūanan, il kit swaunshungs Isaac idjan althlā. Shantlan swaunshung gūd hinū Shanunge-tlagidas shouan: Abraham, kit unga swaunshungs lth ista,



waigen Moriah lthdou ā lth istiēdo, waigen lth il ti. Tliku dung lth shūtas kingān dung wausken Isaac telgu dī dung kwōyādas an dī ūnshitasang.

Shānungetlagidas kilth kingān il waugang Abraham. Kit unga swaunshungs il istaiang ken Moriah lthdouwē ā il istiēdouang. Tlistluan lthdouwē ā il istiēdouang tlo hinū Isaac shouan: dī aung, kitlano lamatoē iching? Zanowē lth kingung, waigen yātzē ishin: tlitzan lamatoē isis tlou anūnshitē da dī kwudungung. Waigen il aung hin hang-tian il shūtaiang: Shānungetlagidas lamatoē itil ga istāshang, waigen kin wautliwan il ēlthkidāshang. Abraham yātz istaiang, waigen tou ishin: Isaac zano skūgāngāni. Abraham kwau kwan yūan gwudā istaiang ken tablegē kingān kin il tlaoutlaiang. Tlistluan tablegē il tlaēlang tlo Isaac il gidsgildaiang. Il yhē langa il kūhaskidang, il kwollo ishin langa il kionang. Lā il glīdang waigen kwau tablegē kingān kin il tlaēlang inku lā il tlilthināgang. Itan Isaac lthwaug yūanan, waigen hinū il shouan: dī aung dī kalthshint lth kwutung ken kum dī lth tiang. Hinū dahou shouan: “Shānungetlagidas lamatoē itil ga istāshang waigen kin wautliwan il tlaoulthlāgelthasang. Wēata kin wautliwan tlaoulthlāgelē lā alth kianung waigen lamatoē dung ga il istāshang. O dī aung dī lth kaginda, waigen tliku dī ga dung shūtas kingān lth wau gīshang.”

Il aung hangtlan hin il shūtaiang: Shālānā itan hin dī ga shūdaḡun: Abraham, kit unga swaunshungs lth ista, waigen Moriah lthdouwē ā lth istiēdo, waigen lth il ti. Wēata tliku dī ga il shūdaḡun kingān lth wautalgung. Lāgung: Shānungetlagidas lth hāada wautliwan telgu kutungāgung, waigen itil da il tlātasang. Itan Abraham Isaac tablegē inku tlilthināgang ken yātz il istaiang, waigen lā il kwīsā ungkashātlaiang. Yenkien gūshāg lā il tiaskaiang. Houftang Shālānā hin shouan: Abraham tlan lth, wēata kin wautliwan telgu dī dung kwōyādas an dī ūnshitung. Kit unga swaunshungs houshen lth ista lā lth kagindasēs althla. Abraham kwutungē lāgang, waigen Isaac ishin.

Abraham lamatoē kāngang, nisānga lthken addu lā idjan.

Shālānā itan hin Abraham shūtaiang; wēata tliku sing-  
elthkang dung gūshūs kingān lth waushang. Adshi lamatoē  
lth ista waigen Isaac saoutk tablegē inku lamatoē lth ista.  
Waikingān il waugang Abraham. Isaac saoutk tablegē inku  
lamatoē il istaiang waigen ū il tiaiang. Wadlu Abraham  
isken Isaac ishin Shānungetlagidas ā killāgang lā il kagin-  
daouāni althlā. Shālānā Abraham an kwutungē lāgangang;  
waigen hinū il shouan : dung lth hāada wautliwan an aungā  
gīisang dī kilth kingān ltha waustlo. Wēata lth hāada lā  
wautliwan an il aungā elgung. Hinū itil il skadadang :  
tliku Shānungetlagidas itil ga shūtas kingān talung waustlo  
kin wautliwan itil an lāsang. Abraham kingān lth kwu-  
tungē unga edo, waigen kin dāunga wautliwan stāhā dalung  
kagunasang.

Wadla Shānungetlagidas hin shouan : Abraham, dī kilth  
kingan dung waugun, altsīlth tliga kwan dung kitilung ga  
lth itāshang, waigen lth hāada klālē kwan an ltha itlagidā-  
shang. Abraham tlan kit swaunshung daaiang, waigen  
gūshāg lā il tiaskaiang Shālānā kilth kingān waugē da il  
kwudangāni althlā. Shānungetlagidas ishin tlan kit swa-  
unshung istaiang, waigen kit unga swaunshungs, hētk ga il  
istaiang itil lāgē da il kwudangāni althla. Yenkien Shālānā  
kit itil wautliwan hagunan kwōtalang, waigen lā talung  
yetastlo hēninga swaunung talung kiāshang. Isaac ishin  
hin itil skadadang : tliku itil aungalung itil shutas kingān  
talung waugīū lāgung. Lth hāhudilāsi : tliku dalung  
yāalung dalung shūtas kingān lth waugīū. Kingwoguns  
klēlth hin shouan : aung unga lth kwōyāda, ou unga ishin,  
waigen kilth kingān lth wau : kingān dalung waustlo tlāā  
dalung hēningāshang. Aungalung, Abraham kingān lth edo.  
Shānungetlagidas dalung kitilung dalung ga istaiang, waigen  
unga istiē da il kwudungstlo kum lth kwīdistlaḡungāngu,  
waigen sing lā ā lth killou. Abraham kingān kwutungē  
unga lth edo, waigen kin lā swaunan kitilung skadadaḡīū,  
waigen dalung wautliwan il kagindāshang. Wēata kum  
tliku Shānungetlagidas talung kāng tlingē kāng gaangung.  
Shālānā tlou itil king gīgung, il hangi tliga wautliwan gu

isis althla. Yenkien il kutungāgung, altsilth kin wautliwan an il ūnshitung. Tliku dalung kwuduns an il ūnshitung. waigen dalung kēyi wautliwan ishin. Dalung il kwōyādung, waigen dalung hagunan il kit kwōyāsi kwōtalang itil il kagindiēan. Itil hātlandē kwōyā yūangung. Tlistluan itil kwōtalkastlo itil tlū kwiē gwi stilthasang, waigen itil hātlandē Abraham isken Isaac ishin gwulth isgīisang itil lāstlo. Itil hātlandē dāungasken hetgwaugē ai itil hātlandē heninga gīisang. Altsilth Abraham kingān kwutungē unga lth edo waigen Shālānā kilth kingān lth waugīu.

## LESSON VI.

### ESAU ISKEN JACOB ISHIN.

ISAAC kitilung stangang. Esau isken Jacob ishin hin il kēyāouang. Esau kwaiāgang waigen Jacob tuanāgang. Esau nung itlinga dāungaiang, waigen Jacob nung hāada lā idjāni. Esau dāungaiang althlā Shānungetlagidas kum lā an kwutungē lāngangang. Shālānā Jacob kwōyādaiang il kwutungē lāngāni althlā. Shālānā Esau kwutungē dāungas kāngang altsilth tliga kwan il gūdaiang, waigen kin lā kwan ishin. Jacob Shālānā kilth kingān waugāngang, altsilth Esau giē tligē kwan an lā il itlagidēlthtaiang, waigen lā da il tlāedangang. Yenkien Esau giē kinigē wautliwan il istaiang, altsilth Esau lā an kätliylthdaiang. Esau lā an kätliyildung yūanāni althlā, tliga jinga ā il kautang.

Tada kwan gūd tliga jinga gu il idjāni. Tada kwan ilsi silid hinū nung angelgas il shūtaiang: houftang lth tliga unga gwi stilth, Shālānā dung alth stung gīi ungkasēsi althlā. Jacob kingān idjāni. Singyā swaunshung gūd nung angelgas il kāngang. Jacob kum lā ga lthwaugaangang, waigen hinū il shouan: kum dī dung tlaoulthlāgelthānsken kum tliku dī stāhā dung kaiit tlingē kāng gaangung. Waigen anung angelgas tliku il shouan kingān waugang. Shānungetlagidas il kēyi gushoutka langa il istaiang lā an il kwutungē lāgāni althlā. Wēata Israel hinū il kēyang, waigen Israel hādē wautliwan an il aungāgung. Shantlan

wautliwan gūd tliku lā il shūtas kingān waugē Jacob istakwudung giŋgangang. Jacob touilung lā yūangāgang, waigen Esau touilung dāunga odzouāni. Kin dāunga isken ga dāungas ge ishin kum ga dī istatlāngung hinū Shālānā shouan. Laou shouan, dī an dalung kwutungē lāsken dalungan ishin dī kwutungē lāshang. Juiē isken kungē ishin kaiēlthta ishin il taoutlaiang. Yenkien Shānungetlagidas kin dalung kingsa wautliwan tlaoutlaiang altsiilth an il itlagidāgung. Itil lasken Jacob kingān itil kēyi kōgīna las gūd il kālunghang. Esau kingān itil kwutungē dāungastlo ā kin lā isis wautliwan talung gūdāshang. Ān lth kutungātoo waigen wēata kwutungē unga lth stilthto. Shānungetlagidas adshi tligē kwōyād yūanan, waigen kit unga swaunshungs hēlk ga il istaiang dalung hagunan il kwōtalēanā. Kashintlou il kit itil hagunan kwōtalang ūdjang? Itil dāungas stāhā itil il kagindiē da il kwudangāni althlā itil hagunan il kwōtalang. Lā talung kwōyād-tadzing itil il kwōyāda tlāgangāni althlā. Tlan lā swaunan itil dāungas hagunan kwōtalang, waigen lā talung kwōyā-dastlo, shantlan wautliwan itil hēningaskialk Jacob kingānu itil kwutungē lāshang: waigen tlistluan itil kwōtalkastlo tliga lā Jacob ga il istagāgang kingān tliga lā ishin itil ga il istāshang shāgē kingdomgē gūā.

## LESSON VII.

### JOSEPH. PART I.

Jacob kitilung klāalth wok stangang, waigen Joseph tuana agwaiang. Joseph tada klāalth wok chigwau ēlthstlo, kwaialung alth lamatoē il kēsitang. Jacob kitilung wautliwan telgu Joseph kwōyādaiang, altsiilth il kwaialung lā an kāuiyilda yūanan. Yenkien Jacob Joseph an kwutungē lā yūanan, waigen kōdets lā yūan lā an il tlaoutlaiang. Tlistluan il kwialung adshi kōdets kāngang tlo lā telga il kifouang. Singyā swaunshung gūd il kungaiang. Juiē isken, kungē ishin, kaiēlthta klāalth wok ga swaunshung ishin lā kwollo hetgwi kwaugulthtang il kungaiang. Juiē il aung kingānu

ēdung: kungē il ou kingānu ēdung, waigen kaiēlthlā klāalth wok ga swaunshung il kwaialung klāath wok swaunshung kingānu ēdung.

Singai an aung unga ga il shūtaiang, waigen il kwaialung ishin, waigen il ou ishin. Il aung hin hangtlan shouan: lthkin, dung kwudungstlo dung aung iske., dung ou ishin, dung kwaialung ishin, dung kwollo hetgwi kwaugulthtāsang gu dung kwudung us? Kāhano: kum dung kwollo hetgwi talung gwaugulthta tlingāngung. Houshen il kwaialung lā an kätliylthdaiang, waigen il ou il gūshūs tuman lā kāngang.

Wadlu il kwaialung tuman lamatoē kētsitang Shechem tligē gu. Jacob Joseph ltha tlā kil kaiitang. Joseph ltha tlā kaiitang. Nung hāada swaunshung il kangang, waigen hin lā il shūtaiang gūshgu dung istatlang? Joseph hin hangtlan shouan: kwaialung kāngē da dī kwudungung. Di ga lth shūda gionk lamatoē il kētsitwas gēā. Waigen anung itlinga hin il shūtaiang: Dothan tligē ā il istiēdouang. Houitang Joseph ltha tlā kaiitang ltha an il kwutungē lāgāni althlā. Tlistluan il kwaialung wadshgwi agwi lā il kingouang tlo hin ltha shouan: nung kungaḡuni kätlang, nung kungaḡuni katlang. Yenkien kungas wautliwan an il kungalē gāngung. Lā talung tiadzing, yenkien itil an il dāungang. Nung kungalē talung tiadzing, waigen kintiga dāunga il tiaiang aung unga ga talung shūtāshang. Hinū Reuben shouan: kum lth il tiāngu yenkien itil tuanas il iching. Kin hēlas ai lth il kätidzo, waigen kum lth il tiāngu. Reuben il hēningē da kwudangang. Tlistluan Joseph kwai-alung an kätlāgang tlo kōdets lā yūan langa il istaouang ken kin hēlas ai lā il kätasouang. Kin hēlas ai lā il kätasouang silid nē gwi unga il stilthwāsken an lā ga lthtanūouang il kwutungē lā yūanouāni althlā.

Nung waddalēgas Egypt tligē ā silthkang stilths il kingouang tlo hin ltha shouan: anung hāadas ga dung istatla? Anung waddalēgas hin shouan: āng, lā lth dāashang; waigen lā saoutka dālā klālē stung ltha ga il istaiang. Joseph Egypt tligē ā il halkaiitang. Reuben lā alth ltha giadas kum anūshitāngang. Yenkien Joseph kwōtalang



hin il kwudangang. Kimptiē swaunshung il tfouang, waigen Joseph giē kōdets lā yūan kimptiē ai ā il istaouang. Adshi kōdets aung unga ā il chīdouang. Yenkien il aung kwutungē sti yūanan waigen- hinū il shouan : kintiga dāunga il tiaiāng : wēata dī kit kwōtalgun, waigen kum houshen Joseph lth kingāngsang. Dī touilung las, Joseph kwaialung dāung yuan odzouang. Joseph tuana agwaiāng, waigen lā an ltha kwutungēstīgāngang.

Egypt tligē gu nung itlagidas Joseph dakgang nung waddalēgas gāā. Shānungetlagidas tuman Joseph kāngang. Nung itlagidas lā il itlagidēlthtaiāng, waigen Joseph tuman kin wautliwan kāngang. Shantlan swaunshung gūd anung itlagidas chā hin shouan : Joseph, dung an dī kwutungē lāgung : dī tlāl kum ādlun isāngung : dī alth dung tidiēu lāgung. Joseph hin hangtlan shouan : Shālānā ga dī lthwagaḡungung, altsilth kum dī kwutungē kinkaladāngung. Kum Joseph anung chadas kilth kingān isāngāngang Shānungetlagidas giē kingwogungē il kwoyādaiang althlā. Houitang anung chadas lā an kātliyilthdaiang, waigen il kilthkadungēdang. Hinū il shouan : yenkien Joseph dāung yūāngang, waigen dī alth tidiē da il gwulgun. Tliku il chā shouan anung itlagidas yetaiāng, waigen kētsit nai ā lā il istaiāng. Houshen Shālānā lā alth stangang kētsit nigē ā, waigen kētsitnē an nung itlagidas Joseph kētsit nai ā lth hāada isis an itlagidēlthtaiāng.

Wadlu Pharaoh Egypt hāadē an itlagidēalang, waigen lth hāada stung kētsitnē ā il istaiāng. Baker isken Butler ishin hin il kēyāouang. Baker Pharaoh an shibili tlaoutlaiāng, waigen Butler winegē lā ga il istaiāng. King Pharaoh lā an kātliyildouang altsilth kētsitnē ā lā il istaouang. Singyā swaunshung gud Baker isken Butler ishin kungaiāng. Baker basketgē ā lth'ūnilth Pharaoh ga il istāng il kungaiāng. Ashge basketgē ā shibili lā il kwauaidung il kungaiāng. Ettit kwan yuan shibili langa kwolthtang, waigen il itlagida lā an kātliyildāng il kungaiāng. Butler ishin Pharaoh ga winegē unga houshen il istang, waigen lā an il kwutungē lūng il kungaiāng.

Singaian Joseph Baker kāngang. Hinū Joseph shouan: Baker kashintlou dung kwutungēsti tlidzūgung? Dī ga lth shuda waigen dung ta lth tlātasang. Tliku il kungaiang wautliwan Joseph ga il shūtaiang. Joseph hin hangtlan shouan: tliku dung edasēs dung kungaiang: basketgē ā lth'ūnilth shantlan lth'ūnilth kingānu ēdung; waigen singē lth'ūnilthstlo Pharaoh dung dunglīdashang, altsilth Pharaoh dung an kātliyildāng dung kungaiang. Wadla Joseph Butler kāngang, waigen il kwutungē lā yūanan. Hīn lā il shūtaiang: Butler, kashintlou dung kwutungē lā tlidzūgung? Waigen tliku il kungaiang lā il shūtaiang. Joseph hin lā il shūtaiang: tliku dung edasēs dung lth shūtāshang: houshen Pharaoh ga winegē langa dung istāshang, waigen dung da il tlātasang, altsilth Pharaoh dung an kwutungē lāng dung kungaiang. Tlistluan Pharaoh dung tatlātstlo dī ishin ta lth tlāt, waigen kēsit nē stāhā dī lth kaginda. Dī touilung: Joseph Butler kwutungē wau il kil saaskidang, Baker kwutungē tlou il kil sti yūanan. Singē lth'ūnilth hēlouang silid tliku Joseph shouan kingān Pharaoh wangang. Baker il dunglīidang, waigen houshen King Pharaoh ga winegē langa Butler istaiang.

Kashintlou Shānungetlagidas Joseph tatlāt ūdjang? Joseph kwutungē lā yūans il kāngang, altsilth lā alth il stung gūgāngang Egypt tligē gwau. Kistho Joseph aungu idjan? Jacob lā an aungāgang. Kashintlou il kwaialung Joseph telga kingūdjang? Kitilung wautliwan telgu Joseph aung lā il kwōyādaiang altsilth lā telga il kingouang. Wēata Joseph kingān kwutungē unga lth edo waigen dalung da il tlātasang. Kūwē las gūd lth istiēdo waigen Hants Las dalung kin las skadadāshang. Kin dāungas gūd talung istalsken Joseph kwaialung kingānu itil edasang. Kingwo-guns kingān kum talung wuanstlo hetgwaugē ā talung isisang. Jesus hetgwaugē stāhā itil kagindāshang lā ā singelth kang talung gūshūstlo. Laou itil toui lā yūangung. Hetgwaulana itil an kātliyildungsang kūwē las gūd talung istiēdsken. Lth hāada tagwias telgu Jesus tagwiāgung. Lā dalung yetasken kum lth lthwaugaangu, dalung il kwōyā-

dasēs althlā, waigen shā tligē dalung an il tlaoulthlāgelgun; altsilth wēata ān lth kutungātoo. Lā lth yeto, waigen shantlan wautliwan gud tuman dalung il kingasang. Lā ā singelthkang lth gūshū waigen dalung alth il stung giŋshang. Shantlan wautliwan gūd itil dāungas hansta talung shūadzing, waigen Joseph kingān ga dāungas gē stāhā itil il kagindāshang. Hinū Joseph shouan : Tlan Shālānā swaunan tagwiāgung : il kil talung yetadzing, waigen tlistluan itil kwōtalkāstlo Joseph alth itil hēninga giŋshang sha tligē gwau.

# LESSON VIII.

## JOSEPH. PART II.

SINGYĀ swaunshung gūd King Pharaoh kungaiang. Hinū il kungaiang : hanlth shēng yūans il kāngang, waigen mūs-mūs aia chigwaus kunē lā yūan tāgāng il kungaiang. Houshen hin il kungaiang : hānlth shēng tlinghutiga il kāngang waigen mūsmūs ziā chigwaus il kāngang, waigen kum gē tāangāngang. Mūsmūs ziās gē chigwau ga aias gē chigwau tāodzūung il kungaiang, waigen il kwutungē kwidistlaiang. Butler Joseph kāngang kētsit nigē ā. Butler Pharaoh kwutungēsti yūans kāngang, waigen hinū il shouan : dī itlagīda, kashintlou dung kwutungēsti tlidzūgung? Pharaoh hin shouan : lth kungas stungun, waigen stungan da dī kiskitung Butler hin il shūtaiang : dī itlagīda, Joseph kētsit nai ā iching. Laou kutungāgung, waigen kungas wautliwan an il ūnshitung Shālānā lā alth stungs althlā. Pharaoh hin shouan : kētsitnē an nung itlagidas ga lth shūda Joseph kāngē da dī kwudungung. Waigen houftang Joseph Pharaoh an kātlāgāng.

Hinū Joseph shouan : Pharaoh dī an dung itlagidāgung, waigen dung ta lth tlātasang. Tliku kin hagunan dung kungas dung lth shūtāshang, Shānungetlagidas dī anūnshitalthtasi althlā. Hin dung kungaiang : mūs-mūs aia chigwaus dung kāngang waigen kunē lā il tāouang. Houshen dung kungaiang, waigen mūsmūs aiā chigwaus dung kāngang, waigen kunē kum kāng gaangang. Mūsmūs aia chigwaus

tada lā chigwau kingānu ēdung, waigen tou inastla kwana-sang. Tada lā chigwau hēlōstlo kum tou kāng gaangshang. Mūsmūs ziā chigwaus tada dāunga chigwau kingānu ēdung, waigen kum tou inastlāngshang. Wēata kum tou tuman dung kingānsken dalung kwōtalthka odzūashang tada lā chigwaus hēlōstlo tou ishin hēlōasang.

Tliku Joseph shouan kingānu edāni. Tada lā chigwau gūd tliga wautliwan gu tou kwan yūanan: waigen siliā kum tou kāng gaangāni. Houshen hinū il shouan: Pharaoh, mūsmūs ziā chigwaus ga aias gē tāodzūung dung kāngang. Tliku edasēs dung lth shūtāshang. Tad dāunga chigwau gūd kum tou inastlāngshang, waigen tou wautliwan lth hāada tāungkashang, waigen ltha kwōtalthkāshang. Wēata tou tuman lth king, waigen tlīstluan tada lā chigwau hēlōstlo kum dalung kwōtalthkāngshang. Tliku Joseph shouan an Pharaoh kwutungē lāgāng. Hinū il shouan: Joseph, sing dung ā lth killāgung, waigen wēata dung kutungas an dī ūnshitung. Ketsitnē stāhā dung lth kagindāshang, waigen dung lth itlagidēlthtāsang. Egypt tligē gu tou wautliwan tuman dī nā lth king. Egypt hādē an dung itlagidāgung. Tliku Pharaoh shouan kingānu il waugang, waigen tada lā chigwau gūd tou kwan yūan waddanē ā unga il istaiang.

Tada lā chigwau gud hinū Joseph shouan: Egypt hādē, dī kil lth kwudungo: wēata tou dalung an kwangung, altsilth hinawē dī ga lth isto, waigen tada lā chigwaus hēlōstlo kum dalung kwōtalthkāngshang tuman tou dalung an lth kingasēsi althla. Kingānu ltha waugang, waigen tou kwan yūan waddanē ā unga il istaiang. Ashgē tada lā chigwau hēlouang tlo tliga wautliwan gu kum tou isāngang Tlan Egypt tligē gu swaunan tou idjāni, Joseph tada lā chigwau gūd tou kwan yūan waddanē ā unga istaiang althlā. Shechem tligē gu Jacob isken il kitilung ishin kum tou il dāangouang, waigen il kuniskidēgētlouang.

Egypt tligē gu tou kwan is an il ūnshitalthtlouang tlo Jacob kitilung Egypt tligē ā kil istiēdang tōu il dāhouēanā. Joseph giē touwe kwoyā yūang, waigen il itlagidas dālā gwikāēlth yūanan, kuitan ishin, mūsmūs gē ishin, tliga kwan

kwana-  
ngshang.  
u ödung,  
tuman  
tada lä

chigwau  
liä kum  
Pharaoh,  
ängang.  
chigwau  
wan lth  
Wëata  
hëlöstlo  
ouan an  
ph, sing  
s an di  
waigen  
utliwan  
dägung.  
tada lä  
ang.

hädäde,  
ängung,  
igwaus  
dalung  
gen tou  
tada lä  
ängang  
tada lä  
althlä.  
tou il

ang tlo  
ouëanä.  
s dälä  
a kwan

ishin. Joseph an tou kwan yüanan, waigen il kwaialung Egypt tligē gu istlāgang tou il dāhouëanā kum tou Shechem tligē gu käng gaangāni althlä. Tlistluan Egypt tligē gu ltha istlāgang tlo kum Benjamin ltha alth isāngang. Joseph waigen hin shouan: yenkien dalung dāungang, Egypt hädē kwōtalthkāsēs kängēan dalung istlāgāni althlä. Hinū il kwaialung shouan: yenkien itil lä yūangung: itil aung Shechem tligē gu iching, waigen itil tuana agwi is itil aung kwulth iching, altsilth talung klāalth swaunan ādlun gu istlāgang. Itil ta lth tlāt waigen tou itil ga lth ista. Yenkien itil aung kitilung klāalth wok stangang, waigen itan kingān itil tuan kwōtalang, altsilth wëata itil aung kitilung klāalth wok swaunshungung. Houshen Joseph hin shouan: yenkien hansta lth shū, kashintlou Egypt tligē gu dalung istlou ūdjang? Hin hangtlan lä il shūtaouang: tou dahoniē da itil kwudungstlo talung iching kum tou Shechem tligē gu käng gaangsi althlä. Kum tou alth itil ga dung waddānsken itil kwōtalthka odzūashang. Joseph kwaialung anūnshitālang ken kum il kwaialung tlo lä anūnshitāngang. Hinū il shouan: nung swaun di ga lth isto, waigen kētsit nai ā lä lth istāshang. Wëata dalung swaun di kwulth lth is, waigen tliku lth shūs kingān dalung waustlo dalung kil lth yetāshang.

Lä kilth kingān il wauouang, waigen Simeon lä ga ltha istaiang lä kwulthlu il isgēanā. Wadia Joseph hin shouan: wëata tou dalung ga lth istāshang, waigen houshen althgwi dalung istlāstlo tuan unga katdung lth isto Benjamin kängē da di kwudungsi althlä. Tlistluan silthkang tuan unga alth ādlun dalung stilthtastlo, kētsitnē stāhā Simeon lth kāgwūlthtāsang. Joseph itan hin kitzadalung shūtaiang: dälä gwaulē ā lthanga silthkang isto, waigen tlistluan gwaulē unga il kingwausitlo houshen dälä unga il klouwāshang. Kingān ltha wauāng. Houān nē gwi unga ltha stēlangundang gwaulē hēst unga il tlāadouāni ken dälä unga houshen il klouang, altsilth yenkien il kwutungē lthwaug yūanonang.

Houshen Jacob isken il kitilung ishin kum tou dāangang,



waigen houshen Jacob kitilung Egypt tligē ā kil istiēdang, tou ltha dāhouēanā. Houitang Judah hin shouan : di aung, hinū anung itlagidas shouan, kum Benjamin dalung alth isānstlo kum houshen tou dalung ga lth istāngshang. Wēata Simeon kētsit nai ā iching ; waigen anung itlagidas hin itil shūdagun, houshen dalung stilthtlastlo, waigen kum dalung tūanas lth kingānsken kum tliku Simeon dalung ista tlingē kāng gaangung. Houshen Reuben hin shouan : tlaou tuman Benjamin kingasang, waigen kum houshen silthkang il stilthānstlo di kitilung stung lth ista waigen il lth tlitawang. Jacob hin shouan : Benjamin lth isto, waigen Egypt tligē ā lth istiēdo, waigen tou lth dakwoo, waigen kum itil wautliwan kwōtalthkāngshang.

Houshen Joseph kwaialung Egypt tligē gu istlāgang, waigen houshen Joseph tou ltha ga istaiang. Kētsitnē stāhā Simeon ishin kāgwālang Benjamin kwaialung alth idjāni althlā. Houshen Joseph hin kitzadalung shūtaiang : kiagin dālā skatlangwē Benjamin giē gwaulā kū i lth isto. Tliku Joseph shouan kingān ltha istaiang. Tou kwaialung ga il istaiang, waigen kūwē gūd unga ltha istiēdang. Kum washtjingāngundang Joseph hin kitzadalung shūtaiang : ltha tlā lth istiēdo, waigen hin lth shūū : itil itlagida giē dālā skatlangwē dalung kwolthtagun. Tliku Joseph shouan kingānu ltha waugang. Hin ltha shouan : yenkien wēata dalung an itil ūnshitung, waigen lth hāada dāunga dalung iching. Itil itlagida gie dālā skatlangwē dalung kwulth iching. Reuben hin shouan : itilū lāgung, waigen kum dālā skatlangwē talung kwoithtaangun. Nung giē gwaulē ā dālā skatlangwē dalung kiasken dalung alth il stilthasang kētsitnē ā lā dalung istiēan. Benjamin giē gwaulē ā dālā skatlangwē il kioung, waigen il kwaialung kwutungēsti yūanan, waigen houshen lā alth il stilthtlaouang.

Egypt tligē gu ltha istlāgang tlo Joseph ltha kāngang. Hinū il shouan : yenkien dalung kwolthtas an di ūnshitung. Kētsitnē ā dalung lth istaodzūashang kiagin dālā skatlangwē dalung kwolthtaguni althlā. Hinū Judah shouan : di itlagida, itil kalthshint lth kwutung, waigen kum Benjamin

kêtsitnē ā lth istāng. Kum dālā skatlangwē dānga gwaulē ā unga talung istaangūn : yenkien itil tuanas kum dungiou skatlangwē kwolthtaangūnēgwau. Skatlangwē itil tuan dānga kwolthtaiang dung kwudungsken kêtsitnē ā lth di ista waigen lā lth kaginda. Itil aung ta lth tlāt waigen di tuan silthkang stilthta. Kum silthkang il stilthtānsken houftang itil aung kwōtalashang.

Joseph sahailthlaiang ken hinū il shouan; dī kwaialung, kum kwutungē unga lth kwīdistlāngu; tlaou Benjamin giē gwaulē ā skastaagūnēgwau, waigen Joseph tlaou iching. Kum dī kwotalānsa an dalung ūnshitē da dī hwudungung. Dalung kalthshint lth kwutungsang Shānungetlagidas tuman dī kingsa althlā, waigen Egypt hāadē an dī il itlagidēlthtaḡun. Kitzadalung hin il shūtaiang: istiēdūltha, dī kwaialung ādlun iching, waigen singelthkang gūshūē da dī kwudungung. Waikingān il wauouang. Singelthkang il gūshouang silid houftang Joseph tōu kwan yūan ltha ga istaiang: kin giandas ishin: dālā ishin. Tlan ltha lthtanouang tlo waigen kin wautliwan tlanēlang glu kwaialung il skwuntlaiang waigen hinū il shouan: aung unga gwi silthkang stilthto: kuitan lth isto, halthānounwē ishin, waigen houftang aung unga lth shūdo kum dī kwōtalānsa Shālānā tumān dī kagin-daguni althlā. Hin lā ga lth shūdo: dī tagwiāgung waigen Egypt hāadē an dī itlagidāgung, altsilth dī ā lth isso wai-gen Egypt tligē gu lth isgiū. Pharaoh tligē kwan dalung ga lth istadāshang waigen tou dalung ga lth ista gīsang.

Il kwaialung wautliwan kwutungē lā yūanan waigen sing lā ā ltha killāgāng. Awolth Joseph juiē isken kungē ishin kaiēlthta klāalth wok ga swaunshung lā kwollo hetgwi kwaugulthtang il kungaiang. Lā an ltha kātliyilthdaiang ken hin ltha shouan: kum dung kwollo hetgwi talung kwaugulthtāngsang. Wēata tou istiē da il kwudungouang tlo lā kwollo hetgwi il kwaugulthtaouang, waigen hinū il shūouang: itil itlagida itil ta lth tlāt, waigen tou itil ga lth ista. Altsilth tliku Joseph kungaiang kingān yenkien il kwaialung wauḡangang. Tlistluan silthkang il stilthtlaouang tlo tliku Joseph shouan kingān Jacob ga il shūtaouang. Il

kwutungē lā yūanan, waigen Jacob isken, il kitilung ishin, il kitzadalung ishin, Egypt tligē ā lā dungalth istiēdang. Lth hāada klālē chigwau Jacob alth stangang. Tlistluan Joseph tagwias il kāngang tlo Shānungetlagidas ā il killā-gang. Joseph hin shouan: awolth dī an dalung dāunga yuāngun, waigen wēata dalung an dī kwutungē lāgung, altsilth kum lth lthwaugāngu. Dalung kalthshint lth kwutunḡun waigen King Pharaoh dalung kwōyādung. Tliga yūan dalung ga lth istāshang waigen lamatoē ishin, waigen lamatoē dalung kētsitashang. Goshen tligē Pharaoh ltha ga istaiang, waigen gaigu lamatoē tuman ltha kētsitang. Shantlan wautliwan gūd Joseph tou ltha ga istagāngang, waigen tuman ltha il kāngang. Tada dāunga chigwau hēlouang tlo Egypt tligē gu tou kwanan, Joseph tuman tou wautliwan kāngāni althlā. Yenkien Joseph kutungā yūanan, waigen tada dāunga chigwau gūd tou Egypt hāadē ga il waddang, waigen dālā lā gwikāēlth kwan yūanan.

Kistho Joseph idjan? Jacob kitu il idjan, waigen Egypt hāadē an il itlagidēalang. Kistho tuman il kāngang? Shālānā tuman il kāngang, waigen dalung kwutungē lāstlo Joseph kingān tuman dalung il kingasang. Joseph kingān kwutungē unga lth edo waigen Shālānā dalung ta tlātasang. Jacob kitilung klāalth wok stangang, waigen Joseph tuana agwaiang. Kum washtjingāngundang aung unga an il itlagidēalang, il ou an ishin, il kwaialung an ishin, Shānungetlagidas il kwutungē skwunas kāngāni althlā. Il kutungā yūanāni althlā Egypt hāadē an il itlagidēalang. Joseph kingān Shālānā ā singelthkang gūshū, waigen ga dāungas gē stāhā dalung il kagindāshang. Wēata lā lth yeto, waigen Joseph kingānu dalung kutungāshang. Kum kin ed hūtsu Shālānā an saalgangung, altsilth itil dāungasken kum dāungas unga saalgē talung istakwudungāndzing. Itil kwutungē wautliwan il kingung. Itil kwutungē dāungasken an il ūnshitung. Shantlan wautliwan gūd itil il king gīgung. Kingwoḡuns langa kingān talung wausken itil gwikāēlthasang Joseph kingānā. Itil wautliwan il tlaoutlaiang altsilth itil an il itlagidāgung. Kin wautliwan lāgiou iching. Kin

wautliwan il tlaoutlaianū lāgung. Yenkien il tagwiā sitlthl-  
gung. Shālānā giē kūwē gūd lth istalo waigen hēninga ed  
swaunung dalung ga il istāshang. Kistho kin an kaldunga  
tlaoutlang? Tlan Shālānā swaunan kin an kaldunga tlaoutla  
giīgung. Adshi tligē isken kin dalung kingsa wautliwan  
ishin il tlaoutlaiang. Kistho tagwia isken kin giandas ishin  
althling ishin touilung ishin tou ishin hānlth ishin dalung  
ga istaḡungung? Tlan Shālānā swaunan kin wautliwan  
dalung ga istaḡungung, waigen tuman dalung il kingung:  
altsilth kin an kaldunga il ista giīgung sing lā ā lth killou  
waigen Joseph kingānu ga dāungas gē wautliwan stāhā  
dalung kaḡunasang.

### LESSON IX.

ISRAEL HĀADĒ EGYPT Tligē GU IDJAN.

TLISTLUAN Joseph kwōtalang tlo il touilung kwanēlth yūanan  
Shālānā tuman ltha kāngāni althlā. Egypt tligē gu nung  
itlagidēlthsken Pharaoh hin il kēya giīgungang: altsilth  
Joseph an nung itlagidas Pharaoh hinū il kēyaiang. Joseph  
kwōtalang silid houshen Egypt hāadē an Pharaoh itlagidēa-  
lang. Atlanis an ishin kwōtalsken an lā saoutkas nung  
itlagidasken atlanis ishen Pharaoh hinū il kēyaiang, altsilth  
tada klālē kwan gūd Pharaoh Egypt hāadē an itlagidas hin  
kēyāgangang. Tada lagwau klālth wok lagwau klēlth hēlou-  
ang tlo Israel hāadē kwan ga Pharaoh lthwaugaiang. Israel  
hāadē lā an lthāangwilaiang, waigen kum ltha ga il giasou-  
āngangang: waigen tou lāsi kum ltha ga il istaāngangang.  
Tou skwūnas swaunan ltha ga il istaiang.

Hinū Pharaoh shouan: dī touilung, Israel hāadē lth  
skidungo: kum ltha dalung skidungānstlo houitang dalung  
giē tligē ltha kwolthtāsang. Tliku Pharaoh shouan kingānu  
ltha waūgang. Egypt hāadē Joseph touilung gidsgildasken,  
lthāangwil yūanūlthā hin ltha shūdaḡangang. Shantlan  
wautliwan gud Egypt hāadē an ltha lthāangwilgangang,  
waigen shantlan wautliwan gud Egypt hāadē ltha an kwu-  
tungē dāungaiang. Kum ltha ga ltha giasouāngangang ken  
hin ltha shouan: lthāangwil yūanūltha, lthāangwil yūanū-

lthā, dalung hāgā giīgung : yenkien dalung talung skidungshang dalung gwou yūansi althlā. Houshen hinū Pharaoh shouan : lth chāada kiāsi, dī kil lth kwudungo : tlistluan nung hāhutsu lthkais dalung kingtlo houítang lth il tío, kumu klingān Israel hāadē itlansida hudila kiīē ga dī istatlangung. Tliku Pharaoh shouan kingānu ltha wauģang. Ltha itlansida hudilas ltha tlitaodzūģung, waigen lth chāada hudila lthkais tuman ltha kagindaģangang. Yenkienu Israel hāadē wautliwan kwutungēsti yūanan.

Yenkien anung king gas dāungaiang. Kum Joseph an nung itlagidāģang kingān il edāģang. Joseph an nung itlagidāģang Shālānā ā killā giīgung. Anung itlagida kwutungē dāungaiang, waigen Israel hāadē an il kātliyilda giīgung. Shālānā lā an kwutungēstigangang ken hinū il shouan : Egypt tligē stāhā Israel hāadē lth kagindāshang. Israel hāadē ltha skidungāģang tlo Shālānā ā singelthkang ltha gūshūģangang, waigen kum Shālānā da ltha kiskitāģang. Shantlan swaunshung gud Moses tlakaiang. Lā tlakaiang tlo kung ki lth'ūnilth il ou il saalgadaiang, waigen Egypt chāada kiās kum lā tlakaias an ūnshitāģang. Kung ki lth'ūnilth hēlouang tlo basketgē ā il ou Moses istaiang, waigen tungē kwulth yekī houítang lā il istaiang. Washt ed kouit Pharaoh gwudjan tungē stāhā kātlagang tlo lā il kāģang. Basketgē il kiāiang, waigen wast il daastlaiang silid Moses il kāģang. Lā alth il kwutungē lā yūanan, waigen kitzadalung hin il shūtaiang : Moses lth isto, kiagin nai ā lā lth gliido tuman lā lth kāģēan. Pharaoh gwudjan anung hāhutsūs tungē stāhā kagindaiang, altsilth Moses hinū il kēyāģang. Tuman Moses il kāģang, waigen schoolnē lāsi ā lā il istaiang, altsilth houítang il kutungāģang. Kin wautliwan an il ūnshitang, kōģina kwan ishin. Tada klālē stanshung il ēlthstlo Egypt hāadē swaunshung il toui skodas il kāģang. Houítang Moses tou unga ta tlāēdang, waigen nung Egypt hāadas il tiaiang. Egypt hāadē tliku il waus anūnshitāģang, altsilth Moses tliga jinga ā kaiítang, Egypt hāadē ga il lthwang yūanāni althlā. Tliga jinga gu tada klālē stanshung gūd lamatoē il kētsitang. Tada

klālē stanshung hēlouang tlo kīt yūan ōs Moses kāngang, waigen ā il kāgang. Tlistluan il dūungāēlāni tlo hinū Shānungetlagidas il shūtāiang: staskoḡa lth unga dāng giouk dung giansi tligē lā yūansi althlā. Moses kingān waugāng. Hinū Moses shouan: kīstho dung iching? Yenkien Moses kwutungē kladskaēlang; waigen hinū il shouan: houitang dī ga lth shūda, kīstho dung iching? Hangtlan Shālānā hin il shūtāiang: dung itlagīdou dī iching. Houitang Moses lā ā singelthkang gūshouang ken hinū il shouan: wēata O Shālānā dī ta lth tlāt yenkien dī kuniskidē gāgung: dī kalthshint lth kwutūng, waigen tuman dī lth king Egypt hāadē ga dī lthwaug yūansi althlā.

Shānungetlagidas hin shouan; dī tagwiāgung, lth hāada wautliwan lth tlaoutlaiang, waigen kin wautliwan ishin. Egypt hāadē lth tlaoutlaiang waigen Israel hāadē ishin. Egypt hāadē skidungē kum lāngung, altsiilth Israel hāadē ta lth tlātasang. Egypt tligē stāhā ltha lth kagindāshang, waigen dung ga dī istatlang, altsiilth kwutungē unga lth kladskāda. Hangtlan Moses hin shouan: O Shālānā, dī kuniskidē gēlgung, waigen kum dī itlagidāngung. Shālānā hin il shūtāiang; dung ga dī istatlang, waigen dung ta lth tlātasang, waigen Israel hāadē an dung lth itlagidēlthtāsang ltha dung kagindiēan. Pharaoh lth kingung, waigen Israel itlansida hudila tliitiē da il kwudungung. Wēata Israel hāadē ta lth tlātasang, altsiilth kwutungē unga lth kladskāda, waigen ltha an dung lth itlagidēlthtāsang. Egypt tligē gwi lth stilth, waigen Israel hāadē lth kaginda. Hangtlan hin Moses shouan: awolth nung Egypt hāadē lth tiigun, waigen dī ltha kingstlo dī ltha tāsang, altsiilth ltha ga dī lthwaugāgungung. Houshen Shālānā hin il shūtāiang: kum Egypt hāadē ga lth lthwaugāng, dung alth lth stungasēsi althlā. Egypt tligē gwi lth stilth waigen hin Pharaoh ga lth shūda; houitang Israel hāadē wautliwan Egypt tligē stāhā lth kil istiēda; waigen kum ltha il kil istiēdānstlo, houitang Egypt tligē gu kin an kaldunga lth tlaoutlāshang. Kin an kaldunga lth istastlo Pharaoh kwutungēstiasang, waigen dī touilung il kil istiēdashang.



Tlistluan Moses kwutungē kladska ēlang tlo Egypt tligē ā il kaiitang, waigen tliku Shālānā shouan kingān Pharaoh ga il shūtaiang. Pharaoh kwudangang tlo hinū il shouan : Shānungetlagidas ginggangan dī an ēdung. Kistho il iching ? Kum dī kingān il itlagidāngung isi ishin kum il tagwiāngung, altsilth kum il touilung lth kil istiēdāngshang. Yenkien adshi tligē yūan an dī itlagidāngung, waigen Egypt hāadē wautliwan an ishin. Hangtlan Moses hin il shūtaiang : lāgung, Shānungetlagidas dung kwutungē kil sti yūansang, waigen dung touilung ishin. Tlan lā swaunan itlagidāngung, waigen kum dung itlagida tagwiāngung ; altsilth il touilung wēate dung kil istiēdē lāgung. Pharaoh kātliyilthdaiang ken hinū il shouan : kum Shānungetlagidas ga dī lthwauga-angung, altsilth kum Israel hāadē Egypt tligē stāhā lth kil istiēdāngshang. Hinū Moses shouan : kum Israel hāadē dung kil istiēdānsken, kin an kaldunga dung kingstlo althlu dung kwutungē stiasang. Kistho lāgung ? Tlan Shālānā swaunan lāgung. Lth hāada wautliwan Pharaoh kingānu dāungang, waigen kum Shālānā kil ltha yetānstlo kum shā tligē ā ltha isāngsang. Shālānā alth talung kiānungstlo itil kwutungē il tlaāshang. Itil kwutungē lāgē da il kwudungung, altsilth kin wautliwan itil an il tlaoulthlāgelgun. Tlistluan kwutungē unga talung stiltastlo itil kwutungē lāshang. Kum kwutungē unga talung stilttānstlo, itil kwutungē gūashang Wēata dalung dāungas lā ga shūdo, waigen dāungas washt il kishūasang. Tlistluan dalung dāungas washt il kishūstlo dalung lāshang. Itil dāungasken kum shā tligē talung king-āngsang, shā tligē lth hāada lā swaunan an lāgung. Kum nung itlinga dāunga shā tligē gu isāngung. Shā tligē lth hāada lā alth stāougāgung, waigen lth hāada lā swaunan shā tligē gu iching. Shālānā lth hāada lā wautliwan an itlagidāgung. Lā gwi kwutungē unga dung isken dung touilung ishin stiltastlo, sīk ga dalung il istāshang, waigen lā kwulth dalung is gūasang. Shā tligē itzgē da dalung kwudungstlo, Shālānā kil lth yeto, waigen Israel hāadē lth kil istiēdo. Wai- gen tlan il gūshouang tlo Pharaoh stāhā Moses kaiitang.

LESSON X.

KINANKALDUNGAS.

SHĀNUNGETLAGIDAS hin Moses shūtaiang : Pharaoh kwutungē dāungas an dī ūnshitung : il lāgē da dī kwudungung, altsiilth kum houitang lā lth tiāngshang. Adātli singai gastlo, hānlth jingū lth giang, waigen hin lā ga lth shūda, kum houitang Israel hāadē dung kil istiēdānsken dī tagwia yūans an dung ūnshitalthasang. Waikingān Moses waugang. Pharaoh il kāngang,, waigen Pharaoh kum Israel hāadē kil istiēdē ga istatlāngang. Altsiilth Shānungetlagidas hin Moses shūtaiang : hānlthē saasgut waigen hānlthē wautliwan ai ēlthasang. Kingānu il waugang. Hānlthē il saasgutāni, waigen hānlthē ai ēlang. Skātlink wautliwan kwōtalthkaiang, waigen hānlth wautliwan skwūna ēlang. Kum hānlth skwuna ltha anilgangang, waigen ltha hutlāsitlo ai ā gūgungangang, altsiilth Egypt hāadē kwan sti yūangangang. Adshi kin an kaldunga Moses tlaoutlāgangang, waigen Pharaoh kwutungē dāungaiang althlā kum Israel hāadē il kil istiēdāngang.

Shantlan chigwau hēlouang tlo Shālānā hin Moses shūtaiang ; houshen Pharaoh ā lth kaiit, waigen hin lā ga lth shūda, kum dī touilung dung kil istiēdānstlo dī an ltha lthāangwilean lthkenkwustan kwanēlth yūansang. Waikingān Moses waugang, waigen Pharaoh kum Israel hāadē kil istiēdē ga istatlāngang. Houshen Shālānā hin Moses shūtaiang : wēata stlē unga lth tungē aiyāgulthta. Moses kingān waugang, waigen lthkenkwustan Egypt tligē alth stāougāgang ; waigen giouk Israel hāadē nāansgē swaunan lthkenkwustan kum kāng gaangang. Pharaoh kwutungē kwīdistlaiang. Houitang Moses ā il kaiitang ken hin il shouan : Shālānā ā singelthkang lth gūshū : lthkenkwustanē gūlthalth waigen Israel hāadē lth kil istiēdashang. Moses Shālānā ā singelthkang gūshouang, waigen lthkenkwustan wautliwan il hēlōdaiang. Tlistluan Pharaoh lthkenkwustan wautliwan hēlōs il kāngang tlo hinū il shouan : kum Israel hāadē wēata lth kil istiēdāng-

shang. Adshi kin an kaldunga Moses tlaoutla stangang, waigen Pharaoh kum kwutungē unga stilthtaangang.

Houshen Shālānā hin Moses shūtaiang; wēata kum Pharaoh lth tiāngshang, il lāgē da di kwudungung, il touiling ishin. Wēata kwiē lth skidusta. Moses kingān wauāng, waigen ski Egypt tligē askwan gu kwanōlth yūanan. Pharaoh touilung kutungas hin shouan; kum Israel hāadē dung kil istiēdānstlo, Israel hāadē an nung itlagidas itil tlita odzūashang. Houitang itil an il kätliyildastlo itil kwōtalkā odzūashang. Giouk Israel hāadē nāans gē swaunan kum ski kāng gaangang, Egypt tligē tlou ski alth stāougāgang. Shānungetlagidas kin an kaldunga lth'ūnilth tlaoutlaiang, waigen Pharaoh kwutungē dāungaiang althlā kum Israel hāadē il kil istiēdāngang.

Moses houshen Pharaoh an kätlāgang ken hinū il shouan: kum Israel hāadē dung kil istiēdānstlo houshen Shānungetlagidas kin an kaldunga tlaoutlāshang, waigen stlaldigwan dalung wautliwan inku kwanēlthasang, dīdan an ishin. Tliku Moses shouan kingān kum il wauangang, altsiilth stlaldigwan isken dīdan ishin kwanda yūanan. Pharaoh giē nē ā stlaldigwan kwan yūanan, waigen Egypt hāadē giē naai wautliwan stlaldigwan alth staouwāgang dīdan alth ishin: waigen tou wautliwan kin dāungādangang. Pharaoh kwutungē sti yūanan, waigen il touilung wautliwan ishin. Moses hin il shūdağangang: O Moses, Shālānā ā singelthkang lth gūshu, waigen stlaldigwan gūilthalth, waigen dung touilung lth kil istiēdashang. Kashintlou Israel hāadē kil istiēdē ga il istatlou ūdjang? Giouk Israel hāadē nāans gē swaunan kum stlaldigwan kāng gaangāni althla, waigen Shālānā lā telgu tagwias an il ūnshitang. Kashintlou giouk Israel hāadē nāans gē gu kum stlaldigwan isken dīdan ishin kāng gaang ūdjang? Shānungetlagidas tuman Israel hāadē kānggang altsiilth lthāgiou tligē gu kum stlaldigwan isāngang. Moses Shānungetlagidas ā singelthkang gūshouang, waigen stlaldigwan isken dīdan ishin hēlō odzouang. Tlistluan stlaldigwan hēlōs il kāngang tlo houshen kil unga il tlahus-taiang, waigen kum Israel hāadē il kil istiēdāngang,

Kum lāgē ga il istatlaiani althlā Shānungetlagidas hin Moses shūtaiang : haiēt sik lth ista, yenkien haiēt sik hou lth istatli, waigen Egypt hāadē wautliwan gugastlijou odzūashang. Kingānu Moses wangang, waigen Egypt hāadē gugastlijou odzouang. Yenkien ltha sti yūanan : kuitanē lthanga ishin, mūsmūsgē lthanga ishin, waigen kintiga wautliwan ishin. Adshi kin an kaldunga kwunast Shānungetlagidas Egypt hāadē giē mūsmūsgē tlasti yūangangang, waigen mūsmūs kwan kwōtalthkaiang : altsiilth Egypt hāadē kwutungēsti yūanan. Israel hāadē kum gugastlijou swaunshangang, waigen althlu Egypt hāadē kwan kwōtalthkaiang, mūsmūsgē ishin, kuitanē ishin. Shālānā tuman Israel hāadē kāngang il kil langa ltha yetaiāni althlā. Hinū Pharaoh touilung kutungas shouan : houitang lth Israel hāadē kil istiēda, Israel hāadē an nung itlagidas itil an kwutungēstis althlā. Pharaoh houshen kwutungē unga kladska ēlthtaiang, waigen tliku ga kutungas gē shouan kingān kum il wauangang.

Wēata Shālānā lā an kātliyildaiang, waigen hin Moses il shūtaiang : Pharaoh ā lth kaiit, waigen hin lā ga lth shūda, kum adātli Israel hāadē dung kil istiēdanstlo, katslang yūanda lth gwouondāshang, waigen sēoulthta ishin. Kistho kiak isisken katslang yūanda tiashang. Hinū Pharaoh shouan : kum Israel hāadē lth kil istiēdāngshang. Kum Shānungetlagidas ga dī lthwangaangung. Gingangan dī an il ēdung, altsiilth il touilung wautliwan lth tlitāshang. Hangtlan hin Moses shouan : lāgung, adātli washoutka kwutungē adda dung istāshang, waigen Shālānā ga dung lthwang yūansang. Yenkien kum kwutungē unga dung stilthtānsken Shānungetlagidas dung tiashang, waigen dung touilung wautliwan ishin ; wadla tliga kalat hāadē wautliwan tlan Shālānā swaunan tagwias anūnshitang. Kum Pharaoh kwutungē unga stilthtaangang, waigen singai an katslang yūanda gwououang, waigen sēouldangangang, waigen ishin hēlung yūangangang. Egypt hāadē wautliwan kwutungē tlakwid yūanan, waigen lth hāada tatilzu kwōtalthkaiang. Goshen tligē, giouk Israel hāadē nāans gē gu swaunan kum

katslang yūanda gwouwāngang, waigen kum gu sēouldāngāng, waigen ishin kum hēlungāngāng Shānungetlagidas tuman Israel hāadē kāngāni althlā. Pharaoh kwutungēsti yūanan, waigen houitang Moses ā il kaiitang, waigen hinū il shouan : Shānungetlagidas ā singelthkang lth gūshu, waigen katsūlingē gūlthalth, waigen yenkien Israel hāadē lth dāngashang. Hinū Moses shouan : adātith Shālānā ā lth gūshūasang, waigen adshi katsūlingē il tlagūilthasang. Adshi tligē kum dūngiou isānsu an dūng ūnshitē da dī kwudungung. Shānungetlagidas tliga wautliwan tlaoutlaiang, altsilth tliga wautliwan lāgiou iching. Egypt tligē il tlaoutlaiang, altsilth Egypt tligē lāgiou iching. Tliga wautliwan an il itlagidāgung, altsilth lā ga lth lthwauga, waigen dūng il kagindāshang. Moses Shālānā ā singelthkang gūshouang, waigen katsūlingē il tlagūēlāni.

Pharaoh kilthkadangang. Katsūlingē hēlōs il kāngang tlo, houshen kwutungē unga il kladska ēlthtaiang, waigen kum Israel hāadē il kil istiēdangang. Houshen an Moses Pharaoh ā kaiitang, waigen hinū il shouan : dūng kilthkadung gūis althlā Shānungetlagidas tliga wautliwan gu locustsgē isilthtāsāng, waigen locustgē kin tās wautliwan tāashang. Singaian locustsgē kwan yūan il kāngang. Locustsgē yen lth'alth kingānu edāni, altsilth kum juie ltha kingāngang. Locustsgē nē wautliwan ā kwan yūanan, waigen Egypt tligē locustsgē alth stāoungāgung. Kin ltha tās lthanga locustsgē tāodzouang. Wēata Pharaoh touilung wautliwan hin shouan : Israel hāadē lth kil istiēda, waigen ltha an nung itlagidas kum itil tlitāngshang. Pharaoh hin Moses shūtaiang : Shālānā ā singelthkang lth gūshu, waigen locustsgē il tlahēlōsken, yenkien Israel hāadē lth kil istiēdashang. Moses Shālānā ā singelthkang gūshouang ken locustsgē wautliwan hēlouang. Pharaoh locustsgē hēlōs kāngang tlo houshen kwutungē unga il tlaoulthdāungaiang, waigen kum Israel hāadē il kil istiēdāngang. Adshi kin an kaldunga kin an kaldunga stanshunga Moses tlaoutlaiang, waigen Pharaoh kum kwutungē unga stilthtaangang.

Shānungetlagidas houshen hin Moses shūtaiang; kum

Pharaoh dī touilung kil istiēdānstlo kin an kaldunga kalat lth tlaoutlāshang, waigen wadla lā lth tīashang. Kum Egypt hāadē kwutunge unga stīlthtaangang, waigen kum Israel hāadē il kil istiēdāngang. Halga kladska yūan Egypt tligē gu ltha ga il istaiang. Kum halgāgūns kingānu edāungang. Kum Egypt hāadē kiak kāgwulthāngang, waigen Egypt hāadē wautliwan lthwaug yūanan. Pharaoh tliku Shānungetlagidas ā singelthkang gūshūē Moses alth il kiānangang, waigen lā ā singelthkang il gūshouang; waigen houshen Shānungetlagidas halgas il tlan tlaēlāni. Tlīstluan Egypt hāadē halgas hēlōs kāngang tlo houshen Egypt hāadē wautliwan kwutungē unga tlaoulthdāungaiang, waigen Pharaoh kum Israel hāadē kil istiēdāngang. Giouk Israel hāadē isisgē gu kum halgaangāni, waigen Egypt tligē halgas alth stāougāgang. Adshi kin an kaldunga klāalth wok swansingū Moses tlaoutlaiang waukialk Pharaoh kum kwutungē unga stīlthtaangang.

Shānungetlagidas hin Moses shūtaiang: houshen ltha lth istakwudungsang, waigen siliā, Egypt tligē stāhā touilung lth kagindāshang. Israel hāadē ā lth kaiit, waigen hin ltha ga lth shūda: houitang kin wautliwan unga lth tlaēlthkin, Shānungetlagidas Egypt tligē stāhā dalung istiēdē ga istatlas althlā. Israel hāadē Shālānā kilth kingānu waugang. Singyāstlo, Shānungetlagidas Egypt hāadē wautliwan gie nē ā angel swaunshung kil kaiitang, waigen ltha kwaskida wautliwan anung angelgas tlitaiang. Yenkien Egypt hāadē kwaskida kwōtalthka odzouang, waigen kum nung Israel hāadē swaunshung kwōtalthāngang. Singaian Pharaoh kātluang ken Egypt hāadē wautliwan kwaskidas kwōtalthgias an il ūnshitālang tlo yenkien il kwutungē langa kātliyilda yūanan. Tlīstluan Israel hāadē Egypt hāadē wautliwan kwaskidas kwōtalthgas kāngang tlo, houitang Egypt tligē stāhā ltha istiēdang Egypt hāadē ga ltha lthwaugālāni althlā.

Pharaoh ga soldiers gē ltha tlā unga il kil istiēdang, Israel hāadē sīlthkang stelgē da il kwudangāni althlā. Tungē s'het ā ltha istalgangang, waigen Pharaoh giē



soldiers gē ltha tlā gundals ltha kāngang tlo yenkien tcha lthwaug yūanan. Hinū Moses shouan : Israel hādē, tlazūgiatlou, waigen Shālānā itil wautliwan Egyr hādē stāhā kagindāshang. Tliku Moses shouan kingān Israel hādē waugang. Houftang Shālānā hin Moses shūtaiang : adshi tungē lth saasgut, waigen tungē gwudād ādashang. Moses tungē saasgutāni, waigen adshi tungē gwudād āadāni. Houftang hinū Moses shouan : Israel hādē wautliwan, āada lth gundalo, waigen Pharaoh gie soldiers gē stāhā dalung kagunasang. Israel hādē wautliwan tungē yhillāsi kalthgwid gundalang, waigen ingūst gu ltha istlātājāni.

Pharaoh ltha tlā kīgē da kwudangang, tungē yhillāsi il kāngāni althlā. Israel hādē wautliwan tlistluan inagūst tligē gu ltha istlātājāni tlo houshen Moses tungē saasgutāni, waigen Pharaoh giē soldiers gē Red Sea ā kwōtalthka odzouang. Tlistluan houshen Moses tungē saaskidāni tlo ga soldiers gē tatilzu tungē wautalthkaskudāni, waigen wau gu ltha kwōtalthkaiang. Tlistluan ga soldiers gē chān unga akkitūgasi il kāngang tlo ltha kōnūngelguns kingānu il ōlang. Israel hādē wautliwan hanglthalthgang il kingtijangang. Kum tliku ā il katis tlingē kāng gaangang an il ūnshitālang. Houshen, tungē ā il kwōtalses an il ūnshitālang tlo il lthwaug yūanan. Dī touilung, Pharaoh isken, Egypt soldiers gē wautliwan ishin adshi tungē ā kwōtalthkaiang, Shānungetlagidas giē kingwoḡungē ltha tlahustaiang althlā.

Yenkien Shānungetlagidas kin an kaldunga klāalth tlaoutlaiang, Pharaoh kagindiē da il kwudangāni althlā. Pharaoh kum kwutungē unga stilthtaangang, altsilth il touilung tungē ā kwōtalthka odzouang. Shānungetlagidas Egypt tligē stāhā Israel hādē kaginda odzouang lā ltha yetaiāni althlā. Pharaoh kingān shā kwutungē unga dalung istasken dalung il istāshang hetgwaugē ā. Tlan lth kwutungē unga shā edo, waigen Israel hādē kingān dalung il kagindāshang. Wēata tliku Shālānā shūsi kingān lth waugūu, waigen dalung kutungāsang. Shānungetlagidas giē kingwoḡungē dalung tlahustasken Pharaoh kingān dalung gūashang. Wēata kwutungē unga lth stilthto, waigen kin dāungas

stähä dalung kaḡunasang. Kistho itil kwutunge tlaoulth-  
däungiē kwudungung? Hetgwaulana itil kwutunge tla-  
oulthdäungiē istakwudungung. Kistho hetgwaulana iching?  
Lth häada dāunga wautliwan an il itlagidāgung, waigen  
tlistluan ga dāungas gē kwōtalkāstlo lā alth ltha stunga-  
shang hetgwaugē gu. Yenkien hetgwaugē kousta yūan-  
gung, waigen adshi tligē ā dalung isistlo kum tliku hānlth  
sūtsu dalung ista tlingē kāng gaangung. Hetgwaulana kin  
dāunga ista gīgung. Dalung kutungāstlo Shālānā ā singel-  
thkang dalung gūshūasang, waigen houtāng Hānts Las da-  
lung ga il istāshang hetgwaulana stähä dalung il kagindiēan.  
Hānts Las Shānungetlagidas iching waigen itil il kwōyādung.  
Pharaoh kingān itil kwutungē skōlastlo il kwutungēstia-  
sang. Lā alth talung kiānungskēn itil kwutungē il tlaskwu-  
nagelthasang. David hin shouan: kum dī an kätliyildāng:  
dī kwutungē tlaskwuna, waigen kum Hānts unga Las di  
stähä lth istāng. Itil lāsken Hānts Las itil halistalasang  
kūwē las gūd ā. Laou itil an kin skadadālē gāgung, waigen  
ltha kwutungē tlaālē lē ishin il iching. Laou isken Jesus  
Christ ishin Shānungetlagidas kingānu ēdung. Jesus shā  
tligē stähä, kätlāgang, waigen Moses Israel hāadē Egypt  
tligē stähä kagindaḡangang kingān hetgwaugē stähä itil  
hātlandē il kagindāshang. Itil bagunan il kwōtalang, waigen  
wēata Shānungetlagidas kwulth soolgūsta il kouwang. Kwai  
amzawan houshen adshi tligē gu il kätlāshang, waigen ltha  
hēningas isken ltha kwōtalthgias ishin il ginkilishangshang.  
Lā ga lth lthwangu: lā lth kwōyādo: tliku il shūs kingān  
lth wauu, waigen il kätlāstlo dalung kaḡunasang. Il kil da-  
lung yetastlo Israel hāadē tligē dāunga gu isis tuman il kān-  
gang kingān hetk tligē gu dalung isis tuman il kingasang.

## LESSON XI.

### KINGWOGUNS KLĀALTH.

SHĀNUNGETLAGIDAS Egypt tligē stähä Israel hāadē kagind-  
aiang siliḡ tliga dāunga gu ltha istlāgang. Washt ed kouit  
Israel hāadē kum hānlth kiāngang, waigen Moses an ltha

HAIDA.

D

kätliylthdaiang. Shālānā hin Moses shūtaiang; daiung an ltha kätliylthdasu lth kingung, altsilth Israel hāadē wautliwan lth stigulthtāsang. Moses Israel hāadē an kwutūngē lā gūgangang, waigen tlistluan Israel hāadē stigang tlo Shālānā ā singelthkang il gūshouang ltha il tlatagwialēan. Moses kil il kwudangang, waigen Israel hāadē il tlanūngistlaiang. Kum washtjingāngundang Israel hāadē kum tou kiāngang, waigen houshen Moses an ltha kätliylthdaiang. Moses Shālānā ā singelthkang gūshouang ken hinū il shouan: di itlagida di ta lth tlāt, Israel hāadē di an kätliyildungung kum tou ltha daānsi althlā. Houitang Shānungetlagidas tou ltha ga ista kwanan, waigen tlistluan ltha tāgang tlo ltha kwōtalthkagangang. Houshen Moses ltha kalthshint kwutangang, waigen ltha dāungas washt il kishouang.

Shantlan swaunshung gūd Israel hāadē lthdou Sinai an istlāgang, giouk Shānungetlagidas kingwoguns klāalth Moses ga istiang gwau. Israel hāadē wautliwan lthdouwē stāhā wadshgwau agwi idjan, waigen tlan Moses swaunan gwi katlaiang. Shālānā hin shouan; nung hāada swaunshung lthdou inku kätlāstlo lā lth tiashang. Moses silthkang stēlang kwunast Israel hāadē kin dāunga tlaoutlaiang; waigen tlistluan silthkang il stēlang tlo ltha an il kätliylthdaiang. Hinū il shouan; kitildou Shālānā kil kwōyādestlo di ta lth tlāto, waigen ga dāungas gē talung tlita odzūashang. Tlistluan lthdouwē stāhā silthkang il stēlang tlo kingwoguns klāalth il stiēou idjan. Shānungetlagidas kingwoguns klāalth tablegē stung inku kalāngang. Yenkien Israel hāadē gold mūsmūs kīti an tlaoutlaiang, waigen ā singelthkang ltha gūshūouang. Moses kāngang, waigen yenkien althlu il kwutungēstīgāngang. Il kätiyilda yūanāni althlā kwau tablegē stung inku kingwoguns klāalth isis il tlahustaiang. Lth hāada lā wautliwan lā tatlāēdang, waigen ga dāungas gē ltha tlita odzouang. Tlistluan houshen Israel hāadē il tlaoulthlāgālang tlo houshen an lthdou gwi il kätlaiang waigen houshen Shālānā kingwoguns klāalth lā ga istaiang.

Kingwoguns swaunshung. Shānungetlagidas adshi kil

shūtaiang, waigen hinū il shouan : Shālānā dung itlagidou di iching, kum nung itlagida kalat an lth ūnshitāng tlan di swaunana.

Kingwoguns stung. Kum kin kētdaha kinung an tlaout-lāng, waigen shā kin isis da kum nījingāng, waigen hētk tligē gu kin isis ishin, waigen hānlth ā kin isis ishin : kum altstilh ā kin isis hetgu tikwushtloāng, waigen kum ā singelthkang lth gūshuāng, dung an di Ītlagidāsi althlā. Ltha aungalung kin dāungas istastlo ltha kitilung inku washoutka lth istāshang ; waigen di ltha kwōyādstlo ltha kalthshint lth kwutungsang kingwoguns tuman di na ltha kingstlo.

Kingwoguns lth'unilth. Kum lth ginggangan Shālānā dung an Ītlagidas kēyi ā singelthkang lth gūshuāng ; kitildou ginggangan il kēyi kwidungs hetgwangai ā isisang.

Kingwoguns stanshung. Sundaygē an lth agung kin ūnshito, waigen tuman lth lāsi kingo. Shantlan lthūunilth gud lth lthāangwilo, waigen kin dalung istas wautliwan ēlthkido. Shantlan chigwaustlo Shālānā dalung itlagida agung shanzoutaiang. Sunday gastlo, kum lth lthāangwilgungāng, dung isken, dung kit ishin, dung gwudjana ishin, dung kitzadalung itlansidasi ishin, dung kitzadalung chāadasi ishin, dungīē kintigē ishin, waigen nung tliga kalat hāadē dungīē nai ā isis ishin. Shāntlan lthūunilth gūd Shālānā shā tligē tlaoutlaiang althlā, hētk tligē ishin, tungē ishin, waigen kin wautliwan gu isi sishin ; waigen shantlan chigwaustlo agung il shanzoutaiang, altstilh Shālānā adshi shantlanē kwōyād yūangung.

Kingwoguns klēlth. Aung unga lth kwōyāda, ou unga ishin ; waigen tliku il shūtawas kingān lth wau ; kingān dung waustlo tlāā dung hēningāshang ou tligē gu Shālānā dung Ītlagida dung ga istaiang.

Kingwoguns lthūunilth. Kum lth hāada tiāng.

Kingwoguns chigway. Kum lth chaaigungāngu isi ishin kum lth laaigungāngu.

Kingwoguns stānshunga. Kum lth kwolthtaang.

Kingwoguns klāalthswansīngu. Kum dung kwulth nung nās hansta kwaiēdungāng.

Kingwoguns klāalth. Kum dung kwulth nās giē nē kwutungē unga alth ga istataltāng; kum dung kwulth nung nās chā ga kwutungē unga alth istataltāng: il kitzadalung itlansidasi ishin, il kitzadalung chāadasi ishin, lāgiē mūsmūsgē ishin, lāgiē kuitangē ishin, waigen kinhan il daas an ishin.

Tliku Shālānā shouan ishin lth kwudungo, waigen kingān lth waugfiu. Hinū il shouan: kwutungē unga wautliwan alth Shālānā lth kwōyādo, waigen hātlandē unga wautliwan alth ishin, waigen dalung kutungas wautliwan alth anin. Waigen kingwoguns kalat hin shouan: tliku tlū unga dalung kwōyāda tlidzūs kingān lth lth hāada wautliwan kwōyāda tlidzūs. Ashgaiu kingwoguns stung stāhā kingwoguns wautliwan kiāgāgung, waigen ga prophetgas gē ishin. Di touilung, kingwoguns wautliwan kingān lth wauu, waigen dalung hātlandē kagunasang.

Houshen Israel hāadē Moses an kātliylthdaiang kum hānlth ltha kīangāni althlā, waigen Shānungetlagidas ltha ishin an kātliylthdaiang, waigen sik zanoa ltha ga il istaiang, altsilth Israel hāadē kwan kwōtalthkaiang. Moses an ltha istlāgang ken hin ltha shouan: itil kalthshint lth kwutung, waigen Shālānā ā lth gūshu sik il dāngēanā: waigen tliu kingwoguns shūs kingān talung wau giishang. Moses lā ā singelthkang gūshouang, waigen hangtlan hin il shouan: Moses, sik lthkenē sik lth ista ltha wautliwan kāngēanā. Kīstho sik lthkenē kīngsīken kagunasang. Moses kingān waugang. Adshi sik lthkenē shā isi ltha kīngsītlo kum kwōtalthkaangang. Ltha oualung giouk sik lthkenē isis ā kitilung ltha kēlthilungangang ltha kāngēanā, waigen ltha lāgelthēanā. Kitilung giouk sik lthkenē isis ā yāalung ltha kēlthilungangang, waigen gaigu ltha tagwiēlgangang. Lth hāada tagwias ltha stis giouk sik lthkenē ā kēlthilungangang, waigen ltha lāgelth odzouang. Yen' n Shālānā Israel hāadē an kwutungē lā yūanan, waigen ltha sū wautliwan il tlanūng-istlaiang. Hin ltha il shūtaiang: tliku dalung ltha shūtas kingān dalung waustlo kum houshen dalung an dī kwutungē stiāngshang.

Israel hāade houshen dāungaiang Massah tligē gwau,

waigen Shālānā ltha an kätliylthdaiang, altsiilth tada klälē stanshung gūd kum tliga lā ltha ga il istaangang. Ltha kiā wautliwan dāungaiang, altsiilth kum tliga lā ltha kingāngang. Itan ltha innas swaunan Israel tligē ā istiēdang. Hinū Psalmgē shouan: aiata Shālānā kil kwudungē da dalung kwudungstlo lth kum kwutungē unga katsadāngo Israel hāadē kingān Meribah tligē gu waigen Massah tligē dāunga ā. Yenkien dalung aungalung dī istakwudangang, waigen kin lth istaiang ltha kāngang. Dī kwutungē ltha an kätliyl-dungini. Tada klälē stanshung gūd ltha an dī kwutungē stigangang ken hin lth shouan: lth hāada kwutungē unga hadloungung kum kūwē dī na an lth ūnshitānsi althla, altsiilth giouk lth agung shanzoutas gu kum ltha istlāangshang.

Moses Israel hāadē an itlagidēalang an dalung ūnshitung. Moses an ltha kätliylthdaiang kum hānlth ltha kiāngāni althlā. Israel hāadē hin Moses shūtaiang: Moses, kashintlou kum hānlth talung kiāngung? Itil wantliwanu lāgung Egypt tligē gwau. Kashintlou Egypt tligē stāhā itil dung istou ūdja? Moses Shālānā ā singelthkang gūshouang, waigen lā da il tlāēdang. Hinū il shouan: wadshgwau tish isis ā lth gūshu lth'uniltha, waigen tishē stāhā hānlth kwauadasang. Israel hāadē lā an kätliylthdaiang althlā, adshi tishē il saaskidang, waigen hānlth washt kwauadāni. Adshi tishē il saaskidāni althlā, tliku Shālānā lā ga shouan kingān kum il wauangang Houitang Shālānā hin il shūtaiang: kashintlou kingwoguns dī na dung tlahustou ūdjang? Kingwoguns dī na dung tlahustaḡuni althlā, kum Israel tligē ā dung kāangshang, waigen adshi tligē dāunga gu dung kwōtalashang. Houitang il kwōtalang, waigen Shānungetlagidas il tlēēwaiang, waigen tlitzan lā il tlēēwaiang kum nung hāada swaunshung anūnshitāngang.

Moses Egypt tligē stāhā Israel hāadē kagindaiang, waigen Jordan hānlthē ā lth hāada wautliwan dungalth il kätlāgang, waigen gaigu il kwōtalang. Tada klälē stanshung gūd Moses Israel hāadē an itlagidēalang, waigen lā ltha kwōyād yūanan. Wēata tliku Shānungetlagidas dalung shūtas kingān lth waugīlu, waigen shā tligē gu Moses alth



dalung stung gūshang. Kingwoguns kingān lth gundzū gūu, waigen dalung kaḡunasāḡ. Hinū Shālānā ā Singelthkang lth gūshū: O Shālānā, itil kalthshint lth kwutung, waigen kingwoguns klē lth itil kwutungē inku lth kālunḡ. Sundayḡē an lth agung kīn ūnshito. Sunday gastlo dalung lthāangwilastlo dalung il skādēlthasang. Sunday gastlo an agung lth amzouto, waigen dalung lāshang. Adshi shantlanē gūd dalung lthāangwilasken, hetgwaugai a dalung isisang. Dalung lthāangwilastlo kingwoguns langa dalung tlahustāshang: waigen lth hāada wautliwan kingwoguns tlahustas hetgwaugai ā isisang Israel hāadē dāunga kingān. Sundayḡē unga lth kwōyādo, waigen churchnē ā lth istzoo il kēyi ā dalung killāḡēana. Sundayḡē dalung an il tlaoulthlāḡālang, waigen shantlan chigwau dalung kwōyādistlo dalung kutungāsang.

Hinu kingwoguns klēlth itil skadadang: aung unga isken ou unga ishin lth kwōyāda, waigen tliku il shūtawas kingān lth wau. Tliku dalung aungalung shūsi kingān lth wauū. Kum aungalung isken oualung ishin dalung kwōyādānsken, Shānungetlagidas giē kingwogungē dalung tlahustāshang. Yāalung dalung kwōyādasken, Shānungetlagidas kitilung dalung isilthasang. Il kitilung dalung isisken dalung an il aungāsang. Yāalung kil lth kingān wauḡūu, waigen hēninga ed swaunung dalung klāshang. Shāt ligē gu dalung isistlo Shānungetlagidas kwulth soolḡūsta Jesus kouwas dalung kingasang. Ang, il aung kwulth soolḡūsta il kouwang. Kin wautliwan lāgiou iching, waigen itil wautliwan il tlaoutlaiang, altsilth lāgiou itil iching. Kwai amzawan adshi tligē gu il kātāshang lth hāada wautliwan il ginkilislungēan. Itil lāstlo, sha tligē ā itil il istāshang Moses kwulth talung itzḡēanā: itil dāungasken, hetgwaugē ā itil il dāngashang. Lā ā singelthkang lth gūshū; kingwoguns langa lth kwōyādo; waigen tlistluan dalung kwōtalkāstlo, Moses isken David ishin Daniel ishin alth dalung hēninga gūshang shāḡē kingdomḡē gu ā.

# LESSON XII.

## JOSHUA.

TLĪSTLUAN Moses kwōtalang tlo Joshua Israel hāadē an itlagidēalang, waigen il kwutungē kladska yūanan. Joshua Israel hāadē Jordan stāhā Israel tligē ā halistalang. Nē dāunga yūan ltha kīaiang Israel tligē gwau lth hāada wautliwan dāungaiang althlā. Lth hāada dāungasu Joshua touilung tli tiē da kwudangang, waigen kum ltha gwikāēlthāngang Shālānā Joshua touilung tatlāēdāni althlā. Shantlan swaunshung gūd Joshua lth hāada tagwia wautliwan istaiang soldiers anna: waigen hinū il shouan: kiagin soldiers gē, tliga wautliwan ai lth istiēdo, waigen ga dāungas gē lth tli taodzūo. Waikingān ltha wangang. Israel hāadē ga dāungas gē an hāēlthtaiang. Joshua gwud ltha hāēlthtas kangang, waigen singyāstlo ga dāungas gē agung saalsēs an il ūnshitālang tlo Shālānā ā hin singelthkang il gūshouang: O Shānungetlagidas Tagwia yūans, sin stung juiē lth shā ista, waigen kum kungē sīk istaang, kaiēlthta ishin, ga dāungas gē talung tli taodzuwē kū. Tliku Joshua shouan kingān edāni. Sin stung gūd juiē shā idjāni, waigen juiē kum kākitalthālthāngang. Kungē ishin kum hatgāanāngang, kaiēlthtas ishin. Joshua ga itlagidas gē klālē lth'unilth wok swaunshung tli taiang, waigen ga dāungas gē wautliwan ishin.

Ga dāungas gē wautliwan hēlouang tlo ga soldiers gē tliga wautliwan istaiang, waigen Joshua ga ltha ista odzouang. Hinū Joshua shouan: tliga lā ga itlagida gē wautliwan ga lth istāshang, waigen ltha touilung wautliwan dungalthan. Ga itlagidas gē tliga lā istaiang, waigen lth hāada wautliwan kwutungē kladska yūanan. Lth hāada dāunga an ltha hāēlthta gīgāng silfd churchnē yūan ltha tlaoutlaiang, waigen Israel hāadē wautliwan sing Shālānā ā killāgang. Yenkien Shālānā Joshua itlagidēlth yūanan lth hāada wautliwan anna, waigen tuman Israel hāadē il kāngang. Tligē yenkien dāungaiang althlā kum churchnē ltha tlaoutlāngang. Tligē lāgāni althlā churchnē lā yūans ltha tlaoutlaiang. Kin wautliwan ēlthkīgāng silfd Joshua hin Israel

hāadē shūtaiang : churchnē ai lth istzoo, waigen sing Shā-lānā ā lth killou ; kingān dalung waustlo dalung hātlandē lāgelthasang, waigen kin wautliwan an ishin. Yenkien Joshua itlagida lā yūanu idjan, waigen Israel hāadē wautliwan kwutungē lā yūanan. Tlistluan Joshua kwōtaltalang tlo lth hāada wautliwan an il aiyangang, waigen kingwoguns klāalth ltha ga il istaiang. Hinū il shouan : Shānungetlagidas giē kingwogungē kingān dalung gundzūstlo, yenkien dalung da il tlātasang. Kingwoguns dalung tlahustastlo dalung il dāngshang, waigen tliga kalat hāadē dalung tlitāshang.

Yenkien Joshua itlagida lā yūanu idjani, waigen Joshua kingān talung edstlo, shā tligē gu lā alth itil hēninga gīshang. Wēata Shālānā kingwoguns dalung tlahustastlo, shā tligē kum dalung kingāngshang. Kum shā tligē dalung kingānstlo, dalung kwutungē sti gīsang. Joshua Jesus Christ klingān kingān edangwau. Joshua lth hāada lā wautliwan an itlagidēalang, waigen ga dāungas gē wautliwan il hēlōdaiang. Wēata Jesus lth hāada lā wautliwan an itlagidāgung waigen lth hāada dāunga wautliwan hetgwaugē ai il hēlōdāshang. Shānungetlagidas kitu il iching, altsiilth kwōtalthgas il tiaiāng il kwōtalang althlā. Kwōtal stāhā houshen il kātluang. Wēata lth hāada lā kwōtalthgias an il itlagidāgung. Itil kwutungē lāsken, itil tlū kwōtalkāstlo, houshen itil tlū wautliwan kātluashang shantlan otgwaustlo. Jesus kwōtal an itlagidāgung, altsiilth Jesus talung yetastlo itil ishin kwōtal telgu tagwiāsang, itil il tatlātasēsi althlā.

Tlaglu agwi hin Joshua Israel soldiers gē shūtaiang : tliga wautliwan ai lth istalo, waigen ga dāungas gē wautliwan lth tlito. Kwai amzawan Jesus hin ga angelgas gē shūtāshang : tliga wautliwan ai lth istiēdo, waigen ga dāungas gē wautliwan lth isto, waigen hetgwaugē ā ltha wautliwan lth isto. Kingwoguns langa kingān talung waustlo, giouk il isisgē ā talung isisang. Giouk il isisgē ā talung istiēdsken, yenkien itil kwutungē thkagūlāshang. Kasino shā tligē talung kiātliidzūashang? Jesus talung yetadzing, waigen itil kwōtalkāstlo giouk il isisgē ā itil il istāshang. Tliku il shūsi

kingān talung waudzing, waigen Hānts Las itil ga il istāshang hetgwaugē stāhā itil il kagindiēan.

Joshua tliga lā lth hāada lā ga istaiang, waigen tliga wautliwan lā yūanan. Wēata Jesus shā tligē itil an tlaoulth-lāgung. Tlistluan itil kwōtalkāstlo yenkien tliga lā itil ga il istāshang. Tlaglu agwi Joshua hin Israel, hāadē shūtaiang: churchnē ā lth istzoo, waigen sing Shālānā ā lth killou, kin lā wautliwan dalung ga il ista gīis althlā. Kingwoguns kingān lth gundzu, waigen dalung kaḡunasang. Israel hāadē kingwoguns kingān idjangang, waigen Shālānā ltha an kwutungē lā yūanan. Wēata Jesus hin itil shūdang: churchnē ai lth istzoo, waigen dī ā lth killou: kin lā wautliwan dalung ga lth istāsi althlā. Churchnē ai lth istzoo, waigen sing dī ā lth killou, dalung hagunan dī kwōtalang althlā. Wēata Joshua kingān kwutungē unga lth edo, waigen Shālānā dalung an lāshang. Yenkien Joshua kin an kaldunga tlaoutlaiang. Sin stung gūd juiē shā idjāni, waigen kum hetga il isāngang, waigen ga dāungas gē il tlita odzouang. Joshua kingān kwutungē unga lth edo, waigen ga dāuugas gē stāhā dalung kaḡunasang.

### LESSON XIII.

#### ACHAN.

TLAGLU hāadē kin dāunga istaḡangang, altsiilth Shālānā hin Israel hāadē shūtaiang: kum lth kin dāunga swaunshung istaango: yenkien zanoa ai kin wautliwan ginggangen eds lth isto. Shantlan swaunshung gūd Israel hāadē tliga kalat hāadē an hāelthtaiang, waigen kum Israel hāadē gwikāat-lāngang. Kashintlou Shālānā kum Israel hāadē tatlāēdang ūdjang? Nung hāada swaunshung kōdets lā yūan kwolth-tāiang: dālā klālē klālē stung ishin: waigen gold kwan yūan ishin. Tligē ai il saalāni, altsiilth kum Shānungetlagidas Israel hāadē tatlāēdāngang.

Israel hāadē wautliwan kwutungē sti yūanan, waigen Joshua Shālānā ā singelthkang gūshouang. Houitang Shānungetlagidas hin Joshua shūtaiang: kingwoguns dī na

nung itlinga tlahustaḡuni althlā, altsilth kum dalung ta lth tlātāngshang. Yenkien nung itlinga kōdets lā yūan kwolthtaḡun, waigen dālā kwan yūan ishin. Kum nung kwolthtalēgas dalung tīānstlo kum dalung ta lth tlātāngshang, waigen dalung wautliwan hēlō odzūashang.

Houītang hin Joshua shouan : kīstho kōdets lā yūan kwolthtaḡun ? waigen kum kwolthtalē il kīāngang. Ga itlagidas gē wautliwan il ginkilisanḡangang, waigen kum ga itlagidas gē kin kwolthtaangang. Joshua Israel hāadē wautliwan ginkilisanḡang, waigen kwolthtalēgas il kīaiang. Kasino il kēyaiang ? Achan hinū il kēyaiang. Yenkien Achan kōdets lā yūan kwolthtaiang, waigen dālā kwan yūan ishin, waigen gold ishin. Joshua hin Achan shūtaiang : Shānungetlagidas ga lth lthwanga ā kin isis dung kwolthtaḡuni althlā. Wēata yenkien lth hansta shu, waigen kum lth kilthkadungāng. Dī ga lth shūda, kitlano kin dung kwolthtaiang iching ?

Achan hin Joshua shūtaiang : yenkien dī kwutungēsti yūāngung kin alth istaḡunūtlā. Gioung n ou ā kin isis iching, waigen wau hetgu lth saalguni. Gioung nē ā langa il kaiitang, waigen kin kwolthtaiang wautliwan langa il kīaiang Joshua. Joshua hin Achan shūtaiang : wēata yenkien dung an dī ūnshitung, dung kwolthtalē gāgung. Awolth kum Shānungetlagidas itil tatlāēdāngun, kōdets lā yūan dung kwolthtaḡuni althlā. Wēata, Israel hāadē wautliwan dung tīashang, tliku Shālānā shouan kingān kum dung tlidzuāns althlā. Achan Shānungetlagidas ā singelthkang gūshouang ken hinū il shouan : yenkien kin dāunga lth kīḡun, waigen dī dāungas althlu dī kwutungēstīgung ; altsilth dī dāungas lth da kīskit. Yenkien dī ta lth tlāt ; dī kalthshint lth kwutung : waigen dī hātlandē lth kaḡinda.

Shālānā hin Joshua shūtaiang : kum Achan ta lth tlātāngshang kingwoguns dī na il tlahustaḡuni althā. Houītang lth il tīo nung hāada dāunga il isis althlā. Houītang Israel hāadē wautliwan kwau alth lā kuntlouang. Il chā isken, il kitilung wautliwan ishin, lā ishin ltha kutkwōtalthkaiang. Achan kwōtalang silid hinū Joshua shouan : kwau gwutgwīd lth istalthkitzouatlo, waigen hetgwīk lth il isto, il chā isken,

il kitilung ishin. Kwau gwutgwid ltha istalthkitzoutlaiang, waigen hetgwik lā ltha istaiang, il chā ishin, il kitilung ishin, waigen kin il daas wautliwan ishin. Wadla hinū Joshua-shouan: adshi kwauē dalung kingstlo yenkien dalung kutungāshang; waigen kum tlaglu hāadē kiniḡē kwolthta-gungāngo, waigen dalung kaḡunasang.

Di touilung, Achan kum Shālānā kilth kingān tlidzuān-gāngang, altsilth Israel hāadē kwan alth lā kutkwōtalang. Achan kingwoguns stānshunga tlahustaiang, altsilth Shālānā lā an kätliylthdaiang, waigen houitang il kwōtalang. Kingwoguns stānshunga hin shouan: kum kin ed sūtsu lth kwolthtaango. Wēata ān lth kutungātoo, waigen tliku kingwoguns shouan kingān lth wau ḡiū. Achan an lth agung ūnshito, waigen kum kin lth kwolthtaḡungāngo. Shālānā hangi tliga wautliwan gu iching: lth hāada wautliwan il kingung, waigen ltha kwolthtas hetgwaugē ā il istāshang. Kum kin ed hutsu kwolthtaangu. Kin ed hutsu dalung kwolthtasken, Shālānā ḡiē kingwogungē dalung tlahustāshang. Kingwoguns langa dalung tlahustastlo dalung an il kätliyildungsang. Dalung an il kätliyildastlo hetgwaugē ā dalung isisang. Hetgwaugē gu dalung isistlo Achan dalung kingasang, waigen dalung kwutungēstiasang. An lth kutungātoo, waigen tlan lth kwolthtou: kwolthta leilung hetgwaugē ā isungkasēsi althlā. Kin ed hutsu dalung kwolthtasken dalung dāungedasang, waigen hetgwaulana dalung an itlagidāshang. Wēata kwutungē unga lth klad-skādo, waigen kum houshen kin lth kwolthtaāngū. Shālānā itil lāḡē da kwudungung. Kum il kil talung yetānstlo hetgwaugē gu talung sahaiga ḡiisang. Laou shouan; di kitilungu, kwutungē unga lth di ga isto, waigen dalung lth kagindāshang. Wēata kwutungē unga lth lā ga isto, waigen dalung kaḡunasang. Hinū singelthkang lth ḡūshū: O Shālānā itil dāungas washt lth kishū, waigen kum Hānts unga Las itil stāhā istāng. Kingwoguns langa dalung kwōyādestlo dalung kil il kwudungsang, waigen dalung da il tlātasang. Lā lth kwōyādo: lā lth yeto: lā ā singelthkang lth ḡūshū, waigen Achan kin dāunga istaḡāngang stāhā dalung kaḡunasang.



## LESSON XIV.

## GINKILISLUNG LEILUNG.

JOSHUA kwōtalang silid Shānungetlagidas Israel hāadē an ginkilislung lēilung tlaoutlaiang. Yenkien Israel hāadē an ga kutungas gē il ginkilislängēlthtaiang. Joshua kwōtalang tlo Israel hāadē wautliwan chākwudangang. Kum Shānungetlagidas ltha kwōyādāngang, altsilth kum ltha da il tlāēdāngang. Israel hāadē kingwoguns wautliwan tlahustaiang, altsilth tliga kalat hāadē nē lthanga istaiang. Yenkien tligē dungalthan lthanga ltha istaiang. Othniel nung itlinga lā yūanu idjan, altsilth Shānungetlagidas Othniel itlagidē-lthtaiang, waigen Israel hāadē wautliwan an il itlagidēalang. Shantlan wautliwan gūd Shānungetlagidas ā singelthkang il gūshouang, altsilth Israel hāadē an lā il itlagidēlthtaiang.

Othniel ginkilislänglē is tlāgangang, waigen tliga kalat hāadē stāhā Israel hāadē il kagindaiang. Tada klālē stan-shung gūd Israel hāadē lāgālāni Othniel ltha ginkilislängāni althlā. Othniel kwōtalang silid houshen Israel hāadē chākwudistlaiang, altsilth Shālānā ltha an kātliyilthdaiang. Houshen tliga kalat hāadē nē lthanga istaiang, waigen tliga wautliwan lthanga ishin. Tliga kalat hāadē an ltha lthāangwil yūanan. Shantlan wautliwan gūd tada klālth wok stanshunga tliga kalat hāadē an ltha lthāangwilgangang. Shantlan swaunshung gūd Israel itlagida gē kwutungē unga stilthtaiang, waigen Shālānā ā singelthkang ltha gūshouang. Hinū ltha shouan: O Shālānā itil ta lth tlat, waigen tliga kalat hāadē stāhā lth itil kaginda. Ltha kil il kwudangang ken houshen ltha da il tlāēdang. Ehud il itlagidēlthtaiang, waigen Israel hāadē il kagindaiang. Yenkien Ehud itlagida tagwia yūanan. Israel hāadē tagwias il istaiang soldiers anna, waigen ga soldiergus gē tliga wautliwan ai il kil istiedang tliga kalat hāadē lthā tlitaodzūēanā. Washt ed kouit tliga kalat hāadē Ehud ga soldiers gē an hāēlthtaiang, waigen tliga kalat hāadē lagwau klālē klālē stung wok lagwau klālē klēlth tlitaiang, waigen houshen Israel hāadē lāgālāni. Tada klālē stanshunga gūd Israel hāadē an il itlagidēalang.

Sundaygē wautliwan gūd Ehud hēningaskialk churchnē ā ltha istalgangang, waigen ltha wautliwan lā yūanan.

Ehud kwōtalang silid Shamgar Israel hāadē an itlagidēalang. Shantlan swaunshung gūd Philistine hāadē lagwau klālth wok lagwau klēlth il tlitaiang, waigen ga dāungas gē stāhā Israel hāadē il kagindaiang.

Shamgar kwōtalang silid houshen Israel hāadē kin dāunga istaḡangang, waigen Canaan hāadē nē lthanga istaiang, tligē lthanga ishin. Gingangan Canaan hāadē an ltha lthāangwilgangang, waigen kum dālā ltha kīāgang. Yen-kien Israel hāadē kuniskidēḡelang, waigen houshen Shālānā ā singelthkang ltha gūshouang, waigen houshen lthā da il tlāēdang. Shālānā Deborah nung chada isis itlagidēlthtaiang, waigen Barak ishin. Barak nung itlinga kēiu iching. Barak Israel hāadē istaiang soldiers anna, waigen Canaan hāadē an ltha hāēlthtaiāḡ, waigen Israel hāadē gwikāēlang. Israel hāadē gwikāēlang silid hinū Deborah katzouang: Shālānā ā lth killou dalung da il tlāēdguni althlā, waigen tlan lā swaunan tagwiāḡung. Shālānā ā lth killou, waigen kingwoguns langa kingān lth wau gūu, waigen dalung da il tlāt gūisang. Shantlan wautliwan gūd lā ā singelthkang lth gūshū, waigen ga dāungas gē stāhā dalung kaḡunasang. Barak isken Deborah ishin Israel hāadē ginkilislāgang tada klālē stanshung gūd. Tlistluan Barak ltha an itlagidēlang tlo yenkien ltha lāḡangang. Barak kwōtalang silid houitang houshen Israel hāadē Shānungetlagidas dakiskitāni.

Houshen Israel hāadē isantislaiang, waigen Midian hāadē nē lthanga istaiang: tliga wautliwan dungalthan lthanga ltha istaiang. Midian hāadē mūsmūs lthanga tlitaiang ltha tāḡēan: lamatoē ishin: corḡē ishin ltha istaiang; waigen kin lā wautliwan ishin. Israel hāadē kum kuitan swaunshung istaangang: Midian hāadē kintiga wautliwan lthanga kwo-lthtaiang althlā. Houshen Shālānā ā singelthkang ltha gūshouang, waigen nung prophetga ltha ga il istaiang. Hinū anung prophetgas shouan: tlan Shālānā swaunan itlagidāḡung, waigen lā gwi kwutungē unga dalung stīlthta-stlo houshen dalung da il tlātasang. Awolth Egypt tligē

stāhā dalung yāalung il kagindaḡāngang kingān Midian hāadē stāhā dalung il kagindāshang kingwogans langa kingān dalung waustlo. Wēata lā lth yeto, waigen kum Midian hāadē ga lth lthwaugāngu, waigen dalung da il tlātasang.

Kingānu ltha waugāng, waigen nung ginkilislānglē ltha ga il istāiang. Gideon hinū il kēyaiang. Gideon nung angelgas kāngang, waigen hin lā il shūtāiang: Shālānā dung ga istatlang, waigen tlan dāha swaunan Israel hāadē an il itlagidēlthtāsang. Ashgē timegē gūd Israel hāadē lthken hudila ltha tlaoulthgangang skātlink anna: ettitē an ishin: kintigē an ishin: waigen ā singelthkang ltha gūshūgangang, altsilth yenkien ltha dāunga yūanan. Hir' nung angelgas shouan: Gideon, houftang dung yāalung an ā singelthkang ltha gūshūs lth tlahusta. Kin ā singelthkang ltha gūshūs wautliwan dung tlahustas silē lth hāada tagwia wautliwan ga soldiers gē an tlaoutla, wāigen Midian hāadē an lth hāēlthto.

Gideon itan innāgang, altsilth il lthwaug yūanan. Hinū il shōuan: lamatoē hou lth istāshang, waigen kiak hou lth istāshang kunē ingwia: waigen singaigastlo lamatoē hou tilthstlo, waigen tliga wautliwan yhillāstlo yenkien Shālānā dī tatlātasēs lth yetāshang. Kingānu il waugāng, waigen singaian tlan lamatoe hou swaunan tilths il kāngang, waigen kunē waukwulth kous yhillaiang: altsilth il kwutungē kladsgālang. Houshen hinū Gideon shouan: O Shālāna, kum dī an lth kātliyildungāng, waigen houshen dung lth istakwudungsang. Adatlth singaigastlo lamatoē hou yhillāstlo, waigen kunē waukwulth kous tilthstlo, yenkien dī kwutungē kladskāshang. Houshen kingānu il waugāng, waigen singaian lamatoē hou yhillāsi il kāngang, waigen kunē waukwulth kous tilths il kāngang. Kashintlou lamatoē hou tilthsikē kunē wau addu isis yhillou ūdjang: waigen kashintlou kunē wautliwan tilthsiken waigen lamatoē hou kunē inku isis yhillou ūdjang? Shānungetlagidas kinan kaldunga stung tlaoutlaiang, waigen althlu yenkien Gideon kwutungē kladskāgang.

Houftang aung unga giē kin ā singelthkang il gūshūgang-

ang il tlahustaiang, waigen hin lth hāada wautliwan il shūtaiang: kin ā singelthkang dalung gūshūs tlahudjango: kwutungē unga lth stilthto, waigen houshen Shālānā dalung kagindāshang Midian hāadē stāhā. Gideon kilth kingān lth hāada wautliwan wauḡang. Yenkien ltha dāungas althlu ltha kwutungēsti gangang, waigen houshen Shālānā ā singelthkang ltha gūshūḡangang, waigen ltha da il tlāēdang. Gideon lth hāada tagwia wautliwan istaiang soldiers anna, waigen Midian hāadē an ltha hāēlthta yūanan, waigen Midian hāadē ltha hēlōda odzouang. Gideon ginkilislānglē tāgwīou idjāni, waigen Israel hāadē wautliwan an il itlagidēalang, altsilth houshen Israel hāadē kwutungē lā yūanan. Tada klālē stanshung gūd Gideon Israel hāadē ginkilislunḡangang, waigen kin lā Israel hāadē an il ista kwan yūanan.

Gideon kwōtalang silid Abimelech Israel hāadē an itlagidēalang. Abimelech nung hāada dāunga idjan, altsilth tada lth'unilth swaunan ltha il ginkilislunḡangang. Shantlan swaunshung gūd Abimelech ga soldiers gē tliga kalat hāadē an hāēlthtaiang, waigen nung chada kwau kitskenan il kats lā il kutdang, waigen il kwōtalang.

Abimelech kwōtalang silid Tola Israel hāadē an itlagidēalang, waigen tada klālē stung wok lth'unilth gūd Israel hāadē il ginkilislunḡangang, waigen il kwōtalang.

Tola kwōtalang silid Jair Israel hāadē an itlagidēalang. Tada klāle stung wok stung gūd ltha il ginkilislunḡangang, waigen lā ishin kwōtalang.

Jair kwōtalang silid houshen Israe hāadē dāungaiang. Ammon hāadē tligē lthanga kwolthtaiang, waigen yenkien ltha kuniskidēḡelang; altsilth Shānungetlagidas ā singelthkang ltha gūshūḡangang. Ltha kil il kwudangang, waigen Jephthah ltha an il itlagidēlthtaiang. Jephthah ga soldiers gē Ammon hāadē an hāēlthtaiang, waigen ltha gwikāēlang. Houshen an Israel hāadē kwutungē kladska ēlang, Shālānā Ammon hāadē stāhā ltha kagindaiang althlā. Tada lthūnilth gūd Jephthah Israel hāadē ginkilislāngang.

Jephthah kwōtalang silid Ibzan tada chigwau gūd Israel hāadē ginkilislunḡangang, waigen il kwōtalang.

Ibzan kwōtalang silid Elon tada klāalth gūd Israel hāadē an itlagidēalang, waigen il kwōtalang.

Elon kwōtalang silid Abdon ltha an itlagidēalang tada stānshunga gūd, waigen il kwōtalang.

Abdon kwōtalang silid Samson Israel hāadē an itlagidēalang. Nung itlinga tagwia yūans il idjan. Philistine hāadē stāhā Israel hāadē il kagindaḡangang. Philistine hāadē ltha an daunga giḡangang. Israel tligē ltha kwolthtaiaḡ, waigen Shānungetlagidas Israel hāadē kuniskidē inēlthsa kāngang, altsiilth Samson ltha an il ginkilislāḡlē gēlthtaiaḡ. Kum nung itlinga lā kingānu edāngang. Yenkien lth hāada wautliwan telgu il tagwiāḡang. Shantlan swaunshung gūd ūan Samson swaunan Philistine hāadē lagwau klālē klēlth tlitaiang kuitan sāhai alth, altsiilth Philistine hāadē lā an kātliylthdaiang. Singyā swaunshung nai ā unga il katas lā ltha kāngang, waigen kwai kladska yūan alth il yhē lā ltha kīouang, waigen il kwollo ishin. Il yhē lā ltha kīouang silid waigen il kwollo ishin lā ltha kīouang silid il kīitlāḡang. Houitang il kātliouang ken adshi kwai kladska yūan il yhitadang, waigen lthtamt kingānu lā an edāni. Philistine hāadē an il kātliylthdaiang, waigen ltha il tliita kwanan. Houshen Philistine itlagida gē wautliwan Samson tliē da kwudangang. Kin alth il tagwias langa kīē da ltha kwudangang, waigen kin alth il tagwiasa kum langa ltha kīangang.

Philistine hāadē kutungā yūanan, waigen nung chada dāunga lā ga ltha istaiang, waigen lā il ināēlang. Yenkien nung chada dāung yūan il klaiang, kum tlāl unga il kwōyādāngāni althlā. Philistine hāadē houitang langa an ūnshītāni kum tlāl unga il kwōyādāngang, altsiilth ga itlagida gē klēlth hin il chā shūtāiaḡ: dung tlāl tliṭzan kin alth tagwiasa hansta lth shu, waigen dālā thousand ga klēlth dung ga talung wautliwan istāshang. Samson chā hin shouan: lāḡung; houitang tliṭzan kin alth il tagwias an di ūnshītasang.

Singyāstlo Samson chā sahailth yūangangang, waigen Samson kwutungēsti yūanan il chā sahailth yūanāni althlā.

Hin lā il shūtaiang: kashintlou dung sahailth yūangung: kashintlou dī an dung kätliydungung: kashintlou kum dī dung kwōyādāngung? Hinū il chā shouan: dahou dī an kätliydungung, altsiilth dī kwutungēstigung, waigen althlu lth sahailthagungung. Kum dī dung kwōyādāngung: dī dung kwōyādastlo kin alth dung tagwias dī ga dung shūda tlingāgung. Kin alth dung tagwias dī ga lth shūda, waigen dī dung kwōyādas an dī ūnshitalthasang.

Samson kum kwutungē kladskaangang, waigen chā unga hin hangang il shūtaiang: tlitzan kin alth dī tagwias dung lth shūtashang. Kum awolth dī kats lth zitdungāngun: wēata dī kats dalung zitdungstlo houitang ginggangan dī ēlthasang. Singyāstlo il kataiang, waigen il chā Philistine hāadē ā hanstashūāgang. Hinū il shouan: wēata tlitzan dī tlal tagwias an dī ūnshitung. Dālā thousandga klālē stung wok klālth dī ga lth isto, waigen dalung ga lth shūtāshang. Houitang Philistine hāadē dālā lāga ista odzouang; waigen hinū il shouan: il kats lā lth zitdango, waigen ginggangan il ēlthasang. Il kats lā dalung zitdangskan il hāgulthasang. Houitang Philistine hāadē il kats washt lā zitdangāng; waigen il chā hin shouan: Samson, kätlūltha; yenkien adshi nē Philistine hāadē alth stāougāgung. Houi tāng il kätlouang, waigen Philistine hāadē kiak istie da il kwundangang; waigen kum il tagwiēlthāgang. Il kats washt lā lth zitdangs an il ūnshitālang il hāagas althlā. Yenkien wēata ginggangan il ēlang il kats washt langa lth zitdangāni althlā.

Houitang Philistine hāadē kētsit nai ā lā lth istaiang. Yātz kunganda kīna yūan alth il hangi lā lth gisgālang, waigen il hangi langa hulkatūgaiang. Itan Philistine hāadē kwutungē lā yūanan lā lth istaiāni althlā. Shantlan swaunshung gūd Philistine hāadē nāng yūanan, waigen lth yēlth yūangāgang. Sintajā kiak lth nāngāni; waigen singya nē ti swaunshung ā Philistine itlagida gē thousand lth'unilth idjan. Shānungetlagidas an lth kā yūanan, waigen Samson an ishin. Hin lth shouan: kum Shānungetlagidas kāng gaangung lth shūgāgang. Yenkien Samson kwutungē kil



sti yūanau, waigen hin Shālānā ā singelthkang il gūshouang; O Shālānā, houshen tagwia dī ga lth ista: dī kalthshint lth kwutung, waigen houshen dī ta lth tlāt, waigen shā dung isis houítang Philistine hāadē lth skadadāshang. Shālānā il kil kwudangang, waigen houshen tagwia lā ga il istaiang. Houítang Samson kāgwālang, waigen adshi nē hetgwik il katzaiang: waigen nē hetsi kwu stung washt il dunghastaiang; waigen yenkien nē hunzaiāni. Nē hunzaiang tlo Philistine hāadē thousandga lth'unilth il tlitaiang; altsiilth Samson gwikāēlāni. Samson ishin kwōtalang nē hunzaiang tlo.

Israel hāadē kin lā klaiang tlo houítang Shālānā da ltha kiskitangang: waigen houítang kin wautliwan lthanga tliga kalat hāadē istagangang. Kin dāunga ltha klaiang tlo houshen Shālānā ā singelthkang ltha gūshūgangang, waigen houshen ltha da il tlāēdang. Houshen an kin lā ltha istaiang tlo houshen Shālānā kēyi da ltha kiskitangang: altsiilth wēata Shālānā hāgālāni, waigen yenkien ltha il dāngang. Wēata Israel hāadē wautliwan kuniskidē inēlgung, waigen tliga kalat hāadē ltha an kātliyildungung, kum Shālānā giē kingwogungē kingān ltha edāngāngāni althlā.

● Dī touilung, kin lā lth isto: waigen kin dāunga isis stigan lth isto. Kum houítang kin dāunga dalung istas hansta dalung shūānstlo Israel hāadē il dāngangang kingān dalung ishin il dāngashang. An lth kutungāteo, waigen shantlan wautliwan gūd tliku Bible dalung shūtas kingān lth gundzu, waigen dalung kaḡunasang. Tada klālē stung gūd Samson Israel hāadē an itlagidēalang, waigen il kwōtalang.

## LESSON XV.

### SAMUEL.

SAMSON kwōtalang silid Eli Israel hāadē an itlagidēalang; waigen nung itlinga lā yūan il idjan. Nung laplētgon il idjāni, waigen Israel hāadē il ginkilisanḡangang. Israel hāadē wautliwan annu kin skadadālēu il ēlang. Eli kitilung stangang, waigen ltha stungan dāungaiaang. Eli Israel

hāadē an itlagidastlo Samuel tlakaiang, waigen il ou Eli ga lā il istaiang. Shantlan wautliwan gūd Eli tuman Samuel kāngang, altsilth nung itlinga kutungas an il inastlaiang.

Samuel taā klāalth wok chigwaustlo Shānungetlagidas lā an aiyangang : waigen hinū il shouan, Samuel. Houitang il kātlouang ken Eli ā il addang, Eli kin ga istatlie an il ūnshitē da il kwudangāni althlā. Samuel hin Eli shūtaiang : adlun lth iching dī an dung aiyingun althla. Eli hangtlan shouan : kum dung an lth aiyingāngun ; houshen lth stlth, wāigen lth katti. Houshen Samuel kattaiaang, waigen houshen Shālānā lā an aiyangang. Houshen Eli ā il kaiitang, waigen hin lā il shūtaiang : Eli, adlun lth iching, yenkien dī an dung aiyingun, altsilth wēata kin ga dung istatlas dī ga lth shūda. Hinū Eli shouan : Samuel, kum dung an dī aiyingāngun, altsilth houshen lth katti ; kum dung ga dī istatlānsi althlā. Houshen Samuel kattaiaang : waigen houshen Shālānā lā an aiyangang : waigen houshen Eli ā il kaiitang.

Wadlu Shālānā Samuel an aiyings Eli anūnshitālang, waigen hin lā il shūtaiang : tlistluan houshen dung an il aiyingstlo hin lth shu : kin an lth shu Shālānā, dung kitzada dung kil kwudungung. Samuel hin kwudungstlo, Eli lā an aiyangang il kwudangang. Houshen Samuel kattaiaang, waigen houshen Shālānā lā an aiyangang, waigen houitang Samuel hin shouan : kin an lth shu Shālānā, dung kil lth kwudungung. Shālānā hangtlan hin shouan : Eli kitilung stung dāungas althlā, Eli isken il kitilung ishin lth tlitāshang : waigen Israel hāadē wautliwan an dung lth itla-idēlthtālang.

Houitang houshen Philistine hāadē Israel hāadē an hāēlthtaiang, waigen Eli kitilung stung ltha tlitaiang. Tlistlan Eli giatlingē anūnshitālang tlo shā agwi il kouwaiang : waigen il kwutungēsti yūanāni althlā houitang kwōtalguns kingānu il ēlang. Kwōtalguns kingānu il ēlthstlo hank il tlitiedang, waigen hank il attawaiang. Il hēl ishin attawaiang, waigen houitang il kwōtalang. Tliku Shālānā Samuel shūtaiang kingānu Eli isken il kitilung stung ishin

waugang. Eli tada klālē stanshung gūd Israel hāadē an itlagidēalang. Yenkien Samuel nung itlinga kutungāgang, waigen kin lā Israel hāade il skadada kwanan.

Houshen Philistine hāadē nē lthanga kwolthtāiang, waigen kin wautliwan lthanga ishin: waigen houshen Israel hāadē kuniskidēgēlang. Israel hāadē hagunan Samuel Shā-nungetlagidas ā singelthkang gūshouang, waigen houshen Philistinē hāadē stāhā ltha il kaḡindaiang. Samuel Israel hāadē an itlagidēalang, waigen ltha kwutungē il tlatagwiēlang. Philistine hāadē ltha ga lthwaug yūanan, waigen Samuel itlagidastlo kum houshen Israel hāadē an hāēlthtiē da ltha kwudāngang. Shantlan wautliwan Samuel hēningaskialk kin las ltha il skadadaiang, waigen ltha wautliwan kwutungē kladska yūanan. Yenkiēn Samuel laplēt lā yūanu idjan, altsiilth tada klālē stanshung gūd Israel hāadē an il itlagidēalang.

Samuel kiāyēlang tlo Israel hāadē an kitilung stung il itlagidēlthtāiang. Il kitilung stung dāungaiang, altsiilth Israel hāadē kwutungēsti odzouang. Kum yenkien Israel hāadē il ginkilislāngwāgang, altsiilth Israel hāadē nung king gas istiē da kwudangang. Israel hāadē counsel gāgang, waigen hin Samuel ltha shūtaiang: nung king gas itil ga lth ista, waigen tliga kalat hāadē kingānu itil edasang. Tliga kalat hāadē ga king gas gē istagāgang, waigen ltha kingānu Israel hāadē waugē da kwudangang. Nung king gas ga ltha istatlaiang Samuel kitilung stung kum yenkien lth hāada ginkilislāngāngāni althlā. Tlistluan tliga kalat hāadē itil an hāēlthtiē da kwudungstlo, anung king gas itil an itlagidāshang, waigen itil gwikāēlthasang. King itil an lth tlaoutla; waigen yenkien itil il ginkilislungshang, waigen tliga kalat hāadē an talung hāēlthtiē da kwudungstlo itil kwunast il kāashang, waigen itil kwutungē kladskāshang hin ltha shūgang.

Samuel kwudangang tlo il kwutungēsti yūanan. Hinū il shouan: nung king gas dalung an lth istasken dalung kitilung il istāshang soldiers anna: waigen halthānounwē soldiers anna: waigen dalung titch lāgiē halthānounwē

kwunast il kil istalashang. Yenkien ltha itan innas halthā-nounwē kwunast langa il kil istalashang, waigen dalung wautliwan kuniskidē inēlthasang. Dalung touilung hāēlthta sitzē an il istāshang; waigen dalung gwudjanelung ishin shibili lā an tlaoutlāshang: waigen tou wautliwan lā an ltha tlinalingasang. Dalung wautliwan il kitzadalung isilthasang. Dalung giou kwulthkadazi dungalthan il istāshang, waigen kitzadalung ga il istāshang. Dalung giou tougānē ishin ga captaingas gē unga il istāshang. Dalung kitzadalung itlansidas lā an il kil lthāangwilāshang, waigen houitang dalung wautliwan kuniskidē inēlthasang. Kin wautliwan an lth kwudungo: wēata ān lth kutungātōo: waigen tlan Shālānā swaunan dalung an King gāshang.

Israel hāadē kum il kil kwudāngāgang, altsīlth Samuel hin Shālānā shūtaiang: O Shālānā, wēata Israel hāade nung king gas ga istatlang, altsīlth dī kwutungēstigung. Hinū Shālānā shouan: nung king gas ltha an lth tlaoutla, waigen tliga kalat kādē kingān ltha edasang. Samuel hin Israel hāadē shūtaiang: wēata Israel hāadē, nung king gas dalung an lth tlaoutlāshang, waigen tliga kalat hāadē kingānu dalung ēlthasang.

Shālānā Joshua Israel hāadē an itlagidēlthtaiang: waigen ginkilislānglēilung tada lagwau klālē stung gūd ltha ga il istaiang. Tada lagwau klālē stung hēlouang tlo Samuel ltha an itlagidēalang. Samuel kiāyēlang tlo nung king gas ga ltha istatlaiang, waigen Saul ltha an il king gaēlthtaiang.

## LESSON XVI

### SAUL.

Kish kitilung kwan yūanan, waigen il kitilung wautliwan telgu Saul kutungāgang. Ltha itan innas wautliwan telgu il lāgang. Kum Israel hāadē swaunshung lā kingānu edāngang, waigen il tagwia yūanan. Shantlan swaunshung gūd Kish kuitan unga gūdaiang, waigen hinū il shouan: Saul, singaigastlo kātūltha, waigen kitzadalung swaun lth ista,

waigen kuitanē dī na lth dīngō. Houitang tliku il aung shouan kingānu il waugang il kutungāgang althlā. Tliga jinga ā la da il dīngāgang, waigen il agung tahāgālang. Il kwutungēsti yūanan kum kuitanē il kiāngāni althlā. Tlistluan il agung tahāgālang tlo hinū il shouan : tligē unga gwi talung stilthzing dī hāagulth yūansi althlā. Hinū il kitza-dalung swaun shouan : kāhano ; Shānungetlagidas nung itlinga isis ā talung gundalzing, waigen giouk kuitanē isisgē itil ga il shūtāshang. Saul hin hangtlan shouan ; lāgung nung Prophetgas ā talung gundalzing, waigen itil kutungā-sang. Waigen nung Prophetgas ā il gundalouang.

Altsgēst ed kouit Shānungetlagidas hin Samuel shūtaiang : adātith nung itan innas lā yūan dung kingasang, waigen Israel hāadē an nung king gas il lth tlaoutla. Tlistluan Samuel Saul kāngang tlo houshen Shānungetlagidas hin shouan : anung itlingasu lāgung, altsiilth nung king gaan lth il tlaoutla. Lā lth ista, waigen Israel hāadē wautliwan an lā lth king gaēlthta. Samuel kingān waugang. Hinū lā il shūtaiang : Saul, dī kwunast lth kā, aiata dī alth dung tāashang. Saul lthwaug yūanan laou itan innāgang althlā. Houshen hinū Samuel shouan : kum lth lthwaugāng, waigen wēata dī kwunast lth kā, waigen dī alth dung tāashang. Saul kingān waugang. Houshen Samuel hin il shūtaiang : Saul, kwutungē unga lth kladskāda, wēata Israel hāadē wautliwan hangi dung inku iching, waigen ltha an dung lth itlagidēlthtāshāng. Adātith tligē unga gwi dung stilthasang, altsiilth kum kuitanē alth aiyuāng ginggangan edsi althlā.

Wēata dung lth king gaēlthtāsang Israel hāadē wautliwan anna. Saul kwutungē lthwaug yūanan, waigen hinū il shouan : Benjamin hāadasu dī iching : Benjamin hāadē kum kwanangung : waigen dī aung ishin kuniskidēgāgung. Yenkien itlagida gē langa hēlōgun, altsiilth kum Israel hāadē an dī lth king gādāng. Hangtlan hinū Samuel shouan : kumu alth dī aiyuāngung : Shālānā dung tatlātasang, waigen dung itlagida yūansang : Lthdou gwi il gundiētlouang, waigen Israel hāadē wautliwan il kāngang. Samuel kalka istaiang tou ā langa idjāni, waigen itan Saul kats inku tou il

giastlaiang; waigēn lā il skwuntlaiang. Hinū Samuel shouan: Saul wēata dalung an lth itlagidēlthtagun, waigen dalung an il king gāsang, waigen ga dāungas gē stāhā dalung il kagindāshang. Israel hāadē, lā lth kingo: wēata dalung an il itlagidāgung, waigen tliga kalat hāadē kingānu dalung ēdung.

Israel hāadē tliku Samuel shouan kwudangang tlo, Saul an ltha kwutūngē lā yūangāngang. Yenkien ltha kwutūngē kladska ēlang, waigen hin ltha shouan: King gas lth itil unga kaginda, O Shālānā; itil an nung King gas lth kaginda. Saul Israel hāadē an King gatlāgāngang, waigen itil an nung Queengas hangast il edāni. Houshen hinū Samuel shouan: Saul, wēata Israel hāadē an dung King gāgung. Tliga kalat hāadē an hāēlthtiē da dung kwudungstlo dī kū lth eda, waigen dalung hagunan Shānungetlagidas ā singelthkāng lth gūshūasang. Dī kū lth eda, waigen dalung an lth kātālā giūshang. Tlistluan dalung hāēlthtastlo dī ga lth shūda, waigen dalung ta lth tlātasang, waigen dalung kwutūngē kladskāshang.

Shantlan wautliwan gūd Philistine hāadē Israel hāadē an hāēlthtaiang, waigen kum Israel hāadē gwikāātlāngang, altsiilth Saul kwutūngē lthwaug yūanan. Shantlan chigwau Samuel kū il edang, waigen Samuel kum kātālāngang. Kum shantlan stānshunga gūd Samuel kū il edāngang; waigen Saul Israel hāade kaḡindiē Shālānā ā singelthkāng gūshouang. Tliku laplēt waus kingānu il wauḡang. Tliku laplēt singelthkāng gūshūs kingānu il shouan, altsiilth Shālānā lā an kātliylthdaiang. Tlistluan Saul singelthkāng gūshūwē tlanēlthtalstlo Samuel lā an kātālāgāng. Hinū Samuel shouan: gūshu dung istang? Yenkien wēata dī ga lth shūda. Saul hangtlan hin shouan: shantlau chigwau dung kū talung edaḡun, waigen wadla Shālānā ā singelthkāng talung gūshouang itil da il tlātḡēanā. Samuel hin Saul shūtaiang: yenkien dung kōnung yūangung, Shānungetlagidas giē kingwogungē dung tlahustaḡun althlā. Kum dī kū dung edānsi althlā, waigen tliku Shānungetlagidas dung shūtas kingān kum dung wauanguni althlā, houitang Israel



hāade wautliwan an kum dung itlagidāngshang, waigen houitang dung kuniskidē gēlthasang.

Houitang Israel hāade kuniskidē gēlang kum tliku Shālānā shouan kingān ltha wauangāni althlā. Saul iskin soldiergus gē klālē klālē lthūnith swaunan yekiu il istaiang, altsiilth tliga kalat hāade ga il lthwaug yūanan, kum il tagwiāngāni althlā. Houshen Samuel Saul kāngang, waigen hinū il shouan : Shālānā hin dī shūdaḡun, Saul Israel hāadē an lth King gaēlthta ; waigen ltha an dung lth King gaēlthtaḡun. Awolth agwi Amalek hāadē dalung tliitiē da kwudangang. Wēata ltha telgu dalung tagwiāḡung, altsiilth Amalek tligē ā lth istiēdo, waigen Amalek hāadē lth tliatodzūo. Āng, lth hāada wautliwan isken, lth chāada wautliwan ishin, lth hāhudila wautliwan ishin, mūsmūsgē ishin, lamatoē ishin, camelgē ishin, kuitanē ishin lth tliatodzūo. Kum lth hāada swaunshung lth kagindānga : ltha wautliwan tliatodzūo.

Houitang Amalek tligē ā soldiers unga il kil istiēdang, waigen Amalek hāadē ltha tliatodzouang. Tlan Agag swaunan ltha kaḡindaiang. Kistho Agag idjan ? Agag Amalek hāadē an itlagidēalang ; altsiilth tlan lā swaunan ltha kaḡindaiang. Saul ga soldiers gē kum lamatoē lā yūan tliāngang, waigen mūsmūs lā yūan ishin. Kin las wautliwan ltha kaḡindaiang, altsiilth tliku Shālānā shouan kingān kum ltha gundzuāngang. Kin dāunga wautliwan ltha hēlōdaiang ; waigen kintiga lā wautliwan ltha kaḡindaiang.

Houshen Shānungetlagidas hin Samuel shūtaiang : wēata dī kwutungēstigung Saul Israel hāadē an lth itlagidēlthtaḡuni althlā. Singaian Saul Samuel an kātīlagang ken hinū il shouan : Samuel, yenkien dung kwutungē lā yūangung, waigen Shānungetlagidas toui dung iching. Wēata kin wautliwan dī ga dung shūdaḡun kingān lth wangun : waigen Shālānā an dī kwutungē lāgung. Hangtlan hin Samuel shouan : kashintlou wēata lamatoē kil lth kwudungung : waigen mūsmūs kil ishin ? Waigen Saul hin hangtlan shouani : kiagin soldiers gē Amalek tligē stāhā althkwik ltha istaiang, waigen wēata Shālānā ga talung istāshang. Houshen

hinū Samuel shouan : kum lth kaiitāng; waigen aiat hal-gwau tliku Shālānā dī ga shūdaḡun lth kwudunga. Awolth kum dung itlagidāngun tlo Shālānā Israel hāadē wautliwan an dung King gaēlthtaḡun. Itan kingān hin dung il shūdaḡun : Saul, Amalek tligē ā lth kaiit; waigen Amalek hāadē wautliwan lth tlita : waigen kum lth hāada swaunshung kaḡindānga. Kashintlou kum Amalek hāadē wautliwan dung tlitāng ūdjang? Yenkien dung dāung yūaḡung il kil langa dung tlahustaḡuni althlā.

Hangtlan Saul hin shouan : tliku dī dung shūtas kingān lth waugun; waigen Amalek hāadē wautliwan lth tlitaodzūgun. Kiagin soldiers gē lamatoē istaiang, waigen mūsmūs gē ishin. Kin las wautliwan wēata Shālānā ga talung istāshang. Samuel hin shouan : Shālānā kum mūsmūs dānga ga istatlāngung, mūsmūs wautliwan lāgiou isis althlā. Shālānā kum lamatoē dānga ga istatlāngung, kintiga wautliwan lāgiou isis althlā. Shālānā kum dung an kwutungē lāngung kum il kil lā dung kwudungans althlā : altsūlth dung itlagida gē tlan il ēlthtaḡun. Shānungetlagidas kingwoguns kintiga telgu kwōyāgung : waigen kintiga dung kaḡindaḡuni althlā dung itlagida gē tlan il ēlthtaḡun. Saul hin Samuel shūtaiang : dī an lth wēata kwutungē unga lāda, dī dāungas althlā. Tliku dī ga dung shūtas kingān kum lth wauaḡuni lth hāada ga dī lthwaug yūaḡuni althlā. Dī kalthshint lth kwutung O Shālānā : dī kalthshint lth kwutung O Samuel, waigen giang nē ā lth dī alth kaiit; waigen houitang singelthkang lth gūshūasang Shālānā ā.

Hinū Samuel shouan : kum dung alth lth kaiitāngshang : waigen kum dung an dī kwutungē lāngshang : Shālānā giē kingwogungē dung tlahustaḡuni althlā. Samuel tligē unga gwi kaiitālang tlo Saul kātliyilthdaiang. Kōdets chakōna langa il gidsgildaiang ken langa il dungūlthgwaiaang. Houitang Samuel lā gwi hangouang ken hinū il shouan : kōdets dī na dung dungūlthgwasi kingān Shānungetlagidas Israel hāadē dung stāhā istaḡun. Houitang nung itlinga kalat Israel hāadē an il itlagidēlthtāsang il kil dung tlahustaḡuni althlā. Wēata dung telgu nung itlinga las Shālānā

istangwau il King gāēanā. Dī kil lth kwudung, waigen Agag althgwi dī ā lth ista. Waigen Agag kātīlāgang. Houitang Samuel Agag tīaiang sitzē alth. Samuel sitzē istaiang ken Agag lthwaugas tista il glīdista yūanan. Houitang Agag il sahaskidāni, waigen il kwōtalang. Wadlu Samuel tligē unga gwi stēlang: waigen Saul nē gwi unga stēlang. Kum houshen Samuel il kingāgang il kwutungē dāunga yūanāni althlā.

## LESSON XVII.

## DAVID.

JESSE kitilung stanshungāgang, waigen David tuana agwīgang. Il kitilung lth'unilth ga soldiers gē an Captain gāgang: waigen tlan David swaunan lamatoē kēsitang. Israel hāadē wautliwan an Saul king gaēlang, altsilth Jesse an il itlagidāgang. Shantlan swaunshung gūd Shālānā hin Samuēl shūtaiang: tlan lth kwutungē unga stita: Saul yenkien dāungang, altsilth wēata nung hāada kalat Israel hāadē an lth King gaēlthtāsang. Kin nīsanga ā tou lth unga ista, waigen Bethlehem tligē ā lth kaiit. Jesse giē nē ā lth kā, waigen il kit tuan agwi lth king gaēlthta. Samuel hin shouan: yenkien Saul ga dī lthwaug yūangung. Bethlehem tligē ā lth kaiits an il ūnshitalstlo dī il tīashang. Shālānā hin il shūtaiang: wēata Jesse giē nai ā lth kaiit, waigen tuman dung lth kingasang. Waikingān il wauḡang.

Jesse lā an kwutungē lā yūanan: waigen Shālānā hin Samuel shūtaiang: Jesse alth churchnē ā lth kā, waigen tliku kin dung istāsēs dung lth shūtāshang. Tliku Shālānā il shūtaiang kingānu il wauḡang; waigen Shālānā hin shouan: Jesse kit tuanas lth ista, waigen Israel hāadē an lā lth king gaēlthta. Houitang Samuel hin Jesse shūtaiang: kitilung wautliwan althgwi dī ā lth ista ltha kāngē da dī kwudungung, waigen Israel hāadē an dung kit swaunshung lth itlagidēlthtāsang. Jesse kitilung chigwau Samuel hangku istaiang. Shālānā kum il kitilung chigwau ga istatlāngang; waigen hinū il shouan: lth hāada kin kingūngs kingān kum Shālānā

kin kingāngung: lth hāada nung itlinga hangi swaunan kin gung; Shālānā tlou il kwutungē kingung.

Houítang Samuel hin Jesse shūtaiang: dung kitilung wautliwan ādlun gu is us? Waigen Jesse hin hangtlan shouan: kāhano: wēata nung swaunshung lamatoē kētsitang, waigen il tuana agwigung. Hinū Samuel shouan: lā ga lth shūda althgwi dī ā il kālth. Houítang Jesse David kīaiang, waigen hin lā il shūtaiang: houít, dī alth is Samuel dung ga istatlas althlā. Waigen houítang lā an il kātāgang. Lā an il kātāgang tlo hinū Shālānā shouan: Samuel giatla, waigen il kats inku tou lth ista kin nīanga stāhā; waigen Israel hāadē an lā lth itlagidēlthtāsang. Samuel David kats inku tou giastlaiang, waigen lā il king gaēlthtaiang. Yenkien David hangi s'hetalhtta yūanan; waigen il kwutungē lāgang. Saul kwutungē dāungaiang, altsiilth Shālānā Saul dāngang: waigen houítang hānts las Saul stāhā kaiitang ken David inku isiēlang.

Houítang hānts dāunga Saul inku isiēlang, waigen il kōnūngālang. Il kōnūngālang tlo hinū il shouan: stlakinganu lōgas dī ā lth isto; waigen kīsītlū dī kōnūngālang tlo tlistluan stlakinganu lth kwudungsken houítang dī kutungēlthasang. Houítang il kitzadalung swaun hin shouan: nung stlakingans lā yūan an dī ūnshitung. David hinū il kēyang, waigen Jesse kitu il iching. Yenkien il kutungā yūangung; waigen tlistluan dung kōnūngālastlo dung il tlanūngistlāsang. Saul Jesse giē nai ā ga soldiers gē kil istiēdang, waigen nung soldiergus hin shouan: Jesse kitlano dung kit tuanas iching? Hangtlan hin Jesse shouan: gūsh annu lā ga dalung istatlang? Hinū anung soldiergus shouan: Saul David ga istatlang. Tlistluan il kōnūngālastlo David lā hangku stlakinganē da il kwudungung houítang il kutungā ilēanā. Jesse shibili gē istaiang, winegē ishin, kimptiē ishin; waigen ā kin isis wautliwan Saul ga il hanshūtaiang lā an il kwutungē lāgāni althlā. David ishin Saul an kātāgang, waigen Saul lā an kwutungē lā yūanan; waigen lā il captain gādaiang. Tlistluan Saul kōnūngālung tlo David stlakinganang, waigen houítang hānts dāunga stāhā lā il kaḡindaḡangang.

Saul Israel hāadē an itlagidēalang tlo Philistine hāadē ltha an hāēlthtiē da kwudung giāgangang. Shantlanē kwan gūd Philistine hāadē lthdou inku shā idjāni; waigen Israel hāadē ishin adshgūst wauhantlā lthdou inku idjan. Shantlanē klālē stanshung nung itlinga tagwias Philistine hāadē stāhā hetga il kāsken itan Israel hāadē ā il kaītang: waigen gwudglu saonglu il giāgangang, waigen Israel hāadē ā ginggangan il gūshūgangang. Hinū il shouan: Israel hāade, kashintlou althgwīk dalung ichingūng? Kashintlou Philistine hāadē an hāēlthtiē da dalung kwudungūng Philistine hāadē shū hāēlthtalē yūan dī iching. Saul, nung itlinga tlakōna dī ga lth ista lā lth gwudan hāēlthtiēanā. Lā lth tiasken. Philistine hāadē kitzadalung dalung isīlthasang: dī il tiastlo, dalung kitzadalung Philistine hāadē isīlthasang. Kasino anung itlinga tagwias kēyaiang? Goliath hinū il kēyāgang. Tatalthtā klāalth wok swaunshung il zūwē jangang, waigen il tagwia yūanan. Nukanadz tatjingē ā il kwudajang: sitze lā kin yūansi lā il istaiang, waigen yātz kōdets ishin ā il sitijang. Kin kladska kwan yūan ishin il istaiang. Yenkien Israel hāadē wautliwan an nung hāēlthtas ga lthwaug yūanan.

David kwaialung lth'unilth ga soldiers gē an Captain gāgang. Shantlan swaunshung gūd il aung hin shouan: David, shibili lth ista, corngē ishin, cheese gē ishin, waigen kwaialung ā lth giāla, tliku dung kwaialung edgē dung kāngēanā. Singaian David kātlouang, waigen il kwaialung il kingātlaiang. Goliath hetga il king kāalang, waigen Israel hāadē wautliwan lā ga lthwaug yūanan, waigen houītang agung ltha saalāni. Houītang hinū David shouan: kum lā ga dī lthwaugaangūng lā an hāēlthtiē da dī kwudungs althlā. Gūshū Saul dī ga istāshang anung hāēlthtas lth tiastlo. Israel hāadē hin shouan: Goliath dung tiasken Saul kin kwōyā yūan dung ga ista kwanasang: il gwudjan ishin: waigen dung il itlagidēlthtāsang. Tliku David shouan houītang il kwaialung anūnshitālang. Lā an il kātliyildungouang, waigen hin lā il shūtaouang: kashintlou ādlun dung isūdjang? yenkien dung kwutungā shā ēdung,

altsilth Philistine hāadē an talung hāelthtiē dung kängēan  
ādun dung kätlagun. Wēata tligē unga gwi lth stilth,  
waigen lamatoē unga lth kētsit, kum dung ga itil istatlāns  
althlā. Hinū David shouan : gūshū wēata lth istagun : wēata  
dalung ā shibili lth gīālāgun, wagien dalung an dī kwutungē  
lāgun : altsilth kum tliku silthkang lth stel tlingē käng  
gaangung.

Tliku David shouan Saul anūnshitālang tlo lā gwi il  
takingwoğangang. Houitang David Saul ā kaiitang, waigen  
hin lā il shūtaiang ; kum Israel hāadē anung itlinga tlakōnas  
ga lthwaugatlāngu. Tlaou lā an hāelthtāsang, waigen lā lth  
tiashang. Hinū Saul shouan : kumu dung tagwiāngung  
waikenan lā an dung hāelthtāsinsa. Nung itan innou dung  
iching, waigen anung itlinga yenkien hāelthtālē tagwiāgung.  
David hin shouan : dī itlagīda, shantlan swaunshung gūd  
aung unga giē lamatoē lth kētsitan, waigen lion lamatoē  
swaunshung glāadzağuni : lā tlā lth duaidun tlo il helthli  
stāhā lamatoē lth dungtlilthağuni. Shantlan kalat gūd hōtz  
lamatoē swaunshung glāadzağuni, waigen lā tlā ishin lth  
duaidun tlo il helthli stāhā lamatoē lth dungtlilthağuni.  
Lion dī tīe da kwudangang tlo lā lth tiğun, waigen hōtz an  
ishin : altsilth kum anung itlinga tagwias ga dī lthwau-  
gaangung. Lion kingānu il edstlo houitang lā lth tiashang,  
waigen houitang lion kwōtalğuns kingānu il ēlthasang.

Saul hin shouan : kaiitla, waigen Shālānā dung alth  
stungashang. Saul yātz kōdets David ga istaiang : nukanadz  
tatjingē ishin : sitzē lā yūan ishin : waigen kin kladska kwan  
yūan ishin lā ga il istaiang. Yenkien David yātz itlinga  
kingānu edang. Houitang David hin shouan : kum ā kin  
isis ga dī istatlāngung ; waigen il dāngodzouang. David  
taskgē unga istaiang, waigen kwau lā ki klēlth hānlth stāhā  
il istaiang, waigen gwaulē ai unga il istaiang. Shūwangu lā  
yūan unga il istaiang. Philistine hāadē adshi lthdou inku  
idjan ken Israel hāadē lthdou ingūst inku idjāni. Houitang  
shā stāhā David lā ā kaiitang tlitzan anung itlinga tagwias  
gīansā. Yenkien anung itlinga dāunga David an kätliyilth-  
daiang ken hinū il shouan : dung kwudungstlo hā gu dī is



hin dung kwudung us? ginggangan kin ed dung alth di ā dung kāsā. Di ā lth kā, waigen dung tlū hinawē ettitē ga lth istāshang, waigen dung tlū hinawē kalat kintiga dāunga ga lth istāshang. Yenkien dung lth hēlōdāshang.

David hin hangtlan shouan: kum dung ga di lthwau-gaangung. Wēata yatz kōdetsi ā dung sitiching: nukanadz tatjingē ā dung gwudiching: sitzē kladska yūan dung tligungung, waigen kin kladska kwan yūan ishin. Kum dung ga di lthwau-gaangung: Shālānā kēyi dungalth dungā lth kāgung, waigen Israel hāadē an il itlagidāgung. Adshi shantlanē Shālānā di stlē kātli ā dung istāshang, waigen dung lth tīashang: dung hē! ishin washt lth skikātāsang. Houitang dung tlū kintiga ga lth istāshang, waigen tlan Shālānā swaunan tagwias an ltha wautliwan ūnshitalthasang. Yenkien anung itlinga tagwias Shālānā ā gūshou dāunga yūanan; waigen sitzē yūan unga il istaiang ken yenkien hin il wadal yūanan. Houitang David gwaule stāhā kwau unga istaiang ken shūwangwē inku kwau unga il istaiang. Shūwangwē ā il zinzulthtastlo alth il kutdāni, waigen kwul ik kwau langa addouang. Houitang tligē inku lā il kut tlidalth-taiang, altsiilth David gwikāēlang. Houitang David Goliath giē sitzē istaiang ken lāgiē sitzē alth il hēl lā il skikitlaiang, waigen Goliath kwōtalang. Houitang Philistine hāadē tliga unga gwi stēlang, Israe! hāadē ga ltha lthwau-gaangung yūanāni althlā. David Goliath tīaiang, waigen Philistine hāadē stāhā touilung il kagindaiang.

Israel hāadē wautliwan kwutungē lāgang, Goliath kwōtalang althlā. Israel chāadē wautliwan David an kwutungē lā yūanan, waigen hin ltha shouan: Saul tliga kalat hāadē klālē klālē klāalth tlitaiang, waigen wēata David tliga kalat hāadē lagwau klālē klālē klēlth tlitagun. Tlistluan Saul Goliath kwōtals kāngang tlo David ā il killāgang, waigen gwudjan unga lā ga il istaiang. Lā il itlagidēlthtaiang. Tlistluan tliku lā chāada shouan Saul anūnshitālang tlo David an il kātliyitndaiang. Yenkien David tīe da il kwudangang, waigen Israel hāadē ga il lthwau-gaangung. Wēata kum Shālānā dalung yetānsken tliga kalat hāadē

dāungas kingānu dalung edasang; waigen hetgwaugē ā dalung isisang, waigen hetgwaulana dalung an itlagidāshang.

David Goliath tiaiang silid Saul gwudjan unga David ga istaiang. Israel hāadē wautliwan David kwoyād yūanan. Washt ed kouit houshen Saul kōnungalth yūanan, waigen tista il glidista yūanan. David lā hangku stlakingang tlo sitzē alth David il kitang. Il kätliylthdaiang althlā kum yenkien lēi lā ottawāngang. Shālānā tuman David kāngang, waigen Saul kum il tiāngang. Houitang Saul giē nē stāhā David addang, waigen nē gwi unga il stēlang Saul ga il lthwaug yūanāni althlā. Saul houitang ga soldiergus gē lā il istaiang ken hinū il shouan: aiat singyāstlo David giē nē ā lth istiēdo waigen lth il tfo. Tliku Saul shouan David chā anūnshitālang tlo hin David il shūtaiang: David, houit hetga lth kālth, waigen tliga kalat ā lth kaiit, waigen kum dī hāt dung tiāngshang. Wēata kum agung dung kaḡindānstlo dī hāt giē soldiers gē dung tiashang.

Naioth tligē ā il kaiitang ken Samuel lā alth idjan. Tlis-  
tluan Saul anūnshitālang tlo il kätliylthdaiang. Naioth tligē  
ā soldiers gē unga il kil istiēdang ken hinū soldiers gē il shū-  
taiang: David lth isto, waigen lth il tfo: Israel hāadē an  
king gāgē da il kwudungs althlā. Ga soldiers gē Naioth  
tligē ā istiēdang, waigen David ltha kāngang tlo lā ga ltha  
lthwaugālang Samuel alth il idjāni althlā. Ga soldiers gē  
houshen tliga unga gwi stēlang. Saul houshen ga soldiers  
gē Naioth tligē ā kil istiēdang, waigen houshen kum David  
ltha tiāngang. Houshen Saul ga soldiers gē tagwia yūans  
istaiang, waigen houshen hinū il shouan: Naioth tligē ā lth  
istiēdo waigen David lth tfo, waigen dalung an dī kwutungē  
lāshang. Houshen David ga ltha lthwang yūanan ken  
houitang tliga unga gwi ltha stēlang. Itan Saul kätliylth-  
daiang waigen hinū il shouan: kum David ga dī lthwaug-  
aangung; waigen wēata lā lth tiashang. Saul Naioth tligē ā  
kaiitang, waigen ga soldiers gē lā alth kwan yūanan. Hin  
Naioth hāadē alth il kīānangang: kitlano David iching;  
kitlano Samuel iching? Naioth hāadē hin hangtlan shouan:  
itanu Ramah tligē ā il istiēdwugun: altsfilit Saul isken ga

soldiers gē ishin Ramah tligē ā ist iēdang. Tlistluan Samuel il kāngang tlo hānts las il kwutungē ā idjan, waigen Samuel an il kwutungē lāgang. Tlistluan David Saul kāngang tlo il lthwaugaiang, waigen Nob tligē ā il kaiitang. Nung laplētgas alth il idjāni, waigen houshen Saul David tlā kaiitang. Shantlan swaunshung gūd David hin laplēt shūtaiang: shibili dī ga lth ista, waigen tliga kalat ā lth kaiitshang. Anung laplētgas hin shouan: kumu shibiligē kiagin nai ā isāngung. Shibili alungē kwu klēlth churchnai ā ichingwau, waigen adshi shibiligē Shālānā giou iching. David hin shouan: adshi churchnigē shibiligē dī ga lth ista, waigen dung an dī kwutungē lāshang. Kasino anung laplētgas kēyaiang? Abimelech hinū il kēyaiang. Tliku Shālānā shouan kingānu kum il wauangang, waigen shibili kwu klēlth lā ga il istaiang. Saul anūnshitālang tlo ga laplētgas klālē stanshunga wok klēlth il tlitaiang.

David shibili istaiang ken Achish tligē ā il kaiitang. Achish hādē an nung itlagidas David anūnshitālang tlo houshen David lthwaugaiang. Kashintlou anung itlagidas ga il lthwaug udjang? Itan awolth David Philistine hādē tlitaiang, waigen anung itlagidas ltha alth stangang. Houitang Saul ishin Achish tligē gu kātāgang; waigen David lthwaugaiang, altsilth Achish tligē stāhā il kaiitang. Engedi tligē ā il kaiitang waigen touilung dungalthan. Engedi tligē kwau yūan alth stāouwaiang. Saul adshi tligē gu kātāgan lāgiou soldiers dungalthan. David tiē da il kwudangang, altsilth kwau kalthgwīd David da il dtingangang waigen kum lā il kiāngang. Houitang Saul hāgālang, waigen tish hellā hetit il hāgulthskan il katsaiang, waigen ā il tīgāng soldiers gē dungalthan. Tlitzan David tidas kwulth silthli il tīgāng, waigen kum David tidasi an Saul ūnshitāngang. Hinū David giē soldiers gē shouan: wēata Saul lth tīi, waigen Israel hādē wautliwan an dung King gāshang. Hinū David hangtlan shouan: kāhano; kum Saul lth tiāngshang Israel hādē wautliwan an Shālānā Saul King gāelthtaḡuni althlā Saul tidas ā il kāgang, waigen kōdets lā il gidsgildaiang ken langa il kētsitlaiang. Waigen Saul kum anūnshitāngang.

Saul singaian kätlouang ken il kăgwălang. Tlîi stăhă il kăngăni tlo David ishin lâ sili stăhă kăgwălang, waigen shă kwau inku il kătłătlaiang ken hinû il shouan: Saul, kôdetsi lth unga king; halgwau gûshăg dî kwulth dung tîdagun, waigen dung tiîe da dî kwudungstlo dung lth tiasgaiahanġunwau. Kum dung tiîe da dî kwudungăġun, altsilth dî kwulth dung tîdagun tlo dung lth hëningădagun. Wëata dî an dung kwutungë lâsken dung an dî lâsang Dahou tagwiă yûangŭġwau, waigen kum dî tagwiăġung Dahou Israel haadë an King găgung, waigen diu skî kingăn edungwau. Kashintlou tliga jinga stăhă althkwik dung isûdjang? Kashintlou skî hutsu tiîe da dung kwudungŭng? Wëata tliga unga gwi lth stilth: dî an lth kwutungë unga lâda, waigen dung an ishin dî kwutungë lâshang. Saul hin hangtlan shouan: kum dung an kwutungë lăgë da dî kwudungăġung: dung lth istasken dung lth tiashang Saul kwutungë dăungaiang: il kwutungë chănsi lâ an dăungaiang, waigen il kilthkadung giġgangang, altsilth David tliga jinga gu năgiġgangang.

Wadlu Israel hăadë kum tagwiăġang Saul David tiîe da kwudangăni althlă, waigen Israel hăadë David an kwutungë lăgang. Philistine hăadë houshen Israel hăadëan hăêlthtaiang. Saul yenkien lthwaugaiang, waigen ltha kônungelguns kingănu il edang: kum lth hăada tagwias lâ kwulthlu isăġang. Philistine hăadë gwikăêlang, waigen Saul isken il kitilung ishin ltha tlitaodzouang. Israel tligë ishin ltha hokulthtaiang, waigen Israel tligë gingġangan ltha tlaêlang: altsilth houshen Israel hăadë kuniskidëġelang. Tlistluan David Saul kwôtalang anûnshitălang tlo Israel hăade wantliwan il istaiang soldiers anna. Israel hăadë houshen Philistine hăadë an hăêlthtaiang, waigen David giê soldiers ġë gwikăêlang. Israel hăadë David an kwutunkë lăgang, waigen David ltha King gaêlthtaiang. Saul kwôtalang siliđ David Israel hăadë an King gaêlang, waigen Shălănă lâ alth stangang. David itlagida lâ yûanu idjan, waigen tliga kalat hăadë wantliwan stăhă Israel hăadë il kăġindaiang.

David itlagidăġang tlo Israel hăadë wantliwan kwutunge

HAIDA.

F

kladska yūanan, waigen Shālānā ā singelthkang ltha gūshū-gāngang. Hinū David shouan : singai wautliwan gūd Shālānā a singelthkang lth gūshū, waigen lā ā lth killou : lā ā dalung killāstlo tou isken kin giandas ishin kin lā wautliwan ishin dalung ga il istāshang. Sīntadjā wautliwan gūd lā ā singelthkang lth gūshū, waigen kin dāunga dalung istas washt il kishūasang; tuman dalung ishin il kingasang. Singyā wautliwan gūd dalung dāungas lā ga lth shūdo, waigen dalung kwutungē il tlasqwunagelthasang. Lā lth kwōyādo, waigen ga dāungas gē wautliwan stāhā dalung kaḡunasang. Lā lth yeto, waigen tliga kalat hādē telgu dalung kwutungē kladskāshang. Lā ā lth killou houshen shantlan kalat dalung kinguni althlā : waigen halgwau gūd tuman dalung il kagindāshang.

David Psalmgē kwan yūan kālangāngang. Lamatoē il kētsitang tlo Psalmgē klālē stung wok lth'unilth il kālangang. Hinū il shouan : Shālānā lamatoē kētsitlē lā dī na iching, altsiilth kum kin et hutsu ga dī istatlāngshang. Shālānā il yeta yūanan, waigen Shālānā tuman il kāngang. Houshen Psalmgē kalat hin shouan : O Shānungetlagidas dī kalthshint lth kwutung, waigen dī dāungas washt lth kishu. Wēata dī dāungas hansta lth shūgung, waigen dī dāungas dā hangku is gūgung. Dī dāungas hangi unga lth saal, waigen kum hānts unga las dī stāhā lth istaang. O Shālānā dī kwut lth wastdaastla, waigen dī dāungas hansta lth shūasang.

Yenkien David King gaēlth yūanēlang, waigen kum nung King gas David kingānu edāngang. Shālānā hin il shūtaiang : wēata nung itlinga lā lth kīgūn, waigen dī kwutungē kingānu il ēdang. Kum klingān il kwutungē dāungas lth kingāngūn, altsiilth lā an dī kwutungē lāgung : tliku lth shūs ishin kingānu il waugung. David Israel hādē kwutungē lāgē ga istatlaiang altsiilth hinū il shouan : churchnē ā lth istzoo, waigen Shālānā ā lth killou : kin lā wautliwan dalung ga il istasi althlā. Wēata David giē Psalmgē churchnigē ā talung katzu gūgung. Psalmgē kalat hin shouan : katzou houtlā alth Shālānā ā lth katzūo kin an kaldunga il tlaoutlas althlā. Il soolgüst alth, waigen

il yhē lāsi alth lā gwikāēlang. Shālānā kin alth kaginsh unga an ūnshitgēlthtaiang, waigen lth hāada wautliwan hangku kin las unga il kingdaiang. Israel hāadē kalthshint il kwutangang: waigen tliga kalat hāadē wautliwan an il itlagidāgung. Tliga wautliwan Shālānā ā lth katzuo: tlikagūlā lth agung kingdou: tlika lth gūlādou: waigen sing. lā ā lth killou. Shālānā ā lth killou harpgas inkū: hukunganu alth isken stlakinganu alth ishin Shālānā ā lth katzūo. Agwan hānth yūandas stlantlakadanda: waigen agwan lth kētsuwau kwudungalth Shālānā hangku tlikagūlāda, adshi tligē gu il kātāsēs althlā lth hāadā il ginkilislungēanā.

Kin skadadā lēilung isken: gūshou lēilung ishin: ga laplētgas gē ishin lā an kwangung. Churchnē wautliwan ai ga laplētgas gē kin lā lth hāada skadadaḡangang: schoolnē wautliwan ai kin skadadā lēilung lth hāada skadadaiang: waigen gūshou lēilung ishin lth hāada kin kutungas skadadaiang: altsiilth Israel hāadē wautliwan kwutungē lā yūanan. Laplēt wautliwan David an kwutungē lāgang nung itlinga lā il idjāni althlā. Shantlan swaunshung gūd David churchnē yūans tlaoutliē da kwudangang, waigen adshi churchnē Shālānā ga istiē da il gwaulang. Houitang nung Prophetgas David an kātālagang ken hinū il shouan: David, Shānungetlagidas kum churchnē yūans dung tlaoutliē da kwudungangung. Dung stlē ai alth stāouwāsi althlā, altsiilth churchnē dung tlaoutliē kum lāngung. Tliga kalat hāadē kwan yūan il tlitaiang, altsiilth il stlē ai alth stāouwāgang.

Yenkien il kwutungēsti yūanan Shālānā kum churchnē yūans il tlaoutliē da kwudāngāni althlā. Houshen anung Prophetgas lā an kātālagang ken hinū il shouan: David, kum lth kwutungē unga stitāng: wēata dālā kwan yūan lth ista: gold ishin: kwau lā yūan ishin: sahalhtlan lā yūan ishin: waigen kin lā gwudila ishin: waigen tuman lth unga king. Tlistluan dung kwōtalstlo dung kit churchnē yūan tlaoutlāshang, waigen Shālānā lā an kwutungē lāshang. Wai-kingān David waūgang. Dālā kwan yūan isken: gold ishin:



kwau lā yūan ishin il istaiang: altsilth David churchnē lā yūan tlaoutliē tatlāēdang. Tlistluan il kwōtaltalang tlo ltha kutungas wautliwan an il aiyangang ken hin ltha il shū-taiang: dī kwōtaltalgung, waigen tlistluan dī kwōtalstlo Solomon dī kit isis tuman lth kingo: lā lth tlakutungēltho Israel hāadē wautliwan an il King gaēlthasēs althlā. Solomon dalung wautliwan kwoyādiē da dī kwudungung. Shālānā giē kingwogungē ishin tuman lth king, waigen kingān lth waugūu. Kingwoguns langa dalung tlahustastlo tliga kalat hāadē haldungou dalung isilthasang. David kwōtalang, waigen Solomon Israel hāadē an itlagidēalang. Wēata dī touilung, David kingān lth kwutungē unga edo waigen hin lth shūū: O Shālānā itil dāungas lth washtkīshu, waigen kum lth hānts unga las itil stāhā istaang. O Shālānā itil dāungas stāhā lth hangi unga saal, waigen itil kwutungē tlaskwuna. Wēata lā ā singelthkang lth gūshū waigen David kingān dalung kwutungē il tlaoulthlāgelthasang.

## LESSON XVIII.

### SOLOMON.

DAVID kwōtalang silid Solomon Israel hāadē wautliwan an itlagidēalang, waigen laou King ga lā yūanu idjan. Kum nung itlinga Solomon kingān kutungāgang. Kōgīna kwan yūan il kālūngāgang. Proverbs il kālāngang. Itan innas wautliwan hin il shūtaiang: wēata itan dalung innas, Shānungetlagidas dalung tlaoutlaiang an agung lth ūnshito, waigen tlistluan dalung kiēlthstlo dalung kutungāsang Shālānā hangi tliga wautliwan gu iching: ga dāungas gē il kingung, waigen ga las gē ishin. Ān lth kutungātoo, waigen dalung an il kwutungē lāshang. Ga kutungas gē Shālānā ga lthwaugung: ga dāungas gē ltha kōnungēlguns kingānu ēdung, waigen lth hāada kōnunga kum Shālānā ga lthwaug-aangung. Yenkien Solomon kutunga yūanan. Lthken gwudila ed wautliwan annu il ūnshitaiāni: hāna gwudila ed wautliwan ishin: kin hōllē wautliwan kēyi an ishin il ūnshī-tang: kin wautliwan kēyi an ishin.

Tliga kalat jinga stāhā itlagida kwan Solomon an istlāgang il gūshouwē kutungas an ūnshitē da ltha kwudangāni althlā. Queen of Sheba ishin Solomon an kātllāgang, waigen kin kwōyā yūan saouhadan lā ga il ista kwanan, waigen lā an il kwutungē lāgang. Solomon gūshouwē il kwudangang tlo yenkien il kwutungē langa hēlouang, Solomon kin wautliwan anūnshitāni althlā. Hinū Queen of Sheba shouan : Solomon, yenkien dung itlagida lā yūangūng : dung kwutungē ishin lāgūng : dung kitzadalung ishin : waigen lth hāada wautliwan telgu dung kutungāgūng. Wēata Shālānā lth kwōyādung dung il tlakutungā yūansi althlā : waigen tliga unga gwi il stēlang.

Shantlan swaunshung gud lth chāada stung lā an istlāgang ken hinū il shūouang : dī itlagida, itil kwutungēsti yūans wautlassaaskit. Nung chada swaunshung hin shouan : singyāgūn tlo giang tidanē inku lth tidaḡun, waigen dī kit ishin dī alth tidaḡun. Laou tagwiāgūn, waigen kum il stiāngūn. Singyā wautliwan gūd kit unga tuman lth kingūng lā lth kwōyāda yūansi althlā. Anung chada dāungas dī kit dī stāhā kwolthtaḡun ; waigen il kit kwōtalas washoutka dī ga il istaḡun. Tlistluan lth kiūtlāgūn tlo kit unga lth kingūn, waigen nung kalatu iching. Hinū, Solomon shouan : kīstho dung kit kwolthtaḡun ? Kasino il kēyang ? dī ga lth shūda waigen kētsit nē ā lā lth istāshang. Anung chada shouan : anung chada issu dī kit istaḡungwan, waigen il kit kwōtalas washoutka dī ga il istaḡun. Anung chada dāunga shouan : kumu tlaou il istaangūn dung kita, yenkien dung kilthkadungūng. Solomon hin shouan : lth hāhudila stung althkwi lth dī hangku isto : waigen lā ā kitilung ltha istaiang. Solomon lth hāhudila stung kāngang ken hinū il shouan : kiagin soldiers ge, anung hāhutsu tagwias gwudglu saouglu lth kētato, waigen lth chāada stung kwutungē lashang. Nung hāhutsu tagwias ou hin shouan : kum lth il tiāngu ; waigen dī kit wēata lth kaḡinda, waigen anung chada dāungas ga lth il isto. Houītang Solomon hin shouan : anung hāhutsu tagwias anung chada las ga lth isto yenkien il ou iching : waigen nung hāhutsu kwōtalas anung chada

dāungas ga lth isto: nung hāhutsu tagwias ou il isisken, lāgung: il kwōtalē lāgung kum hir il shoutlingāngun, anung tagwias thīē da il kwudungsi althlā.

Solomon king gaēlang tlo churchnē yūans il tlaoutlaiang. Ga lthāangwilas gē kutungas isken: stlinlā lēilung ishin il istaiang; waigen kin lā wautliwan ltha tlaoulth ēlthkigang churchnai ā. Aung unga giē gōlē isken: dālā ishin: kin wautliwan il daas langa il istaiang; adshi churchnē tlaoutliē da il kwudangāni althlā. Churchnai ā kum klingān hutsu tlilthē alth kin kutduns ltha kwudungāngang. Wadshgwau agwi kin ltha tlaoutlas wē ltha istağangang. Kin ltha tlaoutlas wauga ltha tāisgudanskenan yenkien lāğangang. Tada chigwau gūd adshi churchnigē ltha tlaoutlaiang, altsūlth kumu Solomon giē churchnigē kingān churchnē edāğangang.

Solomon sahalhtlan swaunan churchnigē an il tlimit tatğangang, waigen sahalhtlan swaunan wau ingūd itliāğangang: shāshi nē kāan ishin sahalhtlan swaunan idjāğang. Adshi churchnē kātli sahalhtlan swaunan ishin istijouang. Gold swaunan tlimit il isilthtaiang: ingūd ga itlias gē an ishin: tiskwan ishin gold swaunan il isilthtaiang, waigen kum klingān sahalhtlanē kāğ gaangang: tlan gold swaunan isilth ltha kāğang. Kūwē wautliwan ishin sahalhtlan swaunan tistlaiang, waigen kūwē wautliwan ltha kētdāğang: wadlu wau ingūd gold ltha istağangang. Nē kātli ā kin kwulthoutalsi sahalhtlan swaunan idjāğang, waigen wau ingūd gold ltha istağangang. Tatchgwau kin inku laplēt giangs gē ishin sahalhtlan swaunan idjāğang, waigen wau ingūd gold ltha istağangang. Singelthkang giouk ltha gūshūs gē ishin sahalhtlan swaunan idjāni, waigen wau ingūd gold ltha istağangang. Adshi churchnigē kātli kētdatijouang, waigen yenkien adshi churchnigē lā yūanan. Tablegē isken kin wautliwan churchnē ā isis ishin gold swaunan idjāni. Tliga kalat hāadē adshi churchnē kāğang tlo kwutungē hēlouang.

Tlistluan adshi churchnigē tlitchian ēlthkigang tlo Solomon churchnigē ik katsaiang, waigen ga laplēt gas kwan yūan lā tlā istālang: waigen Israel hāadē kwan yūan

laplētgas gē tlā istālang. Ga laplētgas gē gold tablegē isken, gold kāsotouho ishin, gold hōtē giā Law isisas gē ishin, gold kēlthka ishin churchnē ai istaiang. Laplēt kwan yūan adsh-gūst tluadaiang, waigen wauhantlā ishin laplēt kwan yūan-an. Kin tlikits katgūst Solomon gangang: shā il yhējālang ken hinū il shouan: O Shālānā, wēata tung ā lth killāgung tuman dī dung kings althlā: waigen wēata adshi churchnē dung ga lth istāshang. Churchnigē lth ista O Shālānā waigen dī kwutungē lāshang. O Shālānā adshi churchnigē ā Israel hāadē tung ā singelthkang gūshūstlo ltha kil lth kwudung, waigen itil dāungas lth dakiskit: itil kwutungē ishin lth tlaskwuna. Israel hāadē kwutungē dāungas dung kingstlo, waigen adshi churchnigē ā tung ā singelthkang ltha gūshūstlo ltha kil lth kwudung, waigen ltha ta lth tlat: waigen houītang Israel hāadē tliku kingwoğuns shouan kingān ltha waugīlshang. Tlistluān tliga kalat hāadē itil an hāēlthtiē da kwudungstlo, waigen ādlunē tung ā singelthkang talung gūshūstlo itil ta lth tlāt: ga dāungas gē stāhā lth itil kağinda: waigen tliga kalat hāadē lth hēlōda. Hānlthē isken tou ishin gūstlo, waigen dung kēyi ā singelthkang talung gūshūstlo houītang lth itil tatlāt: waigen kin ga itil istatlas kingān lth itil ga ista. Itil ta lth tlāt O Shālānā, waigen kum hānts unga las itil stāhā lth istāng. Awolth itil aungalung ta dung tlāēdangang kingān lth wēata itil ishin tatlāt. Adshi tligē dunğiou iching: wēata O Shālānā itil alth stung gū, waigen Israel hāadē tuman lth king. Kūwē dāungas gūd talung istalstlo lth houītang stāhā itil tlastilth, waigen kūwē las gūd itil lth istalyādağī. Wēata O Shālānā, itil kwutungē tlaskwuna, waigen kin las swaunan itil ga lth ista. Itil dāungas ishin lth washtkishu, waigen itil kwutungē tlatā. Yenkien Solomon singelthkang gūshou lā yūanan, waigen Shālānā lā an kwutungē lāgang. Tlan singelthkang il gūshūğigang tlo ltha zanouādağuns kingān churchnē kātli ēlang. Lth hāada lthwaugodzouang, waigen houītang ltha tikwoanstla odzouang. Ltha zanouādağuns kingān churchnē kātli ēlang Shānungetlagidas gaigu idjāni althlā.

Solomon Israel hāadē an King gaēlang tlo ltha wautliwan kintlingāgang, waigen tliga kalat hāadē ltha kitzadalungu idjāni. Gold isken, dālā ishin, kwan kwōyā yūan ishin, kin lā gwudila ed wautliwan ishin Israel hāadē an kwanēlāni. Tliga kalat hāadē kwan yūanan il itlagidēalang, waigen shantlan wautliwan Solomon hēningaskialk Israel hāadē wautliwan kwutungē lā yūanan. Kum nung King gas kalat Solomon kingānu kutungāgang. Solomon kwōtalang silid Rehoboam il kit Israel hāadē an itlagidagē da kwudangang. Houitang Israel hāadē titch lā an kwutungē kätliylth daiang ken hin ltha shouan: kum Rehoboam itil an King gādīē da itil kwudungangung laou dāunga yūansi althlā. Israel hāadē titch Rehoboam an kwutungē lāgang, waigen ltha titch lā an dāungaiang: altsiilth Solomon kwōtalang silid kum Israel hāadē wautliwan an King ga swaunshungāgang. Ltha titch an nung King gasken, waigen ltha titch ishin an nung King gāgang: altsiilth gwudan ltha hāēlthta gūgāgang.

Tligē klāalth tliga swaunshung kingānu ēlang, waigen Israel tligē hinū il kēyēlāni. Tligē stung tliga swaunshung kingānu ēlang, waigen Judah tligē hinū il kēyēlāni. Ga King gas gē klālē stung Israel hāadē an itlagidēalang. Tada klālē klālē stung wok klālē klēlth wok klēlth ā ga King gas gē klālē stung Israel hāadē an itlagidēalang. Israel hāadē an ga King gas gē wautliwan kwutungē dāungaiang, waigen Shālānā ltha an kätliylthdaiang. Yenkien Israel hāadē il dāngang kin dāunga ltha ista gūgāngāni althlā. Houitang lth hāada wautliwan isantiaiāng, waigen tliga kalat hāadē nē lthanga istaiāng, tligē lthanga ishin. Israel hāadē an ltha hāēlthtaiāng, waigen Israel hāadē wautliwan ltha istaiāng haldungā an. Yhē addu yātz ltha istaodzouang, waigen tliga jinga ā Israel hāadē ltha istaiāng. Tliga kalat hāadē Israel hāadē haldungsidēlthtaiāng, waigen Israel hāadē titch ltha tlitaiāng. Wēata giouk Israel hāadē isisgē kum an itil ūnshitanung.

Tada lagwau klāalth wok klālē klāalth, wok klālē stanshunga wok stanshunga gūd ga King gas gē klālē

stung wok stung Judah hāadē an itlagidēalang. Judah hāadē ishin Shālānā kēyi dakiskit giīgāngang, waigen houítang tliga kalat hāadē Judah hāadē haldungsidēlthtaiang. Judah hāadē isantiaiāng, altsiilth tliga kalat hāadē nē lthanga istaiāng: tligē dungalthan lthanga ltha istaiāng. Judah hāadē dāungaiāng, waigen lthken hudila ltha tlaoulthgangang skātlink anna; ettitē an ishin: mūsmūs an ishin: waigen ā singelthkang ltha gūshūgāngang. Shālānā ltha an kātliyi-lthdaiāng, waigen ltha il dāng odzouang. Shantlan swaunshung gūd Babylon hāadē Judah hāadē an hāēlthtaiāng; waigen Judah hāadē wautliwan Babylon tligē ā ltha istaiāng. Babylon hāadē Solomon giē churchnē hēt tlaskināngungāngang kūtijou alth, waigen kin las wautliwan ltha kwolthtaiāng: gold kin wautliwan ishin Babylon hāadē istaiāng, altsiilth houshen yenkien Judah tligē gīnganganu ēlang.



Wēata dī touilung, ān lth kutungātoo, waigen tliku Shālānā dalung shūtas kingān lth wau giū. Kum kin et sūtsu Shālānā an saalgaangung, altsiilth wēata kwutungē unga wautliwan lā ga lth isto; waigen tuman dalung il kingasang. Dalung il dāngstlo houítang dalung wautliwan kuniskidē inēlthasang, waigen tlistluan dalung kwōtalkāstlo hetgwaugē ā dalung isisang.

## LESSON XIX.




### ELIJAH.

ELIJAH nung Gilead hāadou idjāni, waigen nung Prophetgas lā yūan il idjan. Laou Prophetgāgang tlo Ahab Israel hāadē an King gaēlang. Ahab kwutungē dāungaiāng, altsiilth Israel hāadē isantiaiāng, waigen ltha chākwudistlaiāng. Washt ed kouit Elijah hin Ahab shūtaiāng. Shānungetlagidas kitzadu dī iching, waigen lā hangku lth giangung. Yenkien dung dāunga yūangung, altsiilth tada kwan gūd Israel tligē gu kum kālāngudāngshang, waigen kumu delgiāngshang. Lth gūshūstlo delgūāshang, waigen kum lth gūshūānstlo kum delgūāngshang. Houítang Israel hāadē kum hānlthē





# **IMAGE EVALUATION TEST TARGET (MT-3)**



**Photographic  
Sciences  
Corporation**

23 WEST MAIN STREET  
WEBSTER, N.Y. 14580  
(716) 872-4503

18  
20  
22  
25  
28  
32  
36  
40  
44  
48  
52

10  
01

kiāngang; waigen mūsmūsgē kwan isken, kuitangē kwan ishin kwōtalthkaiang hānlthē kum kāng gaangāni althlā. Shālānā hin Elijah shūtaiang: Elijah, kin wautliwan lth unga ista waigen Cherith tligē ā lth kaiit, waigen hānlth gaigu dung istāshang. Cherith tligē ā lth kaiit waigen agung lth saal, Ahab dung tlie da kwudungs althlā. Cherith tligē ā il kaitang, waigen gu kum nung hāda swaunshung isāngang. Kitchista tou il istaiang? Shālānā kin an kaldunga tlaoutlaiang, waigen tlitzan Elijah isis gu yētlth tou lā yūan lā ā kwōisitlāgangang; waigen Elijah tāgangang Singai wautliwan gūd yētlth tou lā ā kwōisitlāgangang Shālānā tuman il kāngāni althlā.

Kum washt jingāngundang hānlth hellā kiālani, waigen houshen Shālānā hin il shūtaiang: Zarephath tligē ā lth kaiit, waigen lth gu is. Kingān il idjāni. Zarephath tligē an il kātlatālang tlo nung chada zanoa hudila il istagwangundang an il kātlagang. Anung chada tlāl itan kwōtalgun altsilth il kuniskidēgēlang. Elijah hin il shūtaiang: shibili klingān sūtsu dī ga lth ista, waigen dung da lth tlātasang. Anung chada hin hangtlan shouan: dē stlē glu shibili dī na ēdung, altsilth wēata annu zanoa hudila lth istang. Silthkang lth stilthskan unga lth tlaoutlāshang: waigen unga lth tāstlo, kum houshen kin tātlingē kāng gaangskan dī kwōtalashang, waigen dī kit ishin. Elijah hin shouan: dī ga lth shibili ista, waigen shibili dānga kum hēlōangshang. Wēata shibili dī na tlaoulth tlāgang, waigen wadla kit unga an lth tlaoutla: waigen kinungan lth tlaoutla, waigen kum dalung kwōtalthkāngshang. Tliku Elijah shouan kingānu il waugang; waigen tada kwan gūd shibili kum langa hēlōangang. Yenkien houshen Elijah kin an kaldunga tlaoutlaiang. Shantlan swaunshung gūd anung chada kit kwōtalang; waigen houftang Elijah an il kātlagang ken hinū il shouan: kashintlou kwutungē tlakwīda dī ga dung istou udjang? Dī an dung kātliyildas althlā dī kit kwōtalgun. Elijah hin shouan: kum dung an dī kātliyildungangung: dung an dī kwutungē lāgung. Wēata kit unga lth dī ga ista waigen lā lth tlatagwiēlthasang. Anung chada kit unga lā ga istaiang, waigen

giouk Elijah tidaiang sili lā il istaiang. Lā inku Elijah kuntlināgang. Lā inku il kuntlinā lth'unilthālang, waigen hinū il shouan: O Shālānā anung hāhutsu tlatagwiē: waigen anung chada kwutungē wautlassaaskit. Wēata di ta lth tlāt, waigen houshen tagwia il kit ga ista. Elijah kil Shālānā kwudangang, waigen houshen anung hāhutsu il tlatagwiēlang Elijah anung hāhutsu glīdang, waigen hinū il ou il shūtaiang: wēata dung kit tagwiēlung. Il kit houshen tagwias il kāngāni tlo yenkien il kwutungē lā yūanan. Sing Elijah ā il killāgang. Adshi kin an kaldunga lth'unilth Elijah tlaoutlaiang.

Tada lth'unilth hēlouang tlo Elijah hin Obadiah shūtaiang: houshen delgū ungkashang, waigen tlan Shālānā swaunan Israel tligē an itlagidas Israel hāadē anūnshitalasang. Kistho Obadiah idjan? Yenkien Obadiah nung itlinga, lā yūanu idjāni. Ahab Israel hāadē wautliwan an King gaēlang, waigen Obadiah lā hangast klingān edang; altsilth Obadiah nung itlagida yūanu idjāni. Ahab hin Obadiah shūtaiang: soldiers kwan yūan lth ista waigen tliga titch ai lth istalo, waigen hāulthē lth kīu: waigen tlaou ishin. tliga titch ai kāashang. Kum hānlthē talung kiāngsken houitang itil wautliwan kwōtalkāshang. Wēata mūsmūsgē kwan yūan kwōtalthkagiēdang: lamatoē ishin: touilung ishin. Tliku Ahab shouan kingānu il waūgang. Hānlthē kīē da il kwudangang tlo Elijah hin il shūtaiang: Ahab gwi lth stilth waigen hin lā ga shūda, althkwik Elijah ā il kāalth delgū yūansēs althlā. Hinū Obadiah shouan: yenkien Prophet lā yūanu dung iching, altsilth tliku di ga dung shūtas Ahab lth shūtāshang. Kingānu il waūgang; waigen Elijah an il kātāgang. Hinū Ahab shouan: Elijah, yenkien dung dāunga yūangūgwau, kwutungē tlakwīda Israel hāadē wautliwan ga dung istasi althlā. Houitang Elijah hin hangtlan il shūtaiang: kum kwutungē tlakwīda Israel hāadē ga lth istagūngangūng, waigen kum ltha an di kwutungē dāungangūng, yenkien dahou kwutungē tlakwīda ltha ga istangwau. Dahou waūgūgwau; altsilth Israel hāadē an dung kwutungē dāunga yūangūng, Shānungetlagidas giē

kingwoğungē dung tlahustagñisi althlā. Kingwoğuns langa kingān kum dung wauanğuni althlā, altsilth Israel tligē gu tada lth'unilth gūd kum delgūanğun: waigen dalunğiou mūsmūsgē kwan kwōtalthkāğung: lamatoē ishin: kuitanē ishin. Baal kil dung yetagūngung, waigen laou hetgwaulana gāgung. Yenkien dung dāunga yūanğung, altsilth Israel hāadē kuniskidē odzūgung.

Ahab ga laplētgas gē lagwau klālē stung wok klālē klēlth istaiang. Shantlan wautliwan gūd Ahab giē nai ā ltha lthtanūğungang, altsilth hinū lth hāada kwan kwudangang Baal Shānungetlagidas is hin ltha kwudangang, altsilth Shālānā ltha an kwutungēsti yūanan. Hinū Elijah Ahab shūtaiang: Baal gion laplēt wautliwan lth ista, waigen lthdou Carmel gwi lth-istiēdo. Kingān ltha wağang: waigen Baal touilung Carmel lthdou gu istlāğang. Elijah hin ltha shūtaiang: houshen gu tlāā dalung kwutungē stung us? Shālānā tligē wautliwan an itlagidastlo lā tlā lth istalo: waigen Baal tliga wautliwan an itlagidastlo lā tlā lth istalo, waigen dalung il kagindāshang. Tlan dī swaunan Shālānā kitzadou iching: waigen ādluna Baal giē laplēt lagwau klālē stung wok klālē klēlth iching. Weata O Ahab, mūsmūs swaunshung Baal giou laplet wautliwan ga lth ista, waigen wadla mūsmūs swaunshung dī ga lth ista Kingānu il wağang Ahab ā. Elijah hin Baal giou laplēt wautliwan shūtaiang: adshi tablegē inku mūsmūsgē kwunan kūtliis gud tlāğangu dalung kwansi althlā: waigen kum tablegē hetgu zanoa istāngu: tās shā stāhā hētge isisken waigen mūsmūsgē hulhēlōsken tlan Baal swaunan tliga wautliwan an itlagidas Israel hāadē wautliwan anūshitalthasang. Waikingān ltha wağang. Ga laplēngas gē dāungas tablegē inku mūsmūsgē kwunan kūtligudāni, waigen kum tablegē hetgu zanoa ltha istaangang. Singaian hin Baal ā singelthkang ltha gūshūğangang: O Baal itil ta lth tlāt: O Baal tuman lth itil kil kwudung: O Baal itil lth kaginda: O Baal delā itil ga lth ista hin ltha shūğangang. Sintadjā gēlthstlo Elijah ltha an kē yūanğangang ken hinū il shouan: Baal dalung an itlagidāğung, altsilth kwunan

lā ā singelthkang lthgūshū. Haia, tliga kalat hāadē ā il gūshū althlingung. Wadshgwau agwi ā il kaiitang althlingung. Il katti yūan althlingung, altsilth kwunan lā ā singelthkang lth gūshū, waigen lā lth tlaskinou. Laplēt dāunga wautliwan Elijah an kätliyilthdaiang Baal an il k̄a yūanāni althlā. Yenkien Baal giē laplēt wautliwan kwutungē tlakwid yūanan, waigen kal unga ltha kōtsilgangang: waigen al lthanga kwan yūangangang. Kwunan Baal ā singelthkang ltha gūshūgangang; waigen kwunan ltha kwutungēstigang kum klingān sūtsu Baal hangtlan shūangangāni althlā.

Tlistluan juiē kākilthkatālang tlo hinu Elijah shouan: kum Baal dalung kil kwudungangun, altsilth kum dalung an il itlagidangung. Yenkien Baal lthken kingānū ēdung, waigen dalung wautliwan kōnungung lā ā singelthkang dalung gūshūs althlā. Wēata dī ā lth isso, waigen houitang tlan Shālānā swaunan itlagida isis an delung ūnshitalthasang. Houitang Elijah tablegē inku mūsmūsgē kūtligudāni, waigen wau hetgu kum zanoa il istaangang. Hinū il shouan: wēata O Shālānā, dī ta lth tlat, waigen dī kil lth kwudung: shā stāhā zanoa hētga lth ista, waigen kiagin mūsmūsgē hulhēlōda: waigen dung tagwia yūans Israel hāadē anūnshitalthasang. Tablegē hētsi il tlarellaāni, waigen hinū il shouan: skatsangu ska stanshung hānlth alth stāoudo, waigen kiagin mūsmūsgē inku lth giaduwo. Waikingān ltha waūgang. Houshen Elijah hin shouan: houshen kingān lth wauu; waigen houshen kingān ltha waūgang. Houshen Elijah hin shouan: houshen skatsangu ska stanshung hānlth alth stāoudo, waigen kiagin mūsmūsgē inku lth giaduwo. Waikingān ltha istaiang. Skatsangu ska stanshung hānlth alth stāouda lth'unilthēlang, waigen Elijah giē mūsmūsgē gwi hānlth ltha giada lth'unilthēlang; waigen wau hānlth alth stāougāni. Houshen hin Elijah Shālānā ā singelthkang gūshouang: O Abraham an nung itlagidas: O Isaac isken, Jacob an ishin nung itlagidas, wēata zanoa hētga lth ista, waigen kiagin mūsmūsgē houitang lth hulhēlōda. Yenkien Elijah kilth kingān houitang shā



stāhā zanoa h3tga il istaiang, waigen mūsmūsgē iskēn hānlth wantliwan ishin kwiē wantliwan ishin hulhēlouang; altsilth Israel hāadē lthwaug yūan odzouang ken ltha tikwōanstla odzouang. Elijah hin shouan : wēata Baal itlagida yūans gu dalung kwutung us? Kāhano; laou ginganganu ēdung : altsilth Baal giē laplēt wantluwan lth tlitoo. Houitang Israel hāadē Baal giē laplētgas gē lagwau klālē stung wok klālē klēlth tlitaiang; waigen houshen Shālānā gwi kwutungē unga ltha stilthtaiang.

Elijah itan hin kitzadalung swaun shūtaiang : wadshgwik lth kaiit waigēn tungē lth king. Houitang ā il kaiitang waigen kum kin swaunshung il kingāngang. Hin lā il shūta chigwaugang : wadshgwik lth kaiit waigen tungē lth king. Tungē il king chigwaugang tlo yen lth'alth il kangang. Tlistluan Elijah gwi il stēlang tlo hin lā il shūtaiang : dī itlagida, yen lth'alth stlē kingān edis lth kinguni. Yenkien Elijah kwutungē lā yūanan, waigen hin lā il shūtaiang : Ahab giē nē gwi lth stilth, waigen hin lā ga lth shūda, houitang lth ga tā, wāigen lth hutla, yenkien delgū yūan ungka shang. Ahab kwutungē lagang waigen nē gwi unga il stēlang. Houitang yenē lth'althtaiang waigen delgu yūanan. Adshi, kin an kaldunga Elijah tlaoutla stanshangang.

Ahab kwōtalang silid Ahaziah Israel hāadē an itlagidēalang. Kum Shālānā il yetāngang. Baalzebub il yetaiang. Baalzebub hetgwaulana kingānu ēdung : altsilth Ahaziah ishin yenkien dāungaiang. Shantlan swaunshung gūd Ahaziah hin soldiers klālē klēlth shūtaiang : Baalzebub ā lth istiēdo; waigen Baalzebub giē laplētgas ge ga hin lth shūdo : Ahaziah wēata sti yūangung altsilth dī ta il tlatiēu lāgung. Tliku aung King gas shouan kingān ltha idjāni. Houitang ā ltha istiēdgundang Elijah ltha kāngang, waigen hinū il shouan : wēata stilthūtlā waigen Ahaziah ga lth shūdo; kum Shālānā dung yetānsi althta kum houshen dung tēgwiēlthāngsang, waigen houitang dung kwōtalashang. Houitang Ahaziah gwi ltha stēlang, waigen tliku Elijah shūsi kingān Ahaziah ga ltha shūtaiang. Elijah an il kātli-

yilda yūanan. Hinū il shouan: kiagin soldiersgē, Elijah ā lth istiēdo waigen lth il tlo. Waikingān soldiersgē waugang. Soldiers klālē klēlth giouk Elijah isis gē ā istiēdang, waigen lthdou inku Elijah kouwaiang. Ltha an nung Captaingas hin shouan: Shānungetlagidas kitzadou dung iching. Itan hinū Elijah shouan: Shānungetlagidas kitzadou di isisken lth agwan shā stāhā hētga zanoa is, waigen dalung wautliwan hulhēlōasang. Houitang hētga zanoa idjāni, waigen soldiers wautliwan hulhēlouang. Soldiers kwōtalthgas wautliwan an King ūnshitālang tlo il kātliyildas tista il glfidista yūanan, waigen soldiers adda klālē klēlth hin il shūtaiang: Elijah ā lth istiēdo waigen lth il tlo. Houshen soldiers Elijah an istlāgang: waigen houshen ltha hulhēlō odzouang. Houshen hin Ahaziah shouan: kiagin soldiersgē, Elijah ā lth istiēdo waigen lth il tlo. Houshen soldiers Elijah an an istlāgang; waigen nung Captaingas hin Elijah shūtaiang: Elijah, kum itil lth tlitaang: itil kalthshint lth kwutung: yenkien tliku dung shūs kingān talung waushang, altsilth itil ta lth tlāt waigen hētga lth kāalth. Lā ā singelthkang ltha gūshouang althlā Elijah ga soldiersgē alth kaiitang. Ahaziah il kingāgang, waigen hinū il shouan: kashintlou kum Shālānā dung yetāngung? Kum Shālānā dung yetānsi althlā houitang dung kwōtalashang. Tliku Shālānā shouan kingān lth waugang, waigen kum dung ga di lthwauḡaanḡung. Tliku Elijah shouan kingān houitang idjāni, waigen Ahaziah kwōtalang. Adshi kin an kaldunga klēlth Elijah tlaoutlaiang.

Shantlan swaunshung gūd Jordan hānlthē ā kāiitē ga Elijah kwudangang. Kōdetsi unga il istaiang ken hānlthē wau alth il saaskidāni, waigen houitang hānlthē kwudādāadāni; waigen silid ā il kātijāni. Elisha ishin lā alth idjan. Ingüst il istlātaswāstlo kin ougungs kingān halthānounwē edang hētga idjāni, waigen kin ougungs kingān kuitanē stung ishin edāni. Hinū Shālānā shouan: Elijah, adshi halthānounwē gwau lth kātla: waigen gwāu il kātligāni. Sīk lā dungalth il idjāni, waigen kum houshen lth hāda il kingangang. Sīk il kātlaiaang tlo hinū Elisha shouan: di

itlagida, di ta lth tlät, waigen dung ödung kingän lth di elthta: waigen di kutungāshang. Elijah hin shouan: sik agwi lth kätlas dung kingstlo houftang di kingānu dung kutungāshang. Elijah sik kätlaiang Elisha kāngang, altsilth lā kingānu il kutungāgang. Ga prophetgas gē wautliwan an il aungāgang. Yenkien Elijah kwutungē lā yūanan, altsilth Shālānā kin ougungs kingānu halthānounwē edis hētga istaiang; waigen wēata Elijah shā tligē gu iching.

## LESSON XX.

### ELISHA.

ELISHA prophetgas wautliwan an itlagidēalang; waigen yenkien il kutungāgang, altsilth ga prophetgas gē kin il skadadaiang. Kin an kaldunga kwan il tlaoutlaiang Israel hāadē lāgē da il kwudangāni althlā. Elijah giē kōdetsē il istaiang. Elijah sik kätlaiang silid Jordan hānlth gu Elisha kätlāgang, waigen Elijah giē kōdetsē alth hānlthē il saaskidāni. Houftang Jordan hānlthē il skidadāni, waigen silid il hātajāni. Adshi, kin an kaldunga il tlaoutlāgangang.

Jericho tligē gu il kätlāgang tlo hānlth wautliwan gaign hongut yūanan, waigen lth hāada hutlāsiken ltha stigelgangang. Jericho hāadē hin il shūtaiang: itil an dung itlagidāgang, altsilth itil ta lth tlät: waigen hānlthē itil unga tlaoulthlāgelth. Tliku ltha shouan kingānu il waugang. Tung yhillāsi althlu houftang adshi hānlthē il tlaōgālāni. Jericho hāadē lā an kwutungē lāgang; waigen yenkien sing lā ā ltha killāgang. Adshe, kin an kaldunga il tlaoutla-stangang.

Houshen kin an kaldunga il tlaoutlaiang. Bethel tligē ā il kaiitang; gwulthtlāst waigen lthken kwan yūan āada il kāgang. Bethel tligē gu il kätlātālang tlo hinū lth hāhudila dāungas shouan: nung skāadja, ilnigē ā lth itil unga kaiitla: nung skāadja, kaiitla. Yenkien lā an ltha ōstatlāgang; waigen lā an ltha kā yūanan. Yenkien Elisha nung hāada lā idjāni, waigen hinū lth hāhudila dāungas shouan: yenkien

kaiitla : nung skāadja dung kōnung yūangung. Houitang il giāgang; waigen ltha gwi silthkang il hangouang tlo hinū il shouan : houitang Shānungetlagidas dalung hēlōdāshang, Shālānā toui an dalung kās althlā. Houitang tām chāada stung lthken stāhā istlāgang, waigen lth hāhudila klālē stanshung wok stung il hananungidouang. Il hananungiwau-sken houitang ltha kwōtalthkaēdang, waigen ā lth hāhudila dāungas hēlō odzouang Shānungetlagidas toui an ltha kāgang althlā.

Washt ed koitu itlagidagē lth'unilth tliga kalat hāadē an hāēlthtaiang, waigen kum klingān hānlthē ltha kiāgang : altsilth kiutanē isken mūsmūsgē ishin gūshāg kwōtaltho-dzūskaiang. Ga itlagida gē lth'unilth Elisha ā nung soldiergas kil kaiitang; waigen hin Elisha il shūtaiang : Elisha, wēata rtil itlagida ta lth tlāt kum hānlthē il dāangwas althlā. Elisha hin hangtlan shouan : nung itlagida swaun-shung lāsi althlā ga itlagida gē lth'unilth ta lth tlātasang. Tlitzan ga itlagidas gē isis ā il kāgang, waigen hinū il shouan : Shālānā lth kwōyādo, waigen kingwoğuns kingān lth wauu. Wēata dalung ta lth tlātasang, waigen hānlthē dalung kiāshang. Adātith kum tatjouwē dalung kwudung-angasang, waigen kum delgūwau dalung kingangasang : waigen Shālānā adshi tligē hānlthē alth stāoudāshang tlan lā swaunan itlagida isis althlā. Wēata tligē lth tlahēalth kwano waigen hānlthē dalung ista kwanasang. Singaian ga itlagida gē lth'unilth kātluouang; waigen tligē hānlthē alth stāagāgang, altsilth il kwutungē lāouang. Hānlthē il istaouang silid il tagwiēlthouang. Houitang gadāungas gēishin il hēlōdaouang.

Kum washt jingāngundang nung prophetgas chā Elisha an kātāgang ken hinū il shouan : dī tlāl kwōtalgun, waigen dung kitzadou dī iching altsilth dī ta lth tlāt. Dī kitilung stungung, waigen kiagin nai ā dī kitilung stung dī kwulth iching. Itan kingān waddanē stāhā kin kwan lth istagun, waigen kum tliku dālā lth kiastlo lth saoutka tlingē kāng gaangung. Wēata dī kitilung stung nung waddalēgas ga istatlang. Dī kitilung stung il istasken houitang ltha haldungsidāğuns kingānu il edawausang. Wēata Elisha

dī kaltheshint lth kwutung: dī ta lth tlāt waigen dung ā lth killāshang.

Elisha hin hangtlan il shūtaiang: gūshū dung lth istādāshang: gūshū dungie nai ā Iching? Houftang hangtlan hin lā il shūtaiang: kum klingān kin isangung kiagin nai ā: tlan skatlangu ā tou isis swaunan wau Iching. Elisha hin il shūtaiang: houft dung touilung wautliwan giō nē stāhā skatlangwē lth ista: yenkien skatlangwē kwan yūan dung istāsēs silid giang nai ā silthkang stilth. Kūwē wau unga dung daaskitstlo skatlangwē unga lth ista giā tou isisgē: waigen skatlangwē wautliwan dung istas ai lth tou giādūdal, waigen skatlang wautliwan tou alth stāougāshang. Waikingān il ista odzouang, waigen skatlangwē langa tou alth stāagāni. Kitilung stung hin il shūtaiang: houshen skatlangwē dī ga lth ista tou ādlun kwansi althlā. Hin lā il shūtaouang: kum skatlang ska swaunshung an kāng gaāngung, skatlang wautliwan tou alth stāougāgung. Houitang Elisha ā il kaiitang ken hinū il shouan: tliku dung shūs kingān lth waūuni, waigen tou dī na kwanung. Hinū hangtlan lā il shūtaiang: nung waddas ga lth tou ista, waigen kitilung dung kaīndāshang. Il kwutungē lā yūanan; waigen waddalē ishin lā an kwutungē lāgang. Adshi kin an kaldunga Elisha tlaoutlaiang lā da il tlāēdēanā.

Shantlan swaunshung gūd Shunem tligē gu nung hāhutsu corn kwulthkadis kātli ā idjāni. Juiē kousta yūanāni althlā il tlingits ā, langa katis yūanan, waigen il hulkwōtalang. Shunem tligē ā Elisha kāgūgangang, waigen altsilth anung hāhutsu kwōtalas giouk Elisha tidagangang gē gu lā ltha tliithināgang. Hin il ou kitzadalung shūtaiang: wēata kuitan dī na lth ista waigen Elisha ā lth kaiitshang. Giouk Elisha isisgē ā il kaiitang ken hinū il shouan: itan corn kwulthkadis kātli ā dī kit Ichin. Juiē kousta yūansi althlā il tlingits ā langa katis yūanan, waigen il hulkwōtalgun. Wēata dī ta lth tlāt, waigen dī kit hagunan Shālānā ā singelthkang lth gūshu houshen il tagwiēlēan. Elisha hin shouan: dung ta lth tlātasang, waigen dung kit houshen lth tagwiēlthasang. Giouk nung hāhutsus isisgē ā Elisha kaiitang ken lā il

kāngang. Kūwē wau il daaskitang silid Shānungetlagidas ā singelthkang il gūshouang; wadla lā inku il tkuntlinā-gang: il kwun gwudi langa hotiwauwang: il kwut ishin an gwudi langa hotiwauwang: il hangi ishin lā il gidsgildaiang: il stlē ishin gwudi langa hotiwauwang; altsilth il tlū langa kinaiang. Houftang anung hāhutsu hangi kāweldungēdang waigen il hatsasā chigwauḡang; waigen houshen il tagwiē-lang. Elisha hin il ou shūtaiang: wēata kit unga lth ista yenkien lā lth tlatagwiēlgun. Elisha hangku il tīkwushtlo-aiang ken yenkien sing lā ā il killāgang houshen il kit tagwiāḡāni althlā. Adshi, kin an kaldunga lthī unilth Elisha tlaoutlaiang.

Houshen Elisha Gilgal tligē gu kātālāgang, waigen gaigu kum tou lā isāngang. Prophetgas gē kwan yūan lā an istlā-gang, altsilth hin kitzadalung il shūtaiang: ga prophetgas gē ādlun kwangung, houftang lth tou ltha ga isto. Kum tou Elisha giē nē ā isāngang, altsilth nung prophetgas lthken ā il kil kaiitang tānska il istiēanā. Tānska kwan yūan il istaiang, waigen zanoa yūan inku sistlināḡāni. Wadla, ga prophetgas gē ga il istaiang. Yenkien tānska dāungas swa-unshung sistlangwē ā il istaiang, waigen kum an il ūnshitāḡāni. Tlan skaldiē ēlthsitlo ltha tāḡāni. Houftang nung prophetgas shouan: O dī itlagīda, kwōtal sistlangwē ā iching. Houftang dī kwōtalashang kum dī ta dung tlātānstlo. Gūshāḡ il kwōtalskaiang: waigen Elisha lā il kagindaiang. Shibiligē il istaiang ken althlu tānska dāungas il tlalāḡālāni: waigen tānska ltha tāodzouāni. Adshi, kin an kaldunga stanshanga Elisha tlaoutlaiang.

Nung hāada swaunshung Baalshalisha tligē stāhā Gilgal tligē gu kātālāgang: waigen shibili hūga klālē stung Elisha ga il istaiang. Shālānā an il kwutungē lāḡāni althlā. Houftang Elisha shouan: lth hāada wautliwan ga tou lth istāshang. Il kitzadalung hin il shūtaiang: kumu shibiligē lagwau klēlth gluēd tlingangung. Houftang Elisha shouan: tliku dalung lth shūtas kingān lth wauu: tou ltha ga lth isto: waigen tou itil an kwanasang. Tliku Elisha shouan kingānu ltha wauḡang; waigen lth hāada klālē klālth



lhtanonāni waigen akisouāni. Shibili hūga klālē stung lth hāada lagwau klēlth an il tlakwanēlth yūanan. Adshi, kin an kaldunga klāalthswansingu Elisha tlaoutlaiang.

Nung Syrian hāadou idjāni. Syrian soldiergus gē an il Captain gāgang. King Naaman kwōyādaiang waigen Naaman anung King gas ishin kwōyādaiang. Itan kingān Syrian hāadē Israel hāadē an hāēlthtaiang, waigen Syrian hāadē gwikāēlang. Naaman Israel tligē stāhā nung chada hutsu istaiang il chā kitzadēan. Yenkien Naaman stigālang, waigen kum tliku il lāgelth tlingē kāng gaangang. Anung chada hutsūs hin Naaman chā shūtaiang: kashintlou kum dung tlāl Israel tligē ā kaiitang udjang? Yenkien nung prophetgas lā yūan gaigu iching, waigen dung tlāl il tlanūngistlāsang. Houftang tlāl unga hin i' shūtaiang: giouk dung lāgelthasēs gē wēata an dī ūnshitun. Houft anung King gas alth kīanung kōgīna Israel hāadē an nung King gas ga il hanshūtīēan, waigen houshen dung tagwiēlthasang. Waikingān il wauḡang. Anung King gas kōgīna lā yūan lā ga istaiang ken hinū il shouan: Israel tligē ā lth kaiit: dālā thousandgē klēlth isken kin giandas kwan ishin gold skatlangwē ishin lth ista, waigen ā lth kaiit. Waikingān il wauḡang; waigen Israel tligē gu il kātīlāgang.

Il itlagida giē kōgīna Israel hāadē an nung King gas ga il istaiang. Israel hāadē an nung King gas adshi kōgīna ga lthwaug yūanan. Hinū il shouan: yenkien Syria hāadē itil an katiyildungung, waigen adshi kōgīna dī ga il istagun. Yenkien Syria hāadē itil an hāēlthtiē da kwudungung. Naaman, kasino dung lth tlaoulthlāgelth tlidzūasang. Kum Shālānā dī isāngung; altsilth kum tliku dung lth tlalāgal tlingē kāng gaangung. Hinū Syrian King gas kālangang: wēata O Israel hāadē an nung King gas, tlistluan adshi kōgīna dung readadastlo Naaman dung kingasang. Lā lth tlalāgelth: lā lth tlatagwiā: waigen dung an dī kwutungē lāshang.

Israel hāadē an nung King gas kwutungē tlakwid yūans Elisha anūnshitālang tlo hinū il shouan: dī itlagidā, kashintlou dung kwutungēsti tlidzūgang: kashintlou kwu-

tungē unga hētk dung istagunḡung? Kum lth lthwangaang; yenkien dung ta lth tlātasang. Naaman ga lth shūda althgwi dī ā il kālth waigen lā lth tlanūngistlāsang. Houṭtang anung King gas hin Naaman shūtaiang: Elisha ā lth kāiit waigen dung il tlatagwiēlāsang: nung prophetgas lā yūan il isis althlā.

Kuitan wautliwan unga il istaiang: hāēlthta halthānounwē ishin: waigen Elisha giē ne an il kātīgāng, waigen kūwē kiakgūst il giangang Elisha kum kiak il kingāangang: tlan gūshouwē swaunan lā ga il haushūtaiang. Hinū il shouan: Naaman, Jordan ā lth kāiit, waigen Jordan hānlthē ā lth halthādang chigwau; waigen houṭtang nung hāhutsūs kal kingān dung kal ēlthasang.

Naaman kātliyilthda yūanan kum kiak lā il kingtlāwāngāni althlā. Yenkien il kwutungē shā ēdang, waigen nē gwi unga il stēlang. Touilung wautliwan il istaiang ken hinū il shouan: dī touilung, lth kwudungatlo Elisha kiak dī kingwāsang lth kwudunḡun: waigen kum kiak dī il kingwautlingānḡun. Kuitan gwau lth kouwas gu il giasken dī stisu il tlikwudungdālasang lth kwudunḡun: waigen dī il tlanūngistlāsang lth kwudunḡun. Kum Elisha dī kingān edāng hin lth kwudunḡung, altsiilth dī kwutunḡestigung kum kiak dī il kingtlāwānguni althlā. Kum gu Jordan hānlth shēngs telgu hānlth lā kiagin tligē gu shēngāng hin dalung kwudung us? Yenkien Damascus tligē gu hānlth shēngs isis Jordan hānlth shēngs telgu lāgung. Yenkien Israel hāadē an lth hāēlthtāsang: waigen ltha lth Alita odzuashang kum Elisha kiak dī kingtlāwānguni althlā.

Il kitzadalung hin hangtlan il shūtaiang: itil aung; yenkien dung itlagida yūangungwau. Elisha kin kwōyā yūan dung istalth dūan lth ista. Ginggangan kin ed Jordan hānlthē ai dung hāadang chigwau elgungwau. Kingān lth is; waigen dung nūngistlāsang. Tliku Elisha shouan kingānu il wauḡang: waigen nung hāhutsu kal kingān il kal ēlang: Il lāgelthgiet yenkien il kwutungē lāgāng; waigen houṭtang Elisha giē nē gwi il stēlang. Hinū Naaman shouan: wēata O Elisha, tlan Shānungetlagiāas swaunan tliga kalat hāadē

wautliwan an Itlagidas an dī ünshitung. Wēata sing tung ā lth killāgung, waigen dung kitzadalung swaun dī isilgung. Kin giandatlingē lth ista althgwi dung ā talung istagun ā. Hinū Elisha shouan: Shānungetlagidas hangku lth giangung, waigen dung il tlaoulthlägelgun: altsilth kum kin giandas dānga ga dī istatlangung. Shānungetlagidas ā singelthkang lth gūshu, waigen dung dāungas ishin washt il kishuasang. Naaman hangtlan hin il shūtaiang: sing tung ā lth killāgung: waigen shantlan wautliwan gūd Shālānā an lth lthāangwilāshang. Klingān tligē wēata dī ga lth ista: waigen tligē lth kingstlo Shānungetlagidas ā singelthkang lth gūshūasang. Yenkien wēata Shālānā gwi kwutungē unga lth stilthtaḡun: waigen lā lth yēta gūshang. Elisha klingān tligē lā ga istaiang: waigen tliga unga gwi il stēlang. Adshi, kin an kaldunga klāalth Elisha tlaoutlaiang.

Tliga unga gwi il stēlang silid Gehazi houftang lā tlā kāgang. Hin lā il shūtaiang: dī itlagida, ga prophetgas gē stung dī itlagida giē nē an istlāgun: altsilth wēata kin giandatlingē tlisku ga il istatlang. Kin giandatlingas Elisha ga il ista kwanan: gold kwan yūan ishin. Yenkien Gehazi kilthkadangang: kum ga prophetgas gē stung il itlagida giē nai ā isāngang. Tlistluan Gehazi houshen Elisha kāgang tlo hinū Elisha shouan: Gehazi, dī kwutungē dung alth ichin. Naaman giē kin giandas dung istaguni althlā dung dāunga yūangung. Wēata Naaman giē stis gē dung kal inku is gūsang: dung kitilung wautliwan inku ishin. Kiaku il kāgwaulang. ken il stigālang: taou kingānu il addaiang. Adshi, kin an kaldunga klāalth wok swaunshung Elisha tlaoutlaiang.

Yenkien Elisha Prophet lā yūanu idjāni. Shantlan swaunshung gūd il kwōtalang: waigen lā ltha tlēēwaiang. Giouk lā ltha tlēēwaiang gē gu Israel hāadē tliga kalat hāadē an hāēlthtaiang, waigen tliga kalat hāadē gwikāēlang: altsilth Israel hāadē titch hēlōdaiang. Tlitzan Elisha tlēēwaiang gē gu nung kalat lā kwulthlān houshen ltha tlēēwaiang. Elisha skwuts ēwasu nung kalat gidsgildaiang waigen houftang il giāgangang. Houshen il tagwiā ēlang.

Elisha skwuts ēwasken annu kin an kaldunga idjāni : altsilth yenkien il Prophetgas lā yūanan, waigen Shānungetlagidas lā alth stangang.

Wēata hānlthē dalung istas ginggangan ēdung dalung titch kwudunghanḡungwau. Dī touilung hanlthē dalung istas kum ginggangānu edāḡung. Naaman kingān kwutungē unga lth edo, waigen Shālānā sik dalung hātlandē istāshang. Shālānā Kit sik kātlaiang kwunast hin kitzadalung ga il shūtaiang : wēata tliga wautliwan ai lth istalo, waigen giatlan las alth lth hāda wautliwan gūk lth shūdo : dī nung yetas hānlthē kwōyāsi istastlo kaḡunasang. Kum dī nung yetānstlo, waigen kum hānlthē kwōyāsi il istānstlo hetgwaugē ā isisang. Naaman kingān kwutungē unga lth edo : hānlthē kwōyās dalung istaḡun tuman lth unga kingo, waigen dalung kaḡunasang. Kum nung itlinga ginggangan ed hānlthē istiē ga dī istatlaḡung. Gehazi kingān kwutungē unga dalung istasken, Gehazi kingān hetgwaugē ā dalung isisang. Wēata ān lth kutungātoo : tlan lth kilthkadungāngu : Shālānā kilth kingān lth wau gifu ; waigen dalung hātlandē kaḡunasang.

## LESSON XXI.

### GA PROPHETGAS GĒ.

KITILDOW ga Prophetgas gē idjan ? Isaiah isken Jeremiah ishin Ezekiel ishin Daniel ishin ga Prophetgas gē kutungā yūan idjan : waigen ga Prophetgas gē klāalth wok stung ishin kutungāḡang : waigen kum Isaiah isken Jeremiah ishin Ezekiel ishin Daniel ishin kingān ltha kutungāḡang. Prophets Old Testamentgē kālunḡangang. Tliku Shānungetlagidas ltha ga kin shūtaiang kingān lth hāda wautliwan ltha skadadaiang. Tliku kin edasēs ishin touilung ltha skadadaiang altsilth kin skadadā lēilung ltha idjāni.

Jonah hin Nineveh hādē shūtaiang : kwutungē unga lth stilthto : waigen kin dāunga dalung istas lth tlanēlthto. Kum Shālānā gwi kwutungē unga dalung stilthtānstlo dalung il hēlōdāshang. Tliku Jonah shouan kingānu ltha

waugang: waigen Shālānā houshen ltha an kwutungē lā yūanan.

Daniel ishin Babylon hāadē skadadaiang. Tliku il shouan an ltha kāgangang waigen lions giē nai ā Daniel ltha istaiang. Shālānā lā alth stangang: waigen lions stāhā lā il kagin-daiang. Babylon hāadē anūnshitālang tle hin ltha shouan: Shānungetlagidas yenkienu lāgung waigen il tagwiāgung. Lā ā singelthkang talung gūshūadzing waigen itil da il tlātasang. Kistho kum il kēyi ā killānstlo lions giē nai ā lā talung istāshang. Yenkien Daniel kwutungē kladskā ēlang: waigen tlan Shālānā swaunan itlagida isis Babylon hāadē il skadadaiang: waigen lā gwi kwutungē unga ltha stlthtaiang.

Jeremiah hin Israel hāadē shūtaiang: tliku Shānungetlagidas shūs kingān kum dalung gundzūanstlo kum dalung da il tlātangsang. Tliga kalat hāadē dalung giē tligē istāshang: waigen kin ltha tlahudjangūns kingānu dalung edasang. Churchnē isken tligē ishin kin ltha tlahudjangūns kingān dalung an edasang: waigen lth hāhudila kin ltha tlakwōtalthkagūns kingān ed odzuasang. Kin wautliwan gingangan dalung an edasang. Shālānā gwi kwutungē unga dalung stlthtastlo, waigen lā ā singelthkang dalung gūshūstlo, dalung da il tlātasang. Tliga kalat hāadē stāhā ishin dalung il kagināshang. Gwaigangē swaunshung shā agwi kwutungē edsken hētk agwi ltha il istāshang: waigen houftang ltha kuniskidēgēlthasang. Jeremiah kil ltha kwudangang waigen Shālānā gwi kwutungē unga ltha stlthtaiang: altsilth ltha il kagināiang tliga kalat hāadē stāhā.

Isaiah ishin Prophet lā yūanu idjan. Israel hāadē kwutungē lāgē da il kwudangang. Prophetgas gē wautliwan telgu il kutungāgung. Hinū il shouan: kum Shānungetlagidas gwi kwutungē unga dalung stlthtānstlo dalung il dāng odzūashang. Churchnē ā lth istalo, waigen lā ā singelthkang lth gūshū: kwutungē unga lth tlaskwunagelthu: tlan lth dāungu: kin lā lth skadou, waigen dalung kagūnasang. Isaiah kil ltha kwudungaiastlo wēata Israel hāadē kwan talung king tlingāgung. Kum Shālānā an ltha lthāangwi-lāngangang, altsilth wēata ltha kuniskidē gēlthodzūgung.

Isaiah tliku Christ edases shūtaiang. Hinū il shouan: Shānungetlagidas Kit unga swaunshungs hētga istāshang, waigen itil dāungas washt il kīshuasang. Nung hāhutsu itil ān tlakaiashang. Nung kit itil ga istiāshang: kin an kaldunga hinū il kēyāshang: kin kutungas lē ishin: Shānungetlagidas Tagwiā yūans ishin: Nung Aung ed swaunungs ishin: kwutungē glaiā an nung Princegas ishin hinū il kēyāshang. Yenkien tada klālē klālē chigwan Isaiah kwōtalang silid Jesus tlakaiang. Tliku Israel hādē il shūtaiang kingān kin wautliwan edāni. Tliku Isaiah shouan kingān Jēsus Christ adshi tligē gu kātlatālang: altsilth Isaiah kutungā yūanan an itil ūnshitung.

Lth hāada wautliwan il tlaoutlaiang: altsilth Shānungetlagidas Tagwiā yūans hinū il kēyang. Christian gas gē an il Aungāgung: altsilth Nung Aung ed swaunung hinū il kēyang. Kin wautliwan il tlaoutlaiang: kin an kaldunga il ista kwanḡung: altsilth Kin an kaldunga lē hinū il kēyang. Lth hāada kutungas telgu il kutungāgung; altsilth Nung Kutungaslē hinū il kēyang yenkien angels wautliwan telgu il kutungāgung angels il tlaoutla odzouāni althlā. Lth hāada kwutungē glaias an il itlagidāgung: altsilth ltha kwutungē glaias an Nung Princegas hinū il kēyang. Wēata lā lth kwōyādo: il kil langa lth kwudungo: lā lth yeto, shā stāhā il kātlatālang dalung wautliwan kagindiē da il kwudangāni althlā.

Tlaglu agwi lamatoē kētsitlēilung lamatoē tuman kāngang. Kungē shā idjāni: angels hētk tligē gu idjāni: waigen lamatoē kētsitlēilung lthwaugālang. Angels hin lamatoē kētsitlēilung shūtaiang: kum lth lthwaugāngu: wēata Shānungetlagidas Kit unga swaunshungs hētkga istaḡun. Houitang Bethlehem tligē ā lth istiēdo, waigen Jesus dalung kingasang. Kwutungē unga lth kladskādo, waigen dalung il kagindāshang. Bethlehem tligē gu ltha istlāḡang tlo Jesus ltha kāngang. Lā ā singelthkang ltha gūshūḡangang: waigen ltha kwutungē lā yūanan. Wēata Jesus itil wautliwan an itlagidāgung: waigen il kēyi ā talung katzūḡungung. Te Deum hin shouan:



"Ga anyākwudungas gē an dung King gāgung O Christ.  
 Nung Aung ed swaunung Kit dahou Iching.  
 Tlagluan lth hāada kaḡindiē an shā stāhā dung kātlastlo, kum nun;  
 chitlingas agung kaidiē ā dung ēdāngang.  
 Kwōtal stāhā dung kītluang silid ga yetas gē wautliwan an shāgē  
 kingdomgē wast dung daastlaiang.  
 Wēata Shānungetlagidas kwulth soolgūsta dung kouwang dung  
 Aung anyākwudungas alth."

Isaiah Prophets wautliwan telgu kutungāgāng wēata an  
 tli ūnshitung: waigen tliku il shouan kingān Shānungetla-  
 gidas waugāng.

Kin swaunshung wēata gūgung. Hinū Prophet Malachi  
 shouan: adshi tligē ouungkashang: lth hāada shā kwu-  
 tūngē edis kun yhillā ouḡuns kingānu edasang: altsilth  
 wēata Shānungetlagidas gwi kwutungē unga lth stilthto,  
 waigen dalung il kaḡindāshang. Lā ga dalung lthwaugastlo  
 yhē unga hetgwau dalung il kaḡindāshang. Dalung kwu-  
 tungē lāstlo ga dāungas gē lthtamt kingān edis dalung stē  
 kāan gu isungkashang: altsilth tliku Moses giē kingwo-  
 gungē shouan an agung lth ūnshito. Kingwoḡuns klāalth  
 kingān dalung gundzūstlo dalung kaḡunasang. Shantlan  
 ōstlāsēs kwunast Elijah houshen adshi tligē gu kātlašhang:  
 waigen tliku il shūs kingān dalung waustio Jesus dalung  
 kaḡindāshang. Wēata ān lth kutungātoo waigen Jesus  
 dalung an lāshang Jesus Prophets wautliwan an Itlagidā-  
 gung: altsilth tliku Prophets shouan kingān talung waustlo  
 itil kaḡunasang.

Apostles Tung ā killāgung O Christ:  
 Martyrs kwutungē kladska Tung ā killāgung:  
 Prophets las wautliwan Tung ā killāgung:  
 Churchnē las tliga wautliwan gu is Tung  
 Hansta shūgung dung lā yūansi althlā.

Di touilung, tliku Prophets wautliwan dalung shūtaiang  
 kingān lth waḡllū waigen dalung hātlandē hēninga glīshung  
 shā tligē gwau.

LESSON XXII.

SINGELTHKANG-GÜSHOUWĒ.

ITIL Aung shā dung isis, agwan lth kēyi unga kwōyāda: agwan lth kingdom althgwik unga ista. Shāgē an dung kwuduns kingān lth hētk tligē an kwudung. Shantlan wautliwan singūd tou itil ga lth ista. Itil dāungas kalthshint lth kwutung, itil an ga dāungas gē kalthshint talung kwutungsi kingān. Kum ga dāungas gē shu itil istaldāng, waigen kin dāungas stāhā lth itil kaḡinda. Kingdom dūngiou isis althlā, tagwia lshin, anyākwudungs ishin: waikingān ed swaunungshang. Amen.

Shānungetlagidas Tagwiā yūans, kwutungē glaia itil ga lth ista lthāangwila halgas talung dāngwiēana waigen soldiers kin giandas kingān kin hatgā talung giandāshang. Adshi hēninga gūd awolth agwi dung Kit Jesus Christ hētk kwutungē unga alth itil an kātālāng: waigen shantlan ostlastlo kin anyākwudunga alth unga houshen il kātālāshang lth hāada hēninga isken lth hāada kwōtalthkia ishin il ginkilislungēana. Christ houshen kātālatalungkasas addu talung kwulthilthstlo lā kalthgwīd itil hēninga gūshang. Dung alth isken Hānts Las ishin alth il hēningāgung waigen itlagidāgung, wēata waigen ed swaunungshang. Amen.

O Shālānā, dung tagwias unga dung kātālūdiē da dung alth talung kiānūngung; waigen itil shū lth kātālā, waigen tagwīgē unga yūans alth itil lth kaḡinda. Kin dāunga talung istas isken itil kwutungē dāungas ishin hagunan gwūthlthē itil hangku dung istas kum tliku talung khūsta tlingē kāng gaāngung. Itil kalthshint lth kwutung, waigen houitang lth itil tatlāt. Kwutungē glaia itil ga lth ista, waigen houitang lth itil kaḡinda. Dung Kit itil Shālānā kin wautliwan ēlthkidaiang: altsilth tliku singelthkang talung gūshūs kingān lth wau; waigen dung isken lā ishin Hānts Las ishin ga talung gwudgutasang; waigen an talung yākwudungasang, waikingān ed swaunungshang. Amen.

Shānungetlagidas Tagwiā yūans, waigen ed swaunungs: kin wautliwan shā tligē gu isis isken, kin wautliwan hētk tligē gu isis ishin an dung itlagidāgung. Kungkwutungē unga alth dung touilung singelthkang gūshūs lth kwudung, waigen shantlan wautliwan itil hēningaskialk kwutungē glaia itil ga lth unga ista: Jesus Christ kalthgwid itil Shālānā. Amen.

Shānungetlagidas Tagwiā yūans, waigen ed swaunungs: kungkwutungē unga alth itil stis lth king: kin ga itil istatlas itil ga lth ista, waigen itil kwutungē tlakwidas wautlissaakitang. Soolgūst stlē unga lth jistla itil tatlāēdēan, waigen agung tlānstla stāhā lth itil kağinda: Jesus Christ kalthgwid itil Shālānā. Amen.

O Shālānā, tuman churchnē unga dung king gūgē da dung alth talung kiānunğung, waigen dunğiē nēzai ishin; waigen dung kilth kingān ltha waushang. Kin lā shā dāngā isis swaunan inku ltha yilthins dung tagwias alth kağun gūgēan; Jesus Christ kalthgwid itil Shālānā. Amen.

O Shālānā, kungkwutungē unga alth singelthkang talung gūshūs dung kwudungē da dung alth talung kiānunğung, waigen ltha wautliwan kin dāunga istas hansta dung ga shūs lth kağinda; kin dāunga sing ltha kwutungē sahaigas kin dāungas stāhā dakiskitē ltha istada; Christ kalthgwid itil Shālānā. Amen.

İtil Shālānā Jesus Christ giē kwutungē glaia isken, waigen Shānungetlagidas giē kwōyādiē ishin, waigen Hānts Las giē kwutungē lāgē ishin agwan lth itil wautliwan alth stung gūda. Amen.

THE END.

raunungs:  
iwan hētk  
kwutungē  
kwudung,  
kwutungē  
ngwid itil

raunungs:  
in ga itil  
tlakwidas  
atlaēdēan,  
sus Christ

gūgē da  
zai ishin;  
n lā shā  
wias alth  
i. Amen.  
ng talung  
nungung,  
dung ga  
ē sahaigas  
kalthgwīd

ia isken,  
gen Hānts  
iwan alth

